

**NATIONAL ASSEMBLY OF
SEYCHELLES**

*Wednesday 29th September,
2021*

The Assembly met at 09.32am

National Anthem

Moment of Reflection

Mr Speaker is the Chair

MR SPEAKER

Mersi. Bonzour tou Manm Onorab e bonzour nou piblik a lekout. E leskiz pou nou piblik, pou sa retar pou komanse, ki akoz en pti retar dan ganny rezilta pour nou bann Manm ki ti'n ganny demande pou al teste yer.

Me erezman tou keksoz in tourn byen. E nou bann Manm i kapab rezwenn nou, pou travay ozordi. E mon a profit lokazyon pou remersye Minister Lotorite Lasante osi, pour zot travay pou ed nou sofgard nou sityasyon lasante.

Nou ava apel Minis pou en *Statement*. Minis *Tourism* silvouple ou ava apel Minis e son delegasyon.

Bonzour Minis Sylvestre Radegonde Minis pou Zafer Etranzer e *Tourism*. E nou osi swet labyenveni Mrs Sherin Francis Sekreter Prensipal pou *Tourism* Mrs Bernadette Willemine ki Direkter pour

Destinasyon e Marketing, e Mr Paul Lebon Direkter Zeneral pou *Planning and Development*.

Mersi pou zwenn nou ozordi Minis pou sa lokazyon enportan *World Tourism Day*. E nou konnen ki, nou sezi ki lenportans sa lendistri i annan pour nou pei. E nou byen kontan pour ki ou'n kapab zwenn nou pou en *statement*. Minis mon envit ou pour delivre pou *Statement*.

**MINISTER SYLVESTRE
RADEGONDE**

Mr Speaker, Onorab *Leader Zafer* Gouvernman, Manm Onorab, tou dimoun ki pe swiv sa sesyon Lasanble Nasyonal. Mr Speaker mon remersye ou pour sa loportinite pou adres Lasanble ek piblik Seselwa an zeneral, lo sityasyon aktyel nou Lendistri Tourizm e plan Departman Tourizm.

Mon lentervansyon ki pou en apersi zeneral, i tonm dan kad katriyenm edisyon Festival Tourizm ki nou pe organize sa lannen anba tenm "*Shaping our Future*", setadir "Fasonn nou Lavenir."

Mr Speaker nou komans sa lazournen ozordi avek en bon nouvel. En tre bon nouvel menm. Minister Lasante Italyen in anonse yer, ki dezormen Sesel i enn dan selman 6 destinasyon touristik, an deor Lerop kot

Italyen i kapab vwayaze san bezwen fer karantenn ler zot retourn *Italy*.

(APPLAUSE)

MINISTER SYLVESTRE RADEGONDE

Sa i en tre bon nouvel pou nou, partikilyerman pou tou nou bann operater isi ki depan lo sa marse, e i annan plizyer zot. Enn pli enportan pou nou.

Mr Speaker Lendi nou ti komemor Lazournen Enternasyonal Tourizm ki Lorganizasyon Mondyal Tourizm i selebre toulezan.

Son tenm sa lannen sete "Tourizm pour en Krwasans Enklizif." Atraver sa tenm, *WTO* i envit tou son Manm pou konsantre lo tourizm pour en krwasans enklizif. Akoz deryer tou statistik ki defini performans sa lendistri, deryer sak sif, i annan dimoun. Se zot ki determin nou prezans ek nou lavenir.

Nou tenm donk pour sa katriyenm Festival Tourizm, i en ladaptasyon tenm *WTO*, dan nou prop konteks. Nou aplodi nou pep, sa bann ki pe aktyelman travay dan sa lendistri pou asir sirvi ekonomik nou pei.

Bann ki pe mazin zwenn sa aktivite, e bann ki'n kontribye anver son devlopman dan lepase. Nou rapel bann pionye sa lendistri,

e ozordi nou rann en omaz spesyal, enn bann pilye tourizm La Digue, Madanm Myriam St Ange, ki'n kit nou resaman.

Mr Speaker avan ki sa pli gran sok ki nou Lendistri Tourizm in zanmen konnen, nou ti anrezistre preske 400mil viziter an 2019. Sa ti anmenn en reveni \$589.7milyon pou pei.

Ler *COVID* ti tap nou, son lenpak ti brital e nou ti santi li imedyatman. Sorti 32mil viziter an mwayenn par mwan, nou ti anrezistre zis 26 viziter an Avril 2020.

Reveni an Fevriye 2020, zis avan pandemi, ti \$58.4milyon, tandis ki reveni total an Fevriye sa lannen 2021 ti zis \$1.2milyon.

Pandan sa premye trwa mwan sa lannen, to lokipasyon bann Letablisman Touristik ti apenn 13poursan. Nou ti dan en sityasyon san presedan. Erport vid! Lotel vid! Restoran vid! Kof vid!

Menm Biro Nasyonal Statistik ti aret anrezistre dire mwayenn sezour viziter. Savedir *average length of stay*, en endikater kle performans nou lendistri.

Fas a sa sityasyon katastrophik, nouvo ladministrasyon anba direksyon Prezidan Ramkalawan, ti oblize pran bann mezir drastik.

Bann risk ti imans, me kalkile. Bann mezir relansman nou lekonomi, me an prenon kont lasante e sekirite nou sitwayen ek nou viziter.

An komansan par en kanpany vaksinasyon kont COVID. An menm tan, Gouvernman in travay an etrwat kolaborasyon avek tou bann operater dan Sekter Tourizm.

Zot ti lans zot dan en program formasyon, remiz a nivo zot letablisman, e an kolaborasyon avek Minister Lasante, enplimant bann prosedir standar operasyonnel - bann SOPs.

Sa bann mezir, in permet nou reouver nou frontyer gradyelman, apartir le 25 Mars sa lannen. An menm tan, avek nou bann marse touristik prensipal, ki ti touzour fermen, ouswa pe gard Sesel lo zot lalis rouz, i ti nesese pou nou revwar nou stratezi *marketing* e redeploy nou zefor ayer pou al rod touris.

Nou'n met plis lanfaz lo travay *marketing* ki ansyen STB ti'n deza komanse, lo marse *La Russie* e lezot pei *L'Europe de L'Est*, dan Mwayen Oriyan, *Israel* e lezot.

Nou pe kontinyen sa travay, menm dan sa bann marse ki reste fermen ozordi. Pou asire ki Sesel i reste vizib, pour atir viziter isi Sesel le moman ki sa bann marse i

reouver. Se koumsa ki nou'n rekipere e nou'n kapab rekomanse.

Ozordi, nou pe rekolte rezilta sa bann mezir. Nou pe ganny pa mwens ki 32 vol enternasyonal par semenn, san kont bann vol *Air Seychelles*. Byento, o fet sa semenn *Condor* pe rekomans vol isi.

E mwan prosen, ou pli tar sa, pli tar sa mwan *Air France* pe osi rebran zot vol ver Sesel. Pandan mwan Zilyet sa lannen, nou ti anrezistre an mwayenn plis ki 5000 viziter par semenn.

Le 12 Septanm, nou ti depas par 1poursan nonm viziter depi komansman lannen konpare ek menm peryod lannen pase. I annan detrwa zour nou ti anrezistre nou 100milyenm viziter.

Si tou i al byen, nou konfyen ki nou pou ariv lo nou target 180mil viziter pou sa lannen.

Deviz etranzer pe kontinyen rantre e nou remarke ki bann viziter ki nou pe gannyen konmela, pe depans bokou plis an zeneral. To lesanz in bese konsiderableman, e dolar in sorti R24 pou ariv anviron R15 ozordi.

Sa se bann lakonplisman ki rann nou fyer. Me nou annan ankor en gran semen devan nou. En gran semen

pou kontinyen adapte, adapte nou avek sa nouvo normal. Pou fer fas avek konpetisyon ki pe vin deplizanpli entans.

Mr Speaker, kote sa premye pilye nou lekonomi i ete ozordi? Eski nou Lendistri Tourizm i sen e dirab? En tre gran par nou lekonomi Nasyonal i baze lo reveni ki nou Lendistri Tourizm i zenere.

Avek reset \$589.7milyon an 2019, sa lendistri i kontribye anviron 37poursan anver nou Prodwir Enteryer Brit setadir nou *GDP* selon Labank Santral. To lokipasyon mwayenn bann lotel an 2019 ti 73poursan pour lotel, e 55poursan pour bann lezot letablisman.

Parey dan laplipar lekonomi bann Pti Leta Zil, Sekter Tourizm isi Sesel i kontribye dan en mannyer enportan lo kreasyon lanplwa.

En gran parti travayer Seselwa i ganny anploye direkteman ou swa endirekteman, dan bann aktivite lye avek sa Sekter. Leberzman, restorasyon, servis sipor, lar, divertisman ek lwazir eksetera.

Lanplwa dan sa sekter i reprezant anviron 20poursan lanplwa lo nivo Nasyonal. Nou note sepandan, ki Sekter Tourizm i touzour dan en faz relansman ek rekiperasyon.

En lefe prensipal *COVID* sete lapert lanplwa ki'n tous bokou dimoun. Me avek relansman sa sekter e lezot aktivite ekonomik ki pe swiv, sa sityasyon pe amelyore konsiderableman e i pe kontinyen amelyore.

E la Mr Speaker, mon oule ensiste lo en pwen. Loportinite i annan pour tou Seselwa ki anvi e kapab travay dan sa sekter. Me sa i depan lo zot konportman, lo zot latitud.

Depi ki mon'n pran portfey tourizm, mon'n vizit plis ki en santenn letablisman. Lotel koman bann *guest house* lo Mahe, Praslin, La Digue e Silhouette.

Vandredi e Sanmdi dernyen, mon'n vizit plis ki 30 lotel, *guest house* e *self-catering* lo Praslin. E mon kontan ki *MNA* Baie Sainte Anne e Grand Anse, Onorab Churchill Gill, Onorab Doyace Porice, e Onorab Wavel Woodcock in akonpany mwan lo sa vizit e lezot vizit ki mon'n fer Praslin avan sa.

Mon oule profit sa lokazyon pou mwan remersye ban *MNA* ki'n akonpany mwan lo lezot vizit dan zot distrik. Onorab Sylvanne Lemiel, Onorab Rocky Uranie e Onorab Sandy Arissol.

Zot prezans i donn nou, koman bann *leaders*, loportinite pou nou vwar bann letablisman, konn bann

operater, konpran zot *challenge*, reasir zot, konsey zot.

Mon konnen ki bann operater osi i apresye bokou sa bann vizit. Pandan sa 11 mwan mon'n annan miting avek plizyer lezot akter dan sa lendistri. *Tour guides*, plonzer, operater *yacht* e *charters*, *SHTA*, ensidswit.

I ankor annan lezot miting ki pou swiv. Mon'n tann menm komanter e konplent avek preske tou dimoun, latitud ek konportman zot travayer Seselwa.

Dan zot gran mazorite, bann Seselwa i travay dir. Zot konsyansye e devoue. Bann anployer i prefere anploy Seselwa, akoz i mwens latet fermal pou rod *GOP*, donn akomodasyon e i kout zot an zeneral mwen ser.

Sepandan, kot napa Seselwa kalifye ki kapab e oule travay, zot oblize rod mendev etranze. Gouvernman, byensir, i favoriz e ankouraz lanplwa mendev lokal. Me fas a en sityasyon kot napa, i napa osi en lot swa.

I annan plizyer ka ki mon konnen, kot dimoun i refiz en *post* travay dan lotel, akoz i pa oule travay *shift*. I pa oule travay aswar, i pa oule travay *weekend*. I ankor annan plizyer ka kot serten dimoun i refize pran en pos permanan.

I prefere travay *casual* akoz i kapab swazir kan i vini, kan i ale, e kan i pa vin ditou! Touris i sipoze manz selman ziska Vandredi. Pandan *weekend* i sipoze li menm al fer debrouy lakwizin, e netway son lasanm!

Sa sityasyon Mr Speaker i regretab, e i pa akseptab. I'n plis ki ler pour nou serye nou! Akoz nou pou bite.

En regar an aryer i montre nou ki pandan sa bann 20 dernyen lannen, nou'n fokaliz nou zefor e nou stratezi lo devlopman prodwi.

Setadir en konsantrasyon lenvestisman dan leberzman, e pa bokou lo linovasyon an term leksperyans viziter, servis, nouritir, labwason, aktivite spesyalize, *shopping*, ensidswit.

Sa mank lezot kalite leksperyans, i antrenn en mank posibilite pour viziter depans plis. En mank lavantaz ekonomik e mank kreasyon lanplwa onivo.

Rikord i montre ki apart sa detrwa dernyen mwan, viziter pe depans mwens. E poursantaz touris ki retourn Sesel setadir bann *repeaters*, i reste ba.

An plis ki sa, nou prodwi touristik i baze selman lo en serten nonm sit popiler. Sa bann sit, avek zot lenfrastruktir ek zot servis

piblik de baz, i ganny servi par nou prop dimoun osi ek viziter etranze an menm tan.

Zot anba en kantite presyon. Bann letid ki'n ganny fer pandan sa 10 dernyen lannen, i demontre ki nou destinasyon in preske ariv en pwen satirasyon. E sa i riske annan en lenpak negativ lo kalite leksperyans ki touris i resevwar.

Alor ki fodre nou fer pou adres sa bann defi? Departman Tourizm i'n ganny restriktire pou konsolid nou zefor ek nou resours, afen ki nou anmenn plis efikasite ek responsabilite dan nou loperasyon an konformite avek nou kad reglemanter.

Permet mwan pou prezant zot, serten program ki nou pe met an plas dan lenplimantasyon prosen faz nou devlopman, ki pou relev bann defi devan nou.

Premyerman lekselans servis;-

Tourizm i en lendistri ki oriyante ver servis. I enperatif alor ki kalite enteraksyon ant viziter, bann anplwaye, Sekter Tourizm ensi ki tou Seselwa ki akey viziter etranze, i non selman o nivo swetab, me menm depas lekspektasyon nou bann viziter.

Nou pe al lans en program ki pou konsantre lo lekselans servis. En pe parey *U First*, pou adres konplent

defayans loospitalite e medyokrite servis dan Sekter Tourizm.

Lobzektif se pou nou donn Seselwa loportinite pou amelyor nou konpetitivite e promouvwar ankor plis nou pei koman en destinasyon o-nivo, gras a kalite servis ki nou ofer.

Pou atenn sa lobzektif, nou pou bezwen fer plis pou etabli bann standar minimonm, kalite e prestasyon servis. Rezilta ki nou swete, se rekonstrir e kiltiv sa kiltir lekselans servis dan nou pei.

Afen ki sak endividi, ki swa dan sekter piblik, prive ou parastatal e menm dan lekol, i konpran ki se nou responsabilite kolektif pour nou annan e montre en latitid korek e pozitif a tou moman. E ki tourizm i biznes tou dimoun.

I annan en bezwen Nasyonal pour nou devlop en latitid langazman parmi nou pep an zeneral. Espesyalman parmi bann ki travay dan sekter tourizm. Pou donn en servis ekselan nou viziter, nou prop sitwayen e rezidan dan nou pei.

Transformasyon nou latitid, i ava annan pour lefe lamelyorasyon leksperyans tou dimoun, ensit viziter pou retournen, ogmant zot depans e anmenn plis reveni.

Sa stratezi Nasyonal lekselans servis, pou annan 3 pilye kle lo lekel nou pe pourswiv nou travay.

- Konsyantizasyon e sansibilizasyon piblik.
- Ledikasyon ek Formasyon.
- Sirveyans.
- Lekselans servis avek pri.

Lot pwen ki mon le koz lo la Mr Speaker se mendev ek formasyon. Prenon kont nou *démographie*, nou depann lo travayer etranze pou konble en defisit mendev e konpetans. Anviron 20poursan mendev dan Sekter Tourizm i ekspatriye. Departman Tourizm i aktivman enplike dan bann diskisyon e desizyon konsernan *GOP*. Nou devret fer tou sa ki posib pou asire ki nou mendev lokal i annan konesans, konpetans, kalifikasyon e latitud apropiye pou travay e retenir zot dan sa sekter.

Avan lafen sa lannen, Departman Tourizm pou komans elabor en plan lo Devlopman Resours Imen dan Sekter Tourizm. I pou neselit konsiltasyon avek bann diferan partener.

Nou lobzektif se etabli sa ki nou annan an term resours imen, e sa ki nou bezwen fer pou konble mank konpetans. Sa plan i ava permet nou revwar nou Polisi

Devlopman Resours Imen dan Sekter Tourizm.

Lakademi Tourizm pe zwe en rol kle dan formasyon bann zenn ki swete fer en karyer dan tourizm. Zot misyon se pour rekrit, formen e devlop bann talan Seselwa, pou fer sir ki nou annan en mendev konpetan e devoue dan Sekter Tourizm, pou amelyor nou servis, nou lakey ek nou konpetitivite:

Formasyon sa bann zenn dan lakademi, i devre ankouraz zot pou reste dan Sekter Tourizm, vin prodiktif, progresse e debrouye.

Malgre serten defi ek kontrent ki *STA* pe fer fas avek tel ki leta son lenfrastruktir, mank lekipman e sipor laprantisaz, *STA* i aspire pour vin enn bann meyer Lenstitisyon Formasyon Profesyonnèl dan nou pei e dan larezyon.

Restriktirasyon son program akademik ek son program formasyon pratik, i ava ed li pran an kont bann nouvo realite e tandans dan nou Lendistri Tourizm, e etabli pertinans son bann program.

Nouvo Direkter Mr Terrence Max, pe pourswiv travay son predeseser an kolaborasyon avek bann konpetans lokal e enternasyonal dan sa bi.

STA pe fer en bon travay preparasyon ek formasyon. Me nou panse ki sa kestyon resours imen dan sa sekter kle nou lekonomi, i devret ganny adrese ankor pli boner.

Nou'n komans diskisyon avek Minister Ledikasyon, pou relans bann Klib Tourizm dan nou lekol. Nou pe demann sa Minister pou revwar konteni program letid dan tourizm, pou li reflekte sa nouvo sityasyon, tandans ek sif aktyel.

An kolaborasyon avek bann profesyonnel dan Sekter Tourizm, *STA* pe vin pli prezan e diferan nivo skoler pou sansibiliz e edik zot, edik nou bann zenn talan potansyel lo perspektiv en karyer dan sa lendistri. Vin bann akter responsab e devoue, e devlop zot lespri lantreprenarya.

An menm tan, *STA* pe ranforsi son partenarya avek bann operater dan Sekter Tourizm ek lotelri, pour ki zot annan en pli gran prezans dan lakademi. E ki zot ede partaz zot lekspertiz ek konesans avek nou bann zenn.

Atraver plizyer laktivite, i konpri bann staz formasyon. Atraver sa partenarya, bann formater ek konferansye *STA*, lo zot kote, zot ava benefisye ek bann staz dan lendistri. Sa ki ava permet zot reste okouran bann devlopman dinamik dan nou lendistri.

Formasyon kontinyel e formasyon antan-parsyel i en lot domenn kot *STA* pe zwe en rol enportan pou reponn a en demann ki pe kontinyen ogmante.

Sa bann program ki *STA* i ofer, i permet devlopman personnel e profesyonnel bann partisipan. Pour bann ki pe rod lanplwa, *STA* atraver en *MOU* avek Minister Lanplwa ek Imigrasyon, i sipoze donn zot bann konpetans profesyonnel neserer. *STA* i ava ed zot devlop en lespri lantreprenarya, gras a bann staz ki met lanfaz lo akizisyon kapasite pou ankouraz zot debrouye.

Lo diversifikasyon prodwi e tourizm kiltirel Mr Speaker. Nou Lendistri Tourizm i sa sekter ki'n pli ganny afekte par sa pandemi *COVID-19*. Depandans nou lekonomi lo tourizm in antrenn en les pas bidzeter limite.

Sepandan, sa pandemi i'n permet nou pran en serten rekil e donn nou lokazyon pou angaz serten nouvo linisyativ, pou relans sa lendistri, an itilizan o maksimonm bann resours ki egziste dan en fason soutenab.

I kler ki azordi touris atraver lemonn pe rod aktivite ki anmenn li pli pre avek lanvironnman, avek kiltir e pep pei ki zot vizite.

Depi milye sa lannen, Departman Tourizm i an konsiltasyon avek diferan partener, pou elabor en plan diversifikasyon ki pou baze lo aktivite touristik kiltirel e kominoter.

Nou pe aktyelman fer en lodit tou bann byen kiltirel, ki pou gid nou ver devlopman bann domenn prodiktif ki lye avek lakiltir ek lendistri kiltirel, tel ki lar, lartizana, spektak, gastronomi pou sit enn de legzanp.

Nou bi se ankouraz inovasyon e devlopman prodwi touristik. Nou pe akseler nou zefor pou idantifye e devlop otan aktivite dan bann distrik, vilaz e kominote pou atir touris pou donn en leksperyans diferan.

An menm tan ogmant zot leksperyans pou nou patrimwann. Ogmant zot satisfaksyon e dire zot sezour. Pou bann endividi ki a ofer sa bann aktivite, i a permet zot partisip e benefisye direktman dan sa lendistri. Anfendkont pei i a kapab ogmant reveni ki i ramase avek touris.

An se ki konsern klasifikasyon lotel, sa i en pratik kouran, ki'n ganny adopte dan lemonn antye.

I permet en pei pou etabli serten norm dan Sekter Lotelri, e kontribye anver plis

profesyonnalizm dan sa sekter.

Klasifikasyon lotel i osi permet en viziter konnen davans, ki nivo en tel lotel i ete e ki i ekspekte gannyen, avan ki i fer son rezervasyon.

I fer plizyer lannen ki nou pe travay lo en sistenm klasifikasyon. Nou ekspekte lans Program *National Classification* lannen prosenn. I enplik en klasifikasyon par zetwal, e i pou obligatwar pour tou lotel ki annan plis ki 50 lasanm.

Bann lotel ki annan mwens ki 50 lasanm, pou kapab zwenn sa program lo en baz volonter. Bann pti letablisman, si zot swete, e zot zwenn bann kriter nesese pou kapab ganny klase anba *label "Seychelles Secrets."*

Sa Program Nasyonal Klasifikasyon i osi prevwar rekonnet bann letablisman ki ofer bann fasilite iniverselman aksesib. Setadir pou bann dimoun ki annan dezabilite.

Anfen, an se ki konsern bann pti letablisman, departman touris pe relans Program Lamelyorasyon Bann Pti Etablisman. Mye koni koman '*Small Establishment Enhancement Programme.*' Son bi se pou ed bann pti Letablisman Touristik, prensipalman avek bann propriyeter Seselwa. Pou

amelyor zot standar e kalite servis ki zot ofer.

Zot partisipasyon dan sa program, i a permet zot ganny sipor *marketing* anba label “*Seychelles Secrets.*”

An sa ki konsern Polisi Bato Krwazyer Mr Speaker:

Nonm touris lo bato krwazyer in ogmant, in ogmante ant 2014 e 2019 pou ariv en sif total 44mil.

An plis, groser sa bann navir in ogmante, osi byen ki bann bato lo mouyaz an menm tan. Sa tandans in antrenn en konsekans, en konzasyon dan Port Victoria. Ki zanmen in ganny konsevwar koman en terminal krwazyer.

E konzasyon lo bann lans ek bann landrwa popiler, nou trwa zil prensipal. Malgre sa, nou konstate ki zis en pti nonm lantrepriz ek operater, laboutik ek vander souvenir, *taxi*, gid touristik, *DMC* eksetera ki benefisye avek sa biznes.

Pour la mazorite operater dan Sektor Tourizm e bann kominote lokal, zot pa vwar gran rannman. Sa bann viziter i pas tre pe letan ater e sa i limit bann retonbe ekonomik.

Zot ekskirsyon i ganny organize an avans par bann *DMC*. Zot prezans i antrenn anbouteyaz e konzasyon. Ogmantasyon nonm touris krwazyer, san gran lenpak

ekonomik, i anmenn presyon siplemanter lo nou enfrastriktir ki deza limite.

Pour sa rezon Departman Tourizm an konsiltasyon avek bann diferan partener, pe elabor en nouvo Polisi pour bann bato krwazyer. Avek bi asire, asir en devlopman dirab sa sektor e en retonbe maksimal dan nou lekonomi.

Sa i ava asire ki sa sektor i vin rantab i ganny byen zere. Sa nouvo Polisi pou tenir kont plizyer laspe. Kapasite nou Por, kapasite fizik lakey, groser en bato, lavantaz ekonomik, presyon lo lenfrastriktir, mitigasyon risk lo lanvironnman, eksetera.

En lot keksoz mon le koz lo la ozordi Mr Speaker sa ‘*carrying capacity.*’ Ver lafen 2019, en konsiltan enternasyonal *Sustainable Travel International*, ti ganny mandate pou antreprann en letid ‘*Carrying capacity*’ pour Mahé, Praslin, ek La Digue.

Lobzektif sa bann letid sete pou etabli nivo sanzman ki Lendistri Tourizm i kapab siporte. An *tenant compte* serten paramet, ki pou asir dirabilite ek soustenabilite sa sektor.

Sa bann letid in konplete pli boner sa lannen. Nou ti soumet letid pour La Digue avek Konsey Minis an Avril. Letid pour Mahé ek

Praslin pour ganny soumet tre prosennman. E apre sa, nou a partaz son bann rekomandasyon, avek tou bann partener. Enn bann konklizyon sa *Carrying Capacity study*, se ki i annan plis lili ki kantite viziter ki nou pe resevwar.

Sa sityasyon i okazyonn en lekse lili lo marse par rapor a bezwen reel a en nivo tre feb lokipasyon. Malgre sa, nou ankor pe fer fas avek demann pour plis lili.

Ziska Desanm 2019, ti annan demann pour 4866 nouvo lasanm pour Mahé, Praslin ek La Digue. Setadir plis ki 9732 nouvo lili. Nou annan an se moman 6953 lasanm, ouswa anviron 13,906 lili.

Si nonm lili i kontinyen ogmante parey dimoun pe demande, to lokipasyon pou diminyen ankor plis. Konstriksyon tou nouvo letablisman, i annan en kou lo lanvironnman. E en sirplis lasanm ek lili pou fer bese ankor plis pri ki nou kapab sarze.

I enportan ki nou atenn en pli o to lokipasyon posib pour maksimiz benefis ekonomik, ki nou kapab tire avek bann lili ki egziste aktyelman.

I osi enportan ki nou minimiz kalite later, kantite later ki ganny konverti

initilman ou degrade par en nouvo konstriksyon oubyen en sanzman lilizasyon.

Nou bezwen osi pran an konsiderasyon, presyon lo servis lenfrastruktir lenerzi, delo, zesyon salte, tretman delo ensidswit.

Pour sa bann rezon, sa *Carrying Capacity study*, i'n rekomande ki okenn demann pour 'change of use', pa ganny aprouve pour lemoman. En moratwar lo nouvo Letablisman Touristik e 'change of use' i deza an viger La Digue apartir le premye Out sa lannen. Nou pou soumet kestyon moratwar pour Mahé ek Praslin avek Konsey Minis tre prosennman.

Mr Speaker nou tou nou depann lo tourizm pour nou sirviv. I en lendistri frazil. I kapab ganny afekte sibitman par bann faktor ki totalman an deor nou kontrol.

Nou'n eksperyans lenpak terib COVID 19 lo nou lekonomi e lo nou byennet. Me i annan lezot faktor ki kapab afekte seryezman sa lendistri. Bann faktor negatif, ki detri nou limaz ek nou repitasyon. Sa i enkli prensipalman kriminalite ek polisyon.

Selon Biro Nasyonal Statistik, ziska zis avan le 21 Mars sa lannen, okenn krim ou lofans kont touris pa ti ganny anrezistre. Me sityasyon i'n sanze

dramatikman apre sa dat;- setadir apre reouvertir konplet nou frontyer.

Plis ki 50 ka kriminalite ek lofans i'n ganny raporte e anrezistre par Lapolis ziska prezan. Sa i konsern sirtou bann ka vol lo lans, vol dan bann letablisman touristik e dan bann loto lwe. Bann tel lensidan i deplorab. I degoutan menm. Zot sali nou limaz ek nou repitasyon.

En loz size preokipasyon se polisyon, pli prezizeman, sa move manni fer salte, zet salte partou, dan bann landrwa piblik, san okenn konsiderasyon, pour nou prosen, pour nou kominote, pour nou lanvironnman.

Pourtan nou Seselwa nou pran lafyerte dan lapropte nou lakour. Akoz nou pran en latitud tanpi konnen, ler nou al lo en lans e kit tou nou salte deryer?

Se lapropte nou lanvironnman, lapropte nou pei ki fer nou repitasyon koman en destinasyon touristik. E se sa ki demark nou koman en pep sivilize. In ler pou nou aret sa bann konportman anti-sosyal, e tou sa bann latitud negatif ki i annan en lenpak negatif pou nou e pou nou pei.

Mr Speaker pou nou relev bann defi ki pe konfront nou e i annan plizyer. Nou pa kapab reste konplezan. Nou

pa kapab reste lebra krwaze. Se pa zis nou ki bezwen adapte avek sa nouvo normal. Leres lemonn, pe osi ouver. Nou konpetiter zot osi agresif e inovatif dan zot kanpany *marketing* touristik ki nou.

Fas a sa konpetisyon feros e enplakab, nou bezwen kontinyen ofer en bon rapor kalite pri. Nou devret fer sir ki akomodasyon ek servis ki nou ofer i alaoter. E menm siperyer sa ki nou viziter i atann e ekspekte.

Nou devret ofer ankor en pli gran nivo leksperyans touristik otantik e kominoter, ki reflekte nou limaz e nou fason viv. E osi, nou bezwen redouble nou zefor pou elimin tou sa bann pratik ilegal, e sournwa ki pe kas anba nou Lendistri Tourizm ek lotelri, e sali nou limaz.

Nou'n ariv dan en krwaze semen, e *COVID-19* i ofer nou sa loportinite pou revwar ki mannyer nou swete fasonn nou lavenir. Nou bezwen decide si nou pou kontinyen atir en pli gran nonm posib viziter, avek tou presyon ki sa i anmennen, oubyen maksimiz tou lavantaz, me avek mwens viziter, avek logmantasyon dire mwayenn zot sezour, e en marse odeganm.

Sa model i ava fer ki nou ganny mwens viziter, me menm kantite reveni, ou plis. E sa prensip fondamantal en

lapros valer azoute *élever*, me avek en lenpak feb.

Nou bezwen osi deside si nou anvi diversifye nou prodwir e konsantre mwens lo konstruksyon bann nouvo letablisman. Me plis lo devlopman bann leksperyans otantik.

Plis lo ledikasyon e devlopman profesyonnel nou pep pour en karyer anrisesan dan Lendistri Tourizm. Se sa bann diskisyon ki nou bezwen annan o firanmezir ki nou avanse pou fasonn lavenir ki nou swete.

Dan sa travay ki devan nou Mr Speaker, napa plas pou politik. Sesel i avan tou. Nou tou nou bezwen travay ansanm.

Nou tou nou bezwen pous dan menm direksyon. Tourizm i biznes sak Seselwa. Tourizm i biznes nou tou! Mon remersye ou Mr Speaker.

(APPLAUSE)

MR SPEAKER

Mersi Minis pou ou deklarasyon. I prezan mon plezir pou envit bann Manm pour zot kestyon. Mon ekspekte nou pou pran sa, sesyon kestyon ziska 11er. Fotespere nou'n a termin tou.

Nou a komans avek Onorab Esparon. Wi LGB, ou ti a kontan ganny laparol?

HON BERNARD GEORGES

Mersi Mr Speaker. Mon ava pran laparol taler, ler ou donn mwan permisyon, me pou lemoman mon ti anvi zis atir ou latansyon lo *Order* 38.

Mr Speaker mon ti anvi zis tir ou latansyon lo *Order* 38, si nou pou, si okenn Manm pou demann kestyon *panel instead of* zis Minis, nou pou bezwen *resolve* pou antre dan en Komite Lasanble pou permet sa arive, silvouple.

E si se sa lentansyon mon ti a *move* sa Mosyon ki nou al dan Komite Lasanble, pou permet *panel* reponn kestyon. Mersi.

MR SPEAKER

Minis ou ekspekte ki ou *panel* i pou kapab entervenir? Dan sa ka mon a demann Serzan pou nou pas dan Staz Komite, koumsa nou a prepare.

HON BERNARD GEORGES

Nou bezwen vote.

MR SPEAKER

Nou lo Mosyon LGB. Mosyon i a ganny segonde silvouple. Onorab Arissol in segonde.

Manm ki an faver, i a lev lanmen silvouple? Tre byen. Mosyon in ganny aprouve nou a kapab pas dan Staz Komite. Mersi LGB nou a, *ok*. Nou a komans avek Onorab Esparon.

HON REGINA ESPARON

Mersi Mr Speaker. Bonzour Minis avek ou *panel*. Bonzour tou dimoun a lekout. Minis ou'n dir nou ki *Italy* in retir sa restriksyon pou touris ki sorti Sesel e ki nou, bouz dan en bon direksyon.

Kestyon se lekel bann lezot pei ki Sesel i ankor *red listed*? E kwa ki pe ganny fer pou redonn sa bann pei konfyans, ki malgre *COVID*. Gouvernman e osi Minister Touris pe fer tou pou gard Sesel koman en destinasyon ki sen e sof?

Dezyenmman Mr Speaker, Minis sa legzersis fer letour dan bann Letablisman Touristik i enn ki pe redonn konfyans e montre sa sipor pour bann operater. E pour sa nou felisit ou, avek ou lekip pou en tel linisyativ e anbank lo en tel program.

Eski distrik Glacis i ekspekte ganny enn sa bann tel vizit, par ou lekip e si wi kan nou pou ekspekte? Mersi Minis.

MR SPEAKER

Mersi Onorab Esparon. Minis.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. Mon a pran ou dernyen kestyon premye.

Wi nou annan plis ki 700, plis ki 700 Letablisman Touristik Sesel ozordi. Bann ki *licensed*.

E mon'n met mon en target ki mon oule - depan konbyen letan Prezidan Ramkalawan i gard mwan koman Minis, me mon'n met mwan koman en target pou vizit *tou* sa bann Letablisman Touristik, avan ler mon manda i fini.

So mon pe fer li. Nou fer par rezyon en ler mon al dan nor en ler mon al dan sid. Mon al Praslin, mon al La Digue. Ler mon al Praslin mon fer Cote D'Or en bor, apre mon al Baie Sainte Anne, pardon mon al Grand Anse en lot letan e La Digue osi. So wi, Onorab mon pou ariv dan ou distrik evantyelman. Sa garanti ki mon donn ou. Mersi.

An sa ki konsern bann pei *red listed*. I annan plizyer - anfen, en *issue* ki mon bezwen eksplike. I annan bann pei ki pa neserman met Sesel lo zot lalis rouz, me zis zot anpes, ouswa zot fer, fer li difisil pour zot bann sitwayen pou zot vwayaze.

Setadir met en bann konsiderasyon, bezwen fer karantenn ler ou vini, ou bezwen al dan en sant karantenn ekspre, peye ou menm, a ou prop fre. Alors sa i en soz dekouraze.

Ozordi *La France* malgre Sesel i lo *red list La France*, Touris Franse pe kapab vwayaze, parske *La France* i permet ki tou Franse, ouswa rezidan *La France* ki'n vaksinen i kapab vwayaze e ler i antre i pa bezwen pran vaksen, i pa bezwen al dan karantenn. I menm zafer avek *Italy*.

Nou annan en diskisyon, anfen *L'Allemagne* osi, i menm zafer, napa problem la. En pei ki nou pe annan serten difikilte avek pou konmela se Langleter.

Nou an negosyasyon avek Gouvernman Angle, pou aktyelman tir nou lo zot *red list*. Akoz kontrerman avek sa bann lezot pei ki mon'n mansyonnen Langleter zot, zot anpes ale, ekspekte si napa en rezon serye, pou zot kapab vwayaze. So vwala.

Me an zeneral mon krwar nou pe ariv en staz konmela, me koriz mwan, mon gard lo *panel* pou koriz mwan si mon mal. Mon krwar an zeneral lemonn pe ouver. Dimoun pe kontinyen kapab vwayaze.

E nou espere ki sa i a, sirtou avek bann mezir avek *Italy* la, nou espere ki sa i kontinyen amelyore *as we go along*. Mersi.

MR SPEAKER

Mersi Minis. Onorab Monthy.

HON PHILIP MONTHY

Mersi Mr Speaker. Bonzour Minis ek ou delegasyon. Minis ki kantite ede, eski sa program vaksinyasyon in ede, pou redonn konfyans dan Sesel koman en destinasyon touristik?

Eski ou panse ki si nou pa al dan sa direksyon ou ti pe vwar 180mil viziter debark lo nou later sa lannen?

Dezyenm kestyon ki lenpak eski enstabilite dan pei i kapab annan lo nou Lendistri Touris e sityasyon ekonomik an zeneral dan Sesel?

E Minis ou'n koz lo krim ek polisyon. Me ki mesaz ou annan pou bann operater ki pe kontinyelman, *overcharged* zot bann kliyan pou servis ki zot pe ofer?

E kwa ki pe ganny fer pou dekouraz sa bann kalite pratik, ki annan potansyel pou touy sa lendistri? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Mersi Onorab. I kler Onorab ki si nou pa ti'n vaksin sa kantite dimoun ki ti'n, nou'n vaksinen.

Nou pa ti pou kapab ouver frontyer Sesel ler nou ti ouver an Mars. Sa i kler.

Avek sa program vaksinyasyon e nivo

vaksinasyon ki nou'n annan, in donn konfyans lemond ki Sesel i en pei ki, *safe* pa dir ki napa *COVID* me ki *safe* pou zot vini.

Parske avek program vaksinasyon e bann mezir *SOPs* protokol ki nou annan dan bann Letablisman Touristik, in fer ki touris in konfidan pou vini.

So sa program vaksinasyon in en bon keksoz. E nou konvenki ozordi, ki i ti en bon keksoz parske ler nou regard lezot pei otour nou ki pa'n ariv - pa'n *attend* sa nivo vaksinasyon ki nou'n annan. Zot in pli retarde zot, pou zot touris demare.

An sa ki konsern enstabilite, wi tou enstabilite dan pei dan en pei, sirtou bann pei ki baze lo touris, i fer touris per. Viziter pa vini dan en landrwa kot i pou koul baton, i pou koul ros, i pou koul boutey, i pou koul *teargas*, si sa i leka.

So pou touris vwayaze, i swazir destinasyon ki plezib, ki i kapab pas son vakans trankilman. E se sa ki neser kot nou koman en pei touristik, pou nou gard sa stabilite trankilite.

Lo polisyon, lo bann aktivite ilegal ki pe ganny fer par bann serten operater. Wi mwan mon krwar nou bezwen pli serye e nou an diskisyon avek, avek *Licensing Authority*.

Bon i annan lo kote legal ki Lalwa i pran son mezir. Me avek *Licensing Authority* *basically* bann ki annan *license*, e ki pe fer bann aktivite ilegal. Nou panse ki sa bann *license* i bezwen ganny tire.

Parske ou pa kapab permet ki en dimoun, ouswa de dimoun i terni limaz, i sali limaz en pei, destinasyon e *basically* zot pe zve avek nou bol diri. E nou pa kapab permet. Mersi bokou.

MR SPEAKER

Mersi Minis. Onorab John Hoareau.

HON JOHN HOAREAU

Mersi Mr Speaker. Bonzour Minis ek ou delegasyon. Bonzour tou dimoun a lekout. Mr Speaker, mon ti a kontan ki Minis - vi ki in koz lo *cultural tourism*.

Mon ti a kontan ki Minis, i dir nou si i annan en kolaborasyon oubyen en relasyon etrwat avek bann lezot Lazans, pour fer sir ki bann *trails* i an sekirite premyerman, e osi i ganny amenaze osi?

Dizon parey Lanmar Koson koumsa, kot mon'n remarke poudir i annan en deteryorasyon lo sa *trail* li menm.

Dezyenmman mon ti a kontan ki Minis i dir nou, ki

zot pe fer dan zot demars pou ede ki bann Labank Komersyal sirtou - e osi *DBS* i anmenn serten lakse avek finans, oubyen i *ease up the access finance* avek sa bann pti devlopman touristik, bann pti *establishment* ki annan dan pei?

Pour ki zot kapab amelyor zot prodwi e an menm tan ganny en serten pa konsesyon, me selman ganny en serten *rate of interest*, ki ase favorab pou zot? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Avek ou permisyon Mr Speaker, mon a pas laparol avek *PS* pou reponn sa premye kestyon e mon a pran sa dezyenm.

MR SPEAKER

Mersi. Wi *PS* ou annan laparol.

PS SHERIN FRANCIS

Mersi Mr Speaker e mersi Onorab pou ou kestyon. Anfet wi i annan travay ki pe ganny fer par nouvo *SNPA*, ki mon krwar i apel *SNPGA* la, pour regard tou bann sit ki tonm anba zot, bann *trails*, ki tonm anba zot responsabilite pou lemoman.

I annan travay ki petet ou'n kapab vwar ki'n deza

ganny fer avek enn ou de sa bann *trails*. E pour sa rezon osi ki i annan *trail*, ki zot in bezwen komans sarz en *fee* pou viziter antre. Se aköz zot bezwen fer lenvestisman pou met bann fasilite sekirite, pou fer sir i annan twalet piblik, ki i annan sekirite lo sit osi tou.

E sa travay pe kontinyen lo tou bann sit ki tonm anba zot responsabilite pou lemoman. E Departman Tourizm pe swiv tre pre avek zot osi pou lemoman.

MR SPEAKER

Mersi *PS*. Minis ou rebran.

MINISTER SYLVESTRE RADEGONDE

Mr Speaker an sa ki konsern sa dezyenm kestyon aksesibilite pou *funding*. Nou konsyan bann *challenge* ki bann operater, sirtou bann ptipti i rankontre. Pou dir ou fransman, nou pa ankor nou, koman en Lorganizasyon Tourizm pour *interact* avek bann labank.

Me ou a konpran ki - *you know* - nou kapab fer li, me nou koman en Departman Gouvernman nou annan tre *peu leverage* vreman pour pous en labank dan en direksyon ouswa *non*. Nou kapab zis sansibiliz zot.

E sa nou'n pare pou fer li. E mwan mon kapab mwan

menm mwan personnelman fer li. Mersi Mr Speaker.

MR SPEAKER

Mersi Minis. Onorab Wavel Woodcock.

HON WAVEL WOODCOCK

Mersi Mr Speaker. Mr Speaker mon pou komanse par remersye Minis pou son, plis ki de vizit ki'n fer lo Praslin ziska prezan.

Annefe Vandredi ek Sanmdi nou'n kouver 31 letablisman touristik e mon remersi li pou sa.

E nou pe ganny bon *feedback*, *feedback* pozitiv kot i konsern sa lendistri lo Praslin.

MR SPEAKER

Onorab mon pa tann ou byen. Ou kapab koz en pe pli pre avek ou mikro, silvouple. Mersi.

HON WAVEL WOODCOCK

Wi. Wi Mr Speaker, mon zis pe remersye Minis pour, son vizit ki in fer Praslin, nou'n kouver 31 letablisman touristik Vandredi avek Sanmdi e *feedback* i vreman pozitiv kot i konsern sa lendistri lo Praslin.

Mon kestyon i *comme* swivan; Minis depi ler Gouvernman in pran sa desizyon pou ouver Erport, *arrival estimate* pour sa lannen, apre reouvertir Erport

ti 50mil. E la avek retour *Condor*, *Air France* e byento nou pe sorti lo *red list*, nou sorti lo *red list Italy*.

Nou pe ekspekte ki nou pou ariv anviron 180mil viziter, i kapab plis osi sa lannen.

Mon kestyon i anvi ki byento pou annan lezot pei ki pou osi reouver, bann pei larezyon parey *Maurice*, *Maldives*, *Sri Lanka*.

Eski ou pe ekspekte en pe konpetisyon avek sa bann pei. E ki nou pou fer, en pe pou fer Sesel vin pli konpetitiv pou *differentiate* en pe nou *product* parey in met lanfaz lo bann *nature trails*, parey Onorab Hoareau in koz lo la.

E mon dezyenm kestyon i kot i konsern, ozordi nou pe ganny bann nouvo - en nouvo *market* ouver pou nou, avan nou *market* prensipal ti *Western Europe*, bann pei parey Langleter *La France* ek *Italy*.

E la dan letan *COVID*, nou'n vwar bann nouvo *market* in ouver. Parey dan *Middle East*, *UAE*, *Saudi Arabia*, *Israel* e osi *Eastern Europe*. Parey bann pei parey *La Russie* ek *Romania*.

E mon kestyon i eski ou Minister pou kontinyen met lanfaz, ouswa entansifye lanfaz *marketing* promosyon pou kontinyen gard sa *market*, pou nou kapab eksplwat sa

market plis ki nou ava ganny plis touris Sesel?

E finalman en gro konsern ki nou ti fer fas avek, ler nou ti pe fer vizit, bann letablisman touristik lo Praslin se kot i konsern *GOP*. Eski pou annan en revizyon kot i konsern *GOP*? Par lefe ki bokou bann lotel, *guest house*, pe ganny bokou difikilte pou ganny bann travayer parey *chambermaid*, kwizinyen e lezot ankor.

Eski, ou in annan en diskisyon avek Minis pour Imigrasyon ek Lanplwa, pour gete en pe si zot pou reviz en pe sa desizyon ki ozordi i annan, lo kot i konsern *GOP* pou Letablisman Touristik? Mersi.

MR SPEAKER

Ok Mersi Onorab. Mon ava envit bann Manm pou limit zot kestyon pou 2. Mon asire tou bann pwen pou ganny kouver. Minis, ou adrese silvouple.

MINISTER SYLVESTRE RADEGONDE

Mersi Mr Speaker. Mon a reponn kestyon limero 1 ek limero 3. Mon a les dezyenm avek *PS*, avek *PS* an sa ki konsern bann marse, *marketing*. Lo konpetisyon avek bann pei ki pe ouver. Byensir *Maurice* i ouver demen - apre demen. I formelman ouver.

Maurice in toultan donn nou en *game*, e *Maurice* pou kontinyen donn nou en *game*. Ler nou regard bann pri ki *Maurice* i ofer pour en vakans. E nou regard bann pri ki nou, nou pe ofer, napa konpetisyon.

Alor *Maurice* i bokou pli bon marse. Me nou, nou pa dir, nou pa pe lager pri nou. Nou dir tan ki nou pe donn valer pour sa larzan. Akoz bon tou dimoun i dir Sesel i pli zoli mwan, mon osi mon dir, nou tou nou konnen, nou pei i bokou pli zoli.

Mon pa oule komans en, mon bezwen fer sir ler mon dir, mon pa oule komans ankor en *polemic* avek *Maurice*. Ki prezan nou pli zoli, mon bezwen fer atansyon.

Koman en pei Sesel i en zoli pei. Nou annan en prodwi ki fantastik. Isi en touris ki vini i kapab annan en, reste lo lans, i kapab al fer *randonner* si oule dan montanny. Nou annan sa bon konbinezon.

So mwan mon dir pri, nou pa neserman fer desann nou. Me nou bezwen fer sir ki sa pri ki nou mete, nou donn valer pour sa pri. E sa nou gro *challenge*.

Donk Sesel i pou bezwen toultan *compete* avek bann lezot destinasyon similer. Dan larezyon ou ayer, e nou bezwen nou met nou dan en pozisyon kot nou kapab

compete, e nou kapab *compete* si nou reste *safe*, nou annan valer pou larzan. Nou pa pe atak touris, Sesel i *safe*, ensidswit. Tou sa *package* ki vin avek.

An sa ki konsern *GOP* i annan en kantite diskisyon lo, lo sa zafer *GOP*. Nou an konsiltasyon regilye avek Minister Lanplwa, lo ki formil nou devret adopte pou fer sa pli fasil.

Mon krwar *challenge* ozordi se, se lavites avek lekel bann laplikasyon i ganny *process*. Sa ki *challenge* ozordi.

Not so much pa donnen, me longer letan ki ganny pran. So sa i en diskisyon ki nou kontinyen annan e nou a kontinyen annan avek Minister Lanplwa. Mr Speaker mon a pas avek *PS* pou dezyenm kestyon.

MR SPEAKER

Mersi Minis. *PS*.

PS SHERIN FRANCIS

Mersi Mr Speaker. Mersi Onorab pou kestyon. Sa bann marse ki nou vwar ozordi pe prodwi pou nou, i pa bann marse ki nou fek komanse yer, ladan.

Anfet i annan en pe letan ki nou'n komans lenvestisman dan sa bann marse. Me selman i pa ti, an term Roupi, i pa ti bokou parey si ou

konpar avek sa ki nou pe investir petet dan bann lezot marse tradisyannel, parey *La France*, *L'Allemagne* e lezot.

Me selman pou sa rezon ki petet annandler bann dimoun i demande aköz nou annan *staff* dan tou kwen lemonn. Ki zot fer sa bann *staff* e i annan bokou travay lo sa bann marse ki'n ganny fer par lekip, dan sa bann marse kot zot in bokou lo teren, pe travay avek bann *partner* pour fer nou pei vizib.

E vre nou'n vwar ler nou'n reouver lafrontyer se ki, nou ti pou ganny difikilte pou nou ganny nou marse tradisyannel. E kot la, nou stratezi ti pou ranforsi dan sa bann marse ki nou vwar i annan demann, e i annan potansyel pou prodwi vit.

E sa ti bann marse parey *Eastern Europe*, *La Russie*, Mwayenn Oriyan an presizan *UAE*, Emirats Arab Ini, *Israel*. E nou'n entansifye en pe nou bann aktivite, nou bann zefor, zot pou vwar osi dan sa bann letan en kantite nou bann aktivite in *virtual*, vi ki nou lekip pa'n kapab vwayaze.

E vi ki, sa i fason ki laplipar pei, laplipar nou bann lazans, e nou bann *partner* ti osi pe enterakte avek lemonn avek nou menm, nou bann konsonmater.

E definitivman ler ou mazin, dan en letan kot i

annan bokou destinasyon, zot ti ankor fermen, in donn nou en lavantaz lo sa bann marse osi tou aköz viziter pa vreman dan sa bann letan.

Sirtou komansman lannen, zot pa'n vreman annan en gran kantite swa, landrwa pou ale. E la kot nou *comme* Sesel, *comme* destinasyon Sesel nou'n ganny en lavantaz konpetitiv.

En lavantaz ki osi donn nou vizibilite. Aköz ler ou le sel pei ki vizib, ki pe pous kominikasyon dan sa pei, dan sa marse, ou tant pou vin pli vizib.

E sa i fer mwan mazin parey egzanp *Romania* ler nou ti ganny nou *first charter*. Laplipar sa bann dimoun lo sa *flight*, preski san poursan, sot enn ou de ti zot premye fwa ki zot ti met lipye Sesel.

E sa i bann marse ki nou pa ti pe gannyen sa kalite sif avan. E definitivman, nou pou kontinyen sa bann travay ki nou'n komanse dan sa bann marse. Vi ki nou'n ganny sa lavantaz konpetitiv, i pa dan nou lavantaz pou arete.

Me selman nou bezwen reste rekonesan resours ki nou annan. Aköz nou pa kapab negliz nou bann marse tradisyonnèl osi tou.

I annan en rezon aköz nou pa pe vwar zot. Demann i la, nou vwar kantite resers zot

pe fer lo *internet* pou vakans, kantite fwa zot resers Sesel.

Nou vwar poudir demann i la, sirtou *Germany*, demann i parey i ti ete an 2019. I annan serten letan. Zis se bann, parey Minis in koz lo la se bann baryer pou vwayaz ki egziste ozordi ki anpes dimoun vwayaze.

Ler larestan lemonn i ouver zot laport parey *Maurice* pe ouver la, dan detrwa zour, la ki nou bezwen *monitor*, vreman pros pou fer sir ki sa lavantaz konpetitiv ki nou'n gannyen par ki nou, nou'n depar avan zot nou kapab mentenir.

I pa pou fasil, aköz tou destinasyon bann ki pe ouver sirtou la dan sa bann mwan ki vini, zot pe vin agresiv. Nou pa pou kapab *compete* ek pri. Sa bann pri ki zot pe ofer i pa parey sa ki nou, nou annan Sesel.

Me selman zis pou ranforsi en pti pe sa ki Minis in dir, nou annan lezot fason ki nou kapab fer nou vin pli konpetitiv. Sa se atraver nou lakey, diversifikasyon nou bann prodwi, nou bann dimoun sa servis ki nou donnen, sa lakey ki nou donnen, i kapab fer diferans e se pour kwa mon pou ranforsi sa mesaz Minis ki *more than ever*, nou tou nou pou bezwen zwenn ansanm aköz vre konpetisyon pe vini la.

E i pou teste nou, me selman mon konnen travay ki nou'n fer deza lo teren atraver nou bann sesyon vertyel in donn nou deza en lavantaz. Mersi Onorab. Mersi Mr Speaker.

MR SPEAKER

Mersi PS. Mon'n pran kestyon sa 4 Manm ki mon konnen ti lev lanmen premye dan sa lord, pour leres tou in lev lanmen ansanm. Alor mon pou zis *pick* anmezir mon ale. Mon a komans avek Onorab Mondon.

HON TERENCE MONDON

Mersi Mr Speaker. Mr Speaker mon oule demann Minis, enn bann konplent lepase se ki Minis ler zot fer vizit, zot pa fer letan pou ekout travayer Seselwa.

Alor mon kestyon dan ou bann vizit ki ou pe fer, kot bann letablisman, eski ou pe koz avek travayer Seselwa direktman, dan labsans *management*?

E mon dezyenm kestyon i devlopman tourizm a labaz kominoter. Ki stratezi ki ou Minister pe adopte pou devlop nou Lendistri Tourizm a labaz kominoter, pour ki nou zabitan dan kominote i ganny plis loportinite pou benefisye avek sa lendistri?

La nou pe koz bann latraksyon natirel parey bann

nature trail, bann latraksyon kiltirel osi parey bann travay ki nou bann artizan i fer. Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. An sa ki konsern koz avek travayer Seselwa dan labsans *management*.

Enn pti pe konplike, mon ti a voudre. Ler mon fer vizit dan en letablisman byensir mon koz avek bann travayer ki mon vwar, ki *available*.

Mon pa la pou mwan al fer en miting spesyal avek bann travayer ki la. Me mon koz avek tou dimoun ki mon vwar. *Zardinyen, waitress, chambermaids* ensidswit. Me i difisil dan bann pti letablisman pou ou ariv en sityasyon kot ou, ou kapab annan en diskisyon konfidansyel ki *management* pa pou la.

Mon pa'n vwar okenn ka ziska konmela kot personn in demande pou vwar mwan separe. *In which case* si sa i leka mon ava anmenn zot akote, ouswa donn zot apwentman vin kot mwan.

Me pou reponn ou kestyon Onorab, non. *Short answer* se non. Mon koz la si en zafer tou zafer i *ok*. Eski ou

ok, bann kestyon koumsa ki mon demande an zeneral.

Me mon espere si i annan okenn *issues* bann travayer i a santi zot lib ki zot kapab demann en apwentman swa avek mwan, ouswa avek mwan *staff*, pou *take up*.

An sa ki konsern tourizm, kiltirel, kominoter, *PS* ou ti'n pran sa kestyon pli boner mon a repas avek ou, avek permisyon Mr Speaker.

MR SPEAKER

Mersi Minis. *PS*.

PS SHERIN FRANCIS

Mersi Mr Speaker. Mersi Onorab pou ou kestyon. Wi parey Minis in fer dan son lentervansyon. I form parti nou stratezi pou lannen ki pe vini, pou nou vin pli pros avek lakominote.

E sirtou ler nou pe koz lo *cultural tourism*. Anfet la pandan sa letan la, i annan en lodit ki nou'n deza komans dan bann distrik.

Premye distrik ki nou'n komans avek i Beau Vallon, dezyenm distrik ki nou pou bouz lo la i Baie Lazare. E nou pou fer sir nou pou ouver tou distrik, pou nou konpran ki tou bann atou kiltirel ki zot annan, bann personnalite enteresan ki zot annan dan distrik, bann diferan operater, ki zot annan bann pti operater

ki kapab *handicraft operators* ki zot annan.

I bann dimoun ki kapab *provide* bann leksperyans otantik pou nou bann viziter. Ki apre nou, nou kapab *package* li dan bann diferan leksperyans ki, en viziter i kapab kontakte zot direkteman, ou pli prezizeman atraver bann gid ki kapab met ansanm bann leksperyans pou nou bann viziter.

E sa i nou premye plan e ki mon mazine i pou anmenn nou viziter pli pros avek nou lakominote. E pou fer nou lakominote osi annan *involvement* direkteman dan lendistri ki zot, zot osi zot kapab santi zot, zot form parti sa lendistri. E ki zot osi zot pe ganny zot dipen atraver sa.

Me selman dan kour mwayen term, nou annan lezot plan osi ki nou osi anvi devlop etrwatman avek distrik ankor.

Local Government ek Departman Kiltir osi an term annan bann aktivite kiltirel dan bann distrik, dan Victoria osi tou. Pou anmenn dan nou bann vilaz osi tou, par egzanz nou vilaz Au Cap. Pou donn sa leksperyans otantik nou bann viziter. Mersi Onorab.

MR SPEAKER

Minis. Ou ti a kontan azout en keksoz?

MINISTER SYLVESTRE RADEGONDE

Wi, Mr Speaker zis pou mwan, zis pou mwan azoute ki i annan serten, serten aktivite la ki nou kapab komanse. Ki sa nou pa bezwen al konsilte.

Nou problem la se, se bann kontrent sanniter ki nou annan. Par egzanp mon ti a voudre kapab annan en moutya, dan en laplenn, dan en distrik.

E envit bann tour operater, bann lotel pou fer kliyan vini. Koman en legzanp. Nou pa kapab fer li. En kantite bann lezot aktivite ki la nou pa bezwen vreman resers, nou pa bezwen diskisyon. Me nou ganny kontrent, nou lanmen i anmare avek bann mezir sanniter.

Me wi le pwen e la, me nou ki nou pe fer, nou pe met nou plan pare. En mannyer ki de moman ki lasante i larg nou, nou kapab lans sa bann aktivite *and run with them*. Mersi.

MR SPEAKER

Mersi Minis. Mon annan en gran lalis Manm ki'n lev lanmen. Donk mon napa okenn swa ekspekte prolonz sa sesyon.

E fotespere Minis i satisfè avek ki lentere ki son ladres in leve dan nou Lasanble. Nou ava pran en poz la e nou

re pran travay ller en kar. Mersi.

(BREAK)

MR SPEAKER

Bon mersi, nou a kontinyen. Mon a pran kekyon Onorab Rocky Uranie.

HON ROCKY URANIE

Mersi Mr Speaker. Bonzour Minis avek ou delegasyon. Mon le profite mon osi pou rann omaz a madanm Myriam St Ange. Enn nou bann pionye parey Minis in dir in, pas bokou son lavi dan, dan touris pou fer ki sa lendistri. E menm son non - Myriam St Ange La Digue, ler ou'n nonm li, i en non ki tou dimoun i konnen. E en madanm ki'n fer bokou keksoz pou, pou La Digue ek Sekter Tourizm li menm pou fer, pou anmenn sa bon devlopman.

Minis baze lo ou vizit ki ou'n fer, dan bann pti lotel e *guest house*. Eski i annan bann *guest house* oubyen bann pti lotel ki ou'n bezwen anvoy bann rekomandasyon tre for pou fer zot fer serten *upgrade*?

Aprè ou'n mansyonnen dan ou *speech* ki Seselwa i travay dir, sa i vre. E aköz mon konnen i annan bokou Seselwa ki kontan sa Sekter Tourizm, zot kontan travay.

Me zot degoute, akòz sa sityasyon ki manner sa *service charge* i ganny partaze. Sesel i ptipti, bann travayer i koz bokou antre zot, ek bann lotel ek bann diferan etablisman bann restoran.

I annan bann operater ki tant pou gard preske tou sa bann *service charge* pou zot menm. I kapab annan 12 travayer, sa *financial controller* i dir be *ok*, nou'n ganny R120mil dan *service charge*.

E bann travayer pe ekspekte zot ganny en bon *service charge*. Zot vwar zot ganny zis en R1000, en R1200 *service charge*. Eski Minis ki manner zot kapab revwar sa *Policy Service Charge?* Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. An sa ki konsern vizit ki nou fer, ki mon fer dan bann letablisman touristik.

Lobzektif prensipal se pou mwan vwar bann diferan letablisman. Zwenn bann operater ki pe *run* sa bann letablisman. Diskit avek zot, zot bann *challenge*, zot bann problem. Ekout sizesyon ki manner nou kapab *improve*, *improve* sa lendistri ouswa ki

manner nou kapab travay ansanm.

Parey mon'n dir dan mon *statement* pli boner Mr Speaker, sa tourizm i zafer nou tou. So tou dimoun i annan en *say* ladan. Nou dan tourizm, nou pa, dan Departman Tourizm nou pa zanmen pretann ki nou konn tou. Nou ekout konsey, rekomandasyon tou dimoun.

Enn osi dan bann keksoz ki mon fer ler mon al dan sa bann letablisman, se *point out* keksoz ki mon krwar i kapab *improve*. Sirtou dan bann pti letablisman.

Lasanble i a note ki, dan bann dernyen lannen e sa mon rekonnèt ki ti leka ler mon ti *Chairman STB* boner dan bann lannen 2000.

I annan en kantite ki'n ganny donner *license change of use*. Setadir en dimoun i annan en lakaz i leve en zour, swa zanfan in grandi in ale, ouswa pou en rezon ou en lot. I deside ki i oule fer biznes, i le al dan tourizm, dan biznes resevwar touris. I *turn* son lakaz dan, i oule *turn* son lakaz dan en *guest house* en *self-catering*.

E i *apply* i annan bann kriter ki ganny swiv. E i ganny *license*. I annan en kantite ka kot mon konnen arive, kot bann dimoun in ganny *license* pour en kantite rezon, *autre* ki standar zot akomodasyon.

An bref i annan en kantite akomodasyon ozordi ki pe resevwar touris ki pa alaoter. La mon pa koz lo en zafer dekorasyon. Annandler ou ale, ou vwar en landrwa i annan rido rouz, dra lili ble, karpè i rouz ensidswit sa i en lot zafer. Estetik.

Mon pe koz lo fizik, landrwa fizik. Kot si ou ale ou vwar par egzantp en dous in ganny akrose anler avek en avek en klou, ou vwar en laport ki pa tro frenmen. Ou vwar laport *wardrobe* in met en papye pou li tenir laport fermen. Bann keksoz koumsa.

So sa i pa en standar ki ale avek Sesel, i pa kole avek Sesel sa. So mwan ler mon vwar bann keksoz, mon *point out*, mon *point out* toultan.

E mon'n koze dan mon *statement* sa *Small Establishment Enhancement Programme*, ki ti egziste dan mon letan STB, ki nou pe fer manner retourn li ankor. Nou premye letap se travay avek sa bann letablisman, donn zot konsey ki manner zot kapab *improve* zot letablisman.

Donn zot en sans pou *improve*. *Free* konsey, *free!* Me si a lafen dizour, konsey pa ganny pran, nou pa pou kapab parey bann dimoun ki vole, parey bann dimoun ki *overcharged*. Nou pa kapab les en letablisman kas repitasyon, dan ka Onorab repitasyon La

Digue e an plis repitasyon Sesel.

Sa dimoun, sa letablisman pa devret pe fer biznes touris. So vwala mon espere mon'n reponn ou kestyon san fodre mon al dan plis detay ki sa.

Wi nou donn rekomandasyon. Si en rekomandasyon pa swiv nou lentansyon se rekomande ki *license* sa bann dimoun i ganny tire.

Lo sa ki konsern *service charge* Onorab mon pa okouran poudir ou fransman okenn ka partikilye. Petet *offline* nou a kapab partaz kek lenformasyon ki ou annan. E mon a regarde kwa ki mon kapab ede pou fasilite negosyasyon.

E apre vwar osi si i annan en nesesite po nou vwar Polisi zeneral, lankadreman zeneral sa ki konsern partaz, distribisyon *service charge* dan bann letablisman. Mersi Mr Speaker.

MR SPEAKER

Mersi Minis. Onorab Michel Roucou.

HON MICHEL ROUCOU

Bonzour Minis avek *panel*. Minis koman en zabitan Mont Fleuri mon osi mon pran sa letan la pou envit ou dan distrik Mont Fleuri, i annan bokou bann pti letablisman

touris ki nou kapab vizite ansanm.

Minis si ou ti kapab elabor en pti pe, lo bann dimoun ki pe fer bann aktivite ilegal ki ou'n dir poudir ki ou pe lyez avek *SLA*, pou *deal* avek silvouple. Mon dezyenm kestyon i an term Zarden Botanik, eski zot pe travay avek Minister Lanvironnman pou vwar kot i annan bokou bann keksoz atiran ki i ava atir bokou plis touris? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Onorab ou a eskiz mwan, mon pa'n tro tann ou ki egzakteman ou ti le lo bann aktivite ilegal. Si mon donn bann legzanp. *Yah! Ok* mersi.

Be regard mwan legzanp i en kantite. Mon a servi *taxi* ki sarz, enormeman pou pran en touris Erport pou al depoz li *Eden Island* par egzanp, *over charging*. Pa tou *taxi*, serten *taxi*.

Mon a koz lo, kwa ki pe arive lo Cote D'Or par egzanp. Onorab Gill, ou'n tande bann zistwar, bann *horror stories* ki pe arive Cote D'Or. Kot dimoun pe ale pe vann bann ekskirsyon me ki li menm li i napa ni en bato, i napa ni en

kafoul koko, en labour koko pou met touris lo la.

I ale i vann, i vann ekskirsyon. I vann manze ki manze pa egziste. I pran larzan i disparet. I annan en kantite. I annan en ka anfen pa resaman.

Me in annan ka kot, en operater en *guest house*, kot i ale i - anfen i pa ilegal me i pa onnet, kot i deside aswar *guest* pe servi tro bokou *aircon* i al antre dan lasanm, i al tenny *air condition* e dir kliyan i pe tro depans *aircon*, *ok*?

I annan ki pran propriyete kliyan, koman gaz in remarke ki kliyan petet i riske sove pa peye. Alor pou li asire ki kliyan i peye, i sezi kek propriyete kliyan, i al avek.

Alors si ou pa peye mon pa pou rann ou. I annan en kantite deor, sa bann *horror stories*. Mon apel li *horror stories* ki pa fer dibyen nou repitasyon. E sa nou bezwen, nou bezwen adrese.

E an plis byensir la, nou pa pe al dan vole, ki pe arive dan vol lo lans, vol dan lasanm ensidswit.

An sa ki konsern Zarden Botanik. Onorab wi, i annan parey en kantite sa bann landrwa, Zarden Botanik i enn be mon kapab azout ladan *Mission Lodge*.

Mon krwar i neser pou nou vwar ki mannyer nou kapab maksimiz potansyel ki

sa bann landrwa i annan. E fer sir ki i annan aktivite, i annan keksoz ki, ki i fer li pey fre pou viziter ale. Pa selman sa enn ki ale, me ankouraz lezot pou kontinyen ale.

Parske ler ou ganny *volume* i vedir ki plis dimoun i ale i depans larzan dan sa bann landrwa koumsa. Mersi Mr Speaker.

MR SPEAKER

Mersi Minis. Onorab Adelaide.

HON FRANCOIS ADELAIDE

Mersi Mr Speaker. Bonzour Minis avek ou delegasyon. Minis mon premye kestyon i, ou konnen poudir tou kou nou, nou vann touris Sesel.

E nou, nou dir li poudir tou lans i piblik. E zot kapab akse. E nou'n deza dan en pe problem, so ki ou avek ou Minister e bann lezot partener pe fer pour ki lans i, i aksesib pou tou touris.

E la mon pe dir ou aköz Baie Lazare mon konnen poudir i annan en pe ki, nou ancor en pe dan problem. So ki bann travay ki zot pe fer?

E mon dezyenm kestyon Minis se vi ki Baie Lazare osi pe vin en, en *hub* pou touris. E mon ekspekte i pou sot Beau Vallon dan ancor en pe letan.

So petet avek bann fasilite tel parey lalimyer, twalet piblik e bann ki ede pou fer lavi touris en pe pli meyer.

So eski ou pe, ou Minister pe travay avek bann lezot Departman pou nou kapab sey *sort out* sa bann keksoz pour ki bann touris i ava ganny valer pour zot larzan? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker an sa ki konsern *beach access*. Mon pa konnen si i annan, si i annan ancor sa problem. Mon konnen ti annan en problem kot en lotel Praslin, mon krwar sa in fini rezourd.

Mon pa konnen si dan lezot landrwa i annan, si i annan petet Onorab mon ti a kontan petet *offline* ganny detay, regarde kwa ki nou kapab fer travay avek lezot Lotorite.

Me i lefe ki konmela, Lalwa mannyer i ete, tou dimoun i annan, i bezwen ganny *access* pou al lo lans.

Me ler dimoun i ganny *access* pou al lo lans osi mon bezwen fer en lapel avek nou dimoun. Konmsi swaye en pti pe plis, annan en pe konsiderasyon ler zot ariv lo sa bann lans. Sirtou ki bann i devan bann letablisman touristik.

Tou dimoun i kontan al lo lans, i ale pou al anmize,

pou *relax*. Me annou fer sir ki sa i pa vin en landrwa kot piknik, i vin en bal popiler. Kot nou met lanmizik pa zis pou nou, me pou kominote antye.

Konmsi nivo lanmizik, nou ale pou zwe, nou vin fer bann *games* la. Dimoun vini avek son lisyen, ki lisyen i ganny larg, i pronmnen partou. Konmsi dimoun i annan drwa al lo lans. Me servi lans osi korekteman, konvenableman.

An sa ki konsern bann lalimyèr lo semen, twalet piblik. Mon ti a voudre vwar dous osi, piblik lo bann lans. Sa i en diskisyon ki nou pe, nou pe annan avek diferan Lotorite.

Nou a konpran ki, an kantite nou, ou menm Onorab e plizyer la dan bann distrik ki, ki bann distrik touristik ouswa ki borde avek distrik touristik. Nou annan en kantite lide, ki mannyer nou ti a kontan vwar bann touris dan nou distrik, dan bann letablisman dan nou distrik.

Mannyer nou ti a kontan vwar zot pe *operate*. I annan sa bann lide, me apre i annan mwayen ki vin avek. Bann resours ki vin avek pou fer li arive. I en *challenge* ozordi, pour, pour kapab met twalet dan tou distrik kot i annan touris.

Parey mon ti a kontan osi vwar, mon krwar ti annan

en kestyon ti leve pa tro lontan pase avek mon koleg Minister, Minis Zafer Enteryer, lo sa ki konsern *lifeguards*, mon ti a kontan vwar *lifeguards* dan bann landrwa kot touris i frekante.

Me i annan osi mwayen ki vin avek. Me sa ki mon kapab garanti ou Onorab, se ki sa i en diskisyon i lo nou kalandriye. Lo kalandriye Gouvernman pou nou gete *how best we can do it*.

Nou bezwen annan en plan, i pa pou kapab fer tou an menm tan, lo tou lans, lo tou landrwa, tou distrik. Me i annan en *phased approach* ki mannyer nou kapab fer li. Mersi.

MR SPEAKER

Mersi Minis. Onorab Aglae.

HON EGBERT AGLAE

Mersi Mr Speaker. Bonzour Minis ek ou *panel*. Minis mon pou tous sa size moratwar ki ou pe, ki ou'n diskrit lo la en pti gin.

Mon ti a kontan petet demann ou, anvi ki ou'n nonm 6253 lasanm ki *actually* egziste, eski ladan, avan ki nou al dan sa prosesis moratwar ki pou vin lo Mahé tou.

I annan sa bann lotel ansyen, ki par egzantp mon pou koz *Mahé Beach*, *ex-Mahé Beach*, *Reef Hotel* osi. Mon pa

konnen si *Equator*, ki aparaman menm si zot pa ti pe *operate* zot lasanm ti pe ganny *still* liste *as*.

Si sa in ganny rektifye, si zot in rektifye sa. E lot pwen Minis mon anvi demann, kot i konsern bann servis *provider* ki atase avek bann letablisman touristik.

La mon pe koz ou bann *taxi operators*, mon pe koz ou bann *boat charter*. Bann, i annan bann *beach vendors* osi. Bann *tour guide*, e tou resaman ou ti fer miting. Mon ti vwar ou lo televizyon, ti'n fer en miting avek sa bann *stakeholders*.

Eski Minister pe mazin met en *sort of* en, en *Policy framework* dan en sans? Akoz i annan pa mal konsern, ki ganny met devan sirtou bann friksyon ki leve. Sirtou avek sa bann letablisman, ek sa bann operater, pour rann sa de servis lo en *win-win situation*, kot tou lede a benefisye san ki annan ki mars lo lipye kanmarad, i annan ki pe pous lot. Eski zot pe mazin sa?

E dernyen Mr Speaker permet mwan, kot i konsern *crew ship*, ou'n nonmen poudir byento nou pou vwar bann larive *cruise ship*.

Si ou ti kapab petet *update* nou, en pti gin lo sityasyon vi ki ti pou annan, sa proze pou annan en nouvo

fasilite Por, Por pou zot, anvi ki annan pa mal konzasyon.

Sirtou bann letan ki bann bato kargo i dan Por ek *cruise ship* osi i bezwen antre. Mersi.

MR SPEAKER

Mersi Onorab. Minis *please*.

MINISTER SYLVESTRE RADEGONDE

Mersi. Mersi Mr Speaker. Kot i annan moratwar lasanm. Mon a les, avek ou permisyon Mr Speaker *PS* koz lo la.

Mon a reponn sa de lezot kestyon. An sa ki konsern bann *service providers* ki swa dan lotel ou aryer, e bann friksyon ki annan.

Konnen Gouvernman, Minister Tourizm, Departman Touris pa kapab kontrol tou keksoz. Dimoun i bezwen pran zot responsabilite. Travay an kolaborasyon.

Me sa ki mwan mon remarke depi ler mon dan sa *job*, se ki sa Lendistri Touris la i en landrwa kot en kantite dimoun pe mars lo lipye kanmarad.

Dan tou domenn, ou konpran? Menm dan sa lasosyasyon ki sipoze regroup bann lotel, bann akter dan touris, antre zot, zot menm dan sa lasosyasyon, i annan bann friksyon.

Mwan mon pa kapab rezourd sa bann friksyon,

zansla i bezwen aranz zot, zot menm. *Weekend*, Vandredi mon pran en legzanp, bann *tour guides* Praslin, Vallée de Mai.

Pou en rezon ou en lot bann *tour guides* Praslin, mazorite bann *tour guides* Praslin zot panse ki, *biznes tour guide* i selman Vallée de Mai.

Zot konsantre la lo *car park* Vallée de Mai e zot pe ganny en bann tirayman antre zot. Lager pri, lager konbyen lekel ki pran plis letan, pti kourt letan an plis. En bann kankan antre zot, *ok?*

Sa *non plus*, mon pa kapab rezourd, sa mwan. Mon pa pou rezourd osi lontan ki, limaz sa *biznes*, limaz *tourism industry* pa ganny afekte.

So mon apel lo bon sans sakenn. Sa lendistri i ase gran pou sakenn kapab ganny en bout lavi ladan, ou konpran mwan? Nou ki nou kapab fer se konseye, se prese. Me a lafen dizour zot pou bezwen sakenn fer son deboury koman adilt.

Lo sa ki konsern *cruise ship*. Wi, Por i konzeste, nou'n annan en serten premye diskisyon avek bann operater ki dan sa *biznes cruise shipping*, bann *Chandlers*, bann *DMC* ensidswit, lo ki manner nou pou *tackle* sa enn de *cruise ship*, ki pe al arive dan detrwa mwan la. Ki

manner nou pou mannye sa Por.

Mwan mon napa konesans teknik dan, dan Por ki lespas i annan. Sa ki mon konnen se ki annandler larive *cruise ship* i *clash* avek larive en bato kargo. E i kler ki bato kargo pou annan priyorite.

So sa i en bann diskisyon ki nou ankor pe annan lo ki manner nou kapab annan en *schedule*. An atandan ki si evantuelman Sesel i al dan *cruise shipping big time* - parey mon ti dir dan mon *Statement* sa i en diskisyon ki nou ankor pe gannyen. Si i leka nou pou bezwen regarde, eski nou pou rod lespas dan Por ki egziste, ouswa i pou neser get en lespas alternativ en lot landrwa?

Sa i en diskisyon ki i ava vini apre nou pa ankor la, pou konmela. Moratwar avek bann nimerò lasanm, bann kantite lasanm Mr Speaker.

MR SPEAKER

Mersi Minis. Wi *PS*.

PS SHERIN FRANCIS

Mersi Mr Speaker. Mersi Onorab pou ou kestyon. Dan sa 6000 ekek lasanm ki nou annan, operasyonnel. Si en lotel i fermen son stok lasanm i ganny tire.

I ganny tire dan sa stok ki operasyonnel. Si i annan en proze, an kour - par egzanp in

fermen, me selman i annan en proze ki pe vini, pe ranplas li, la i al dan sa stok lasanm kot ou dir demann. Par egzanp Minis in mansyonn de *figure* la, in dir nou annan apepre 6000 lasanm operasyonnel, apre nou annan apepre 4000 demann ki pe vini. So bann ki dan *pipeline* pe vini.

So si i annan en proze i pou dan sa bann ki ou apel dan *pipeline* pe vini. Si sa lotel in fermen i napa okenn plan, i pa'n *submit* okenn plan kot nou poudir i pe redevlope, i pe plan pou refer sa proze *or* nanryen, la i pa ganny *allocate* okenn lasanm.

E i pa ni pou menm dan demann. Selman sa 6000 lasanm ki nou'n mansyonnen i bann lasanm ki egziste ozordi. Mersi Onorab.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Speaker. Bonzour Minis avek ou delegasyon. Bonzour tou Manm ki a lekout. E tou nou piblik ki pe ekout nou.

Mr Speaker mon ti a kontan profite dir Minis avek son delegasyon mersi, pou sa zoli vizit ki nou ti fer Bel Ombre, kot nou bann zoli letablisman touristik. E ou ti ganny sans enterakte avek propriyeter, osi

bann travayer ki ti la. Mersi pou vizit.

E mon ti a kontan felisit Mrs Sherin Francis pour sa bon travay kot tourizm, ou avek ou lekip felisitasyon, pou asire ki touris i kontinyen antre dan pei anba gidans nou Minis.

Kestyon ki mon ti a kontan demann Minis se, mon kontan letan Minis in koz an relasyon avek nou bann travayer i bezwen konsyan, poudir touris i manze Dimans e Sanmdi son lenz i bezwen lave. E son lili i bezwen ganny fer toulezour.

Mon ti a kontan demann Minis, si i annan en travay ki pe ganny fer avek bann Letablisman Touristik pour ki zot *package* i enteresan? Par egzanp letan en zenn Seselwa i konnen i pe al travay kot en lotel *5 Star*, i pou konnen poudir *son package* ki i pou gannyen kot sa *5 Star*, i bezwen diferan avek en *package* kot en zenn i travay avek en *retail shop*.

Mon pa kapab travay avek en *5 Star*, mon travay konze mon napa Sanmdi, mon napa Dimans. Be selman mon saler, oubyen mon *package*, ki preski menm zafer avek sa zenn ki li i travay dan en *retail shop* ki ferm 4er e ganny son Sanmdi ek son Dimans. Eski i annan en travay ki pe ganny fer lo la?

Dezyenmman mon ti a kontan demann e sa i ava fer Minis ki ava anpes labi kont bann travayer Seselwa, e dan sa *package* kote bann santer Seselwa i rantre, dan sa *shaping for our future* la? Kote bann santer Seselwa i rantre ladan?

Dezyenmman mon ti a kontan demann ou, dan distrik Bel Ombre par egzanp nou annan plizyer bann letablisman touristik ki letan zot, zot in fer byen zot anvi envestir dan nou distrik.

Par egzanp *Treasure Cove* kot madanm MacGregor, i ti annan en lentansyon pou li fer en lot keksoz pour distrik, dan laspe touristik. Eski Gouvernman zot annan bann striktir an plas ki pou siport bann pti biznes ki anvi zisteman agrandi e siport lakominote Minis, zis parey ou'n dir taler an relasyon avek nou vwazinaz?

Mon dernyen mon ti a kontan demann zot, si zot ti a, si zot pe mazin revwar sa *Travel Advisory Form* la ki nou ranpli *online*, pou bann Seselwa spesifikman ki ganny difikilte letan pe retourn dan pei? Mersi bokou.

MR SPEAKER

Mersi Onorab Arissol. Minis.

MINISTER SYLVESTRE RADEGONDE

Mersi Mr Speaker. Mersi Onorab. An sa ki konsern *package* bann travayer. I vre ki ozordi apard *minimum wage*, sak letablisman i donn diferan *package* son travayer. Lo sa mon pe koz lo nivo finansyel.

I diferan, i baze - kot Lalwa i konsernen ki i vremen i pa vremen konsern touris, me i konsern Minister Lanplwa, se fer sir ki omwen sa *minimum wage* ki Lalwa i demande, i gannyen.

I annan en kantite lotel ki mwan mon konnen zot, zot vremen zenere avek zot travayer. Zot vremen zenere. Me kote en travayer i santi ki i pa pe ganny konsidere, petet i pe ganny maltrete si maltrete i le mo. Nou, nou ti a kontan konnen e regarde ki mannyer nou kapab aziste.

Ou'n lir ou kestyon Onorab avek bann santer Seselwa. Nou ki nou fer, nou les bann - anfen nou ankouraze e les bann letablisman touristik, sirtou bann gran lotel. Konnen ki vwala bann diferan posibilite ki annan, nou les zot konnen.

Mon konnen in annan *as a result*, dan sa legzersis ki nou fer, serten lotel ki'n ale e retournen - anfen in retournen. Apre in pran serten *performers* Seselwa.

Me sa ki mon'n toultan dir se ki bann *performers* osi Seselwa, zot devret osi leve

pran zot baton pelren ale al rode, se zot lavi.

Konnen Sesel petet tro souvan zot ekspekte ki tousala la, se louvraz Gouvernman. Se responsabilite Gouvernman pou rode. Nou, nou met kad. De *tout* fason nou napa ni menm pouwar pou fors en lotel pran en *performer* ouswa non, ouswa anploy en dimoun, ouswa non.

Bann *performers* zot devret ale, al rode. Ale ek en *CD*, al en seleksyon sanson, montre kwa ki ou kapab fer. E fer li zot asosyasyon. Servi zot asosyasyon pou fer li. So vwala sa ki mon dir. Me kot, kot nou konsernen nou sertenman ankouraz bann lotel, bann gran lotel pou pran bann *entertainers* Seselwa. I annan ki'n pran mon espere ki sa i ava, i ava kontinyen.

Travisory: travizory or travizory. Ler, ler sa platform ti komanse, bi prensipal sete pou Lasante kapab *screen* bann dimoun avan zot antre, fer sir ki zot in pran vaksen, ensidswit e ki *safe* pou zot rantre.

Anmezir ki nou *move on*, rezondet deryer *travisory* in sanze. E prezan i vin osi en fason pou Imigrasyon pou Lotorite Sesel, konn a lavans bann dimoun ki pe vwayaze, ki pe vin Sesel. E kapab pike ladan bann dimoun ki poz en risk pour sekirite.

Bann dimoun ki, bann *known* petet *traffickers*, *human traffickers*, *drug traffickers*, ou lezot. E prepar zot pour *deal* avek.

Sa platform li menm i montre ki i en bon platform. E an mezir ki ale par egzanp kot touris i konsernen, zot ti pe sarz 45€. Nou'n negosye nou'n desann, mon krwar ariv apepre 10€ la pou en viziter.

Next step, se ki vi ki detay ki zot demande lo sa *travisory* i en kantite, i menm detay ki ou trouve dan sa *disembarkation card*. Nou pe negosye ek Lotorite, ofet sa se *next step* ki zot pou al fer byento. *Do away* avek sa *disembarkation card*, ou pa bezwen ranpli sa bann lenformasyon de fwa.

Ou konnen bann dimoun ki'n vwayaze ler ou'n mont, mont sa avyon 2er bomaten. E zot vini zot donn ou enn sa form avek sa bann pti, pti *print* anmezir avyon pe ale, prepare pou *takeoff*, ouswa in *takeoff* pe bouze ou prezan ki ou pe rod linet, ou pe rod *ball pen*, ou pe rod pou ekrir. Avyon pe bouze ou pe sey rode kwa ki pe soz. I pa pe marse.

So ki, ki direksyon nou pe ale la, se ki byento pou napa nesesite ranpli *disembarkation card*. Tou sa bann detay ki ou ava donner dan *travisory*, i a sifizan pou

permet ou ler ou debarke, pas direk al kolekte ou bagaz.

Avek posibilite ki a nenport ki moman, zofisye Imigrasyon i kapab fer bann *spots checks*. Sa se lavantaz sa, sa *tool*.

Ou ti'n poz en kestyon lo *support for small businesses* Onorab. Rapel mwan ki, *support to small businesses* mon'n note. Rapel mwan ki ou ti oule konnen egzakteman? Pardon.

HON SANDY ARISSOL

Mon ti anvi zis Minis i annan bann biznes dan distrik, touris. Selman zot anvi envestir dan distrik, avek lezot kek fasilite par egzanp en pti restoran, byen.

Zis lo menm laliny ki ou ti koz lo la taler pou entegre la tourizm dan nou kominote. E *Treasure Cove* Bel Ombre i enn parmi. Mersi.

MINISTER SYLVESTRE RADEGONDE

Mersi Onorab. Mersi Mr Speaker. Sertenman i bann, i bann aktivite ki nou ankouraze. Byensir ou a konpran ki tourizm li menm li, Departman Tourizm i napa Lotorite lo la.

Me nou donn nou sipor a sak fwa sa dimoun i al kot *SIB* i prezant son proze. *SIB* i demann nou, nou komanter. Okenn proze ki ede, pou

valoriz tourizm, pou donn sa varyete prodwi, pou donn en lot leksperyans tourizm nou siporte tou sa bann proze.

So nou pou kontinyen fer li. Avek ou permisyon Mr Speaker mon a demann *PS* pou koz briyevman lo sa *employee survey* ki nou le fer.

MR SPEAKER

Wi. *PS*.

PS SHERIN FRANCIS

Mersi Mr Speaker. Mersi Onorab. Mon ti anvi koz lo sa pwen an relasyon avek ou premye kestyon *package* pou bann *staff*. *Package* enteresan pou bann *staff*.

Anfet de tanzantan nou ganny bann diferan komanter avek petet manm piblik, *staff* li menm lo serten keksoz ki fer zot demotive dan lendistri.

E Departman pe pran sa linisyativ pou fer en *survey*, en *Tourism Employee Survey* dan lendistri an antye. Pou nou kapab konpran kwa vreman ki pe demotiv nou bann, nou bann anplwayer dan lendistri.

Sa i avek bi, ki ler nou ava fini ganny sa bann detay, i a pli kapab ed nou pou nou *take up* bann *issues* avek bann Departman nesaser.

E menm si nou bezwen *take up* avek lendistri, nou ava annan ase bagaz pou nou kapab *take up*. E si sa i en pwen ki monte, *then* nou ava

annan ne bagaz pou nou kapab *take up* avek bann operater dan nou lendistri. Mersi, mersi Onorab.

MR SPEAKER

Mersi. Onorab Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Onorab.

Minis mon pou komanse par felisit ou avek ou lekip pou sa bon travay ki zot pe kontinyelman pous Sekter Touris. E sa i fer nou vwar nou menm ki lafason ki zot pe ede pou retourn reveni dan pei.

E mon pou koz lo travay, lo *casual basis* ki ou ti nonmen dan ou *Statement*. Byensir tou letablisman, touris pou li marse, nou bezwen travayer ki vreman konpetan, serye, responsab e pare pou travay.

Ler ou'n koz lo *casual basis* Minis, sa in vin dan mwan akoz mon'n annan plizyer ka ki'n vin devan mwan, kot bokou nou bann Seselwa ler i al travay dan bann Letablisman Touristik, laplipar zot, zot ganny met lo en 6mwan e sa se *casual*. Zot pa ganny anploye deswit.

E sa *management* lotel i menm dir zot ki apre 6mwan zot pou ganny anploye. In fini met sa dan zot lespri. Bokou

sa bann dimoun i donn tou Minis, akoz zot anvi travay, zot fer en fason pou zot pas zot 6mwan.

Me apre sa 6mwan ler zot apros sa *management* i dir zot ki zot pou bezwen prezan, fer aplikasyon, repas dan en lot proses *interview*. E sela kot sa bann keksoz i ganny dekouraze, akoz laplipar zot, zot pa ganny konsidere.

Pou mwan letan mon pe regarde, eski zot annan en lot fason fer. Kot ler en dimoun i vin rod en travay, ou'n promet li ki apre 6mwan nou pou pran ou, apre zis ou, ou deside ou dir li, be non ou pa pou reste.

E mon santi ki sela, kot prezan nou pri kot bokou etranze i antre. Eski i annan okenn plan, okenn keksoz ki zot pe mazin fer lo la pou nou donn sipor nou Seselwa? Akoz i annan Seselwa *out there* ki vreman anvi travay. Me se lafason ki zot ganny trete, zot *fail*.

Mon dezyenm kestyon Minis, an relasyon ant Departman Tourizm ek Lendistri Tourizm vizavi, bann etidyan ki pe *study* pou *management* kot STA, eski zot annan en plan detaye, ou en plan siksesyon pou ranplas bann etranze lo nivo *management*, *once* sa bann etidyan in fini konplet zot letid? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Onorab lo ou premye kestyon, mon a fer bann komantr zeneral. Me ou a konpran ki, tou sa ki konsern kestyon lanplwa, i an deor vremen mon responsabilite.

Me mon a dir ou ki mannyer mon vwar keksoz. Ki annan serten anplwayer Sesel, pa selman dan lotel, dan diferan sekter ki esey kas kontour pou rod tou posibilite pou anploy en non-Seselwa. I annan.

Donk se sa bann prosedir, se sa ki fer ki ozordi dan Minister Lanplwa, i annan sa bann prosedir ki nou bezwen swiv. Pou fer sir ki kot i annan en Seselwa ki kapab e ki oule travay, i ganny sa sans. Me selman ler napa, ouswa en Seselwa pa oule travay, ki la zot kapab ganny lotorizasyon pou anmenn en etranze.

Lo mekanizm ki servi, dan diferan letablisman pou met dimoun lo lalis. En *sort of waiting list, casual* ensidswit. Sa mon pa konnen. Mon vremen pa konnen. I en lenformasyon ki mon pe tande la.

Dan mon *Statement* bomaten mon'n fer referans lo bann ka kot ler i arive, kot en

dimoun in *casual* i ganny ofer en pos permanan. I annan dimoun dan *casual* ki dir non, i prefere reste *casual* pou son laliberte mouvman. Son laliberte travay si oule, si i pa oule. Vini ler i ale, vini ler i oule, ale ler ale, vini ler i oule e ale osi ler i oule.

Mon pa konn sa bann ka partikilye, me si i annan i en keksoz ki Minister Lanplwa i a bezwen adrese. E mon a *take that up* avek mon koleg, Minis Francourt, pou mwan atir son latansyon lo la.

Lo kestyon *STA*, e *succession plan* mon krwar nou annan en bon pe travay pou fer, poudir ou onnetman. Nou annan en bon pe travay pou nou fer.

I annan plis ki en santenn dimoun, en santenn ansyen etidyan ki'n ganny anvoye *Irlande*. A en pri enorm, pou Gouvernman, pou anvoy zot *train* dan *management*.

Dan diferan domenn, dan *management* lotel. Mon'n demann en lalis konplet avek Departman pou donn mwan en ledikasyon kote sa bann dimoun i ete.

E i kler ki en kantite sa bann dimoun ozordi nepli dan lotelri. I annan mon konpran pe travay dan konpanyen sepa lekel, lot i dan konpanyen.

En bann *areas*, en bann *field*, ki pa dan *field* pou lekel zot al *train*. So i vreman, i bezwen annan en problem la. Mon'n demande pou annan en miting avek tou sa bann dimoun ki'n al *train Shannon*, pou mwan zwenn zot *one-on-one*. An group dabor, apre *one-on-one* pou mwan konpran bann *challenge* ki annan.

Mon bezwen dir ki i annan bann letablisman touristik ki fer en zefor - ki fer en zefor pou *involve*, sa bann, sa bann Seselwa e komans prepar zot, donn zot promosyon responsabilite koman *Head of Department*, prepar zot pou *take over*.

Me i osi en fe ki sa i pa toultan leka. E nou bezwen adres sa, sa *issue*. Nou bezwen adrese e nou kapab adrese selman an lyezon avek sa bann *GOP* ki bann *managers* lotel i gannyen, pou fer sir ki i *link* avek en *timeline*. E avek sa ou annan en dimoun ki pe *understudy*. E ou konnen ki ler ou Kontra i fini, sa dimoun in pare pou li *take over*.

I en travay ki mon pa kapab dir ozordi nou'n *achieve* gran zistans lo la. En travay ki nou bezwen fer.

Me wi Onorab i annan, i annan sa *gap*, i annan *issues* la. E nou bezwen, nou bezwen adrese. Mon pa konnen *PS* si ou ti annan nanryen poudir lo la.

PS SHERIN FRANCIS

Non.

MINISTER SYLVESTRE RADEGONDE

Non. Mersi.

MR SPEAKER

Byen. Mersi Minis pou larepons. Onorab Churchill Gill.

HON CHURCHILL GILL

Mersi Mr Chair. Bonzour Minis ek ou delegasyon. Bonzour tou Manm e tou dimoun a lekout.

Mon premye kestyon i lo sa, '*carrying capacity*.' Akoz ou'n dir tre byento *Cabinet* pour, pour diskrit lo pou Praslin avek Mahé. Mon ti anvi met dan ou latansyon akoz mon santi i pou dezavantaze pou bann Seselwa ki anvi antre dan touristik. Akoz ou'n dir *bed capacity*, i ase bokou konpare avek to lokipasyon.

Me selman i annan bann gran lotel ki pa pou Seselwa, e en kantite lannen zot dan loperasyon. E sa bann lotel i demann fer renovasyon, e sa pa pe ganny fer. Me selman, zot *room inventory* i reste parey.

Savedir i kler ki i pa neserman si sa gran lotel i dir ou i annan 200 lasanm. Tou sa lasanm i pe vann. E ler sa *carrying capacity exercise* i

pase, si nou pa konnen konbyen ki pe vann dan sa 200 lasanm, nou kapab *deprive* en Seselwa ki anvi antre dan sa biznes avek son 5 lasanm oubyen son 6 lasanm.

Zis akoz sa gran lotel li i pa pe servi tou son lasanm. Me selman son *official declare inventory* i sa kantite lasanm. Sa i enn.

Mon dezyenm *PS* in fer sorti en pwen kot, dan letan *COVID*, nou'n gannyen biznes. Me selman sa ti an rezilta aköz bokou nou bann konpetiter pa ti ouver. Mon krwar ki i en *fair* pwen.

E prezan ki pou arive ler nou konpetiter i ouver? Mwan mon santi ki, i annan detrwa *practice* ki pe arive ozordi, i pa pou dan nou lavantaz si Minister Touris pa adrese. Par egzanp;- nou annan bann pratik ozordi, kot nou vwar bann dimoun o bor semen, pe fer serten *practice*, swa kwi manze, san, dan i pa'n ganny byen, i pa legalman ganny kouver.

E leta kot sa bann keksoz pe ganny fer, i pa apropiye. An menm tan tradisyonnelman ekskirsyon ti ganny fer lo lans. Me selman i kler ki en kliyan ler i pe alonze lo lans, i pa letan kot i devret ganny *challenge* pou ekskirsyon.

E pou adres sa, lo kote Cote D'Or nou ti'n deza fer,

plan ti'n fini ganny fer pou annan bann, bann *kiosk* ki en kliyan li si i bezwen ekskirsyon i a leve i ava kot sa *kiosk*. Si i pe *lie down*, personn pa pou vin *disturb* li.

Aprè ou'n fer mansyon osi lo zesyon salte, e sa problemn i pli aparan avek bann biznes *yacht*. Aköz bokou fwa ler zot in fini fer zot bann ekskirsyon, ler zot vini, oubyen zot bann *tour*, sa bann salte la, sa ki en problemn. Aköz zot pa al zete lo *landfill* zot. Mazorite zot, zot vin met sa dan bann bin. Ki sa bann bin i pa'n *designate* pou zot. Sa osi i en konsern.

Aprè nou annan parey ou pe dir, kot lo lans. Nou annan sa *noise pollution*, aprè nou annan bann dimoun ki anbet kliyan. E sa i annan en reperkisyon direk lo limaz pei.

Alors mon kestyon, eski petet la ozordi ou Minister, petet pa devret konsider annan en seksyon ki li i *deal* zis lo limaz pei?

E si fodre annan en *forum*, aköz pou adres tou sa bann *issues* ki nou konnen, i pa neserman zis Minister Touris. I annan bann lezot *agency*, oubyen lezot Minister ki *involve*, ki devret ganny *involve* pou ganny en solisyon.

Alors petet si ou Minister pa devret konsider, annan en *forum*, avek en striktir. Ki li i adres zis limaz pei, donner sa

bann konpetisyon ki nou pou gannyen ler lezot nou konpetiter i ouver? Mersi.

MR SPEAKER

Mersi. Mersi mon demann bann Manm pou sey limit zot lentervansyon pou 2 pwen silvouple.

Sansan nou pou, pran tou bann pwen en sel landrwa. Minis ou repons silvouple.

MINISTER SYLVESTRE RADEGONDE

Mersi Mr Speaker. Mersi, Mersi Onorab. Mon a pran ou dernyen pwen avan. Mwan plis ki en *forum* pou al repet menm zafer ki tou dimoun i konnen. Mon pa pou neserman al dan sa direksyon Onorab.

Mwan mon dir nou bezwen, vreman *hâter*. Swa Lapolis, swa annan en lotorite kelkonk, me ki ale ki met en lord enn fwa pour tou.

Ou ti avek nou pandan sa vizit, dan *weekend*, ou'n vwar dan ou distrik Cote D'Or. E Cote D'Or si nou pa fer atansyon i pe vin en *wild west*. Mon pa dir dimoun pa pe, pa pe tire, pa pe *shoot*. Me i en dezord, total. Konmsi ler mon pe dan bann, ler mon pe fer letour partou mon gro pwen konsern konmela i Cote D'Or.

Kot dimoun pe vann manze, pe kwi manze o bor semen. I en fe. Mon krwar ou'n vwar, kot nou pase o bor

semen, lanmenm ater la en dimoun i met son touk dife pe kwi son manze lanmenm la.

E kot lisyen pe pase, masin pe pase ek lapousyer ek tou, ek tou. E son plan se evantelman al vann manze.

Sa bann dimoun pe vann zot fri o bor semen, legim. Mwan mon napa tro problemm avek mwan sa bann zafer. Mon krwar i byen ki Seselwa pe debourye, mon prefere sa ki ale al fatig touris al vol touris

Me zot bezwen annan en lankadremman pou fer li. Zot bezwen annan en lankadremman ki kler, ki respekte bann norm lasante. Konpran?

So mwan mon plis pou sa Onorab. Donk 50an nou dan sa Lendistri Touris. Nou'n travay ansanm Praslin Beach nou, *many years ago* nou ti ankor bokou pli zenn.

Be ogard la distans ki nou'n arive. E sa bann *issues* ki la, nou ti pe koz lo la *back in the early '80s'*, ler nou ti bann zenn, dimoun pe travay. Nou ti, anfen pli zenn. Nou ankor zenn, en pti pe pli zenn.

Ou konpran. Mwan mon dir annou ase koze, annou azir. E pou azir mon dir ki Lotorite, i bezwen met son lipye ater e *deal* avek. E sa i en diskisyon ki mon pou gannyen, mon pe gannyen avek mon koleg Minis Zafer Entern.

An sa ki konsern Cote D'Or, pou enn fwa pour tou met en lord dan sa landrwa. Parske i pe fer ditor Praslin, i pe fer ditor Sesel. So si pou annan en *forum*, se *forum* sekirite ek lord ek lape. Sa i mon, mwan pwennvi. Lo zafer lasanm *room inventory*. Mon toutafe dakor avek ou. Nou napa lentansyon nou, zis ale avek en papye avek en rekomandasyon kot *Cabinet*. I en diskisyon ki nou pe annan antre nou entern, pou nou vwar en lankadremman ki mannyer nou ale *going forward*.

Parske i kler ki, nou pa pou kapab kontinyen lannen, apre lannen aksepte nouvo konstruksyon, aksepte *change of use*, met ankor en lasanm ankor plis lasanm, ankor *guesthouse* en pti pe partou, *self-catering* dan tou kwen zil partou.

E en bann pa ditou lo standar ki zot devret ete, ditou. Nou bezwen aret en kou, fer en poz. Annou adres sa bann *issues*.

Mon personelman sa ki mon ti a voudre. Ki sa bann lotel zisteman ki akoz zot laz, zot leta, zot pa pe kapab vann tou zot lasanm. Mon ti a voudre ki, nou kapab annan en Lotorite konmela ki nou napa. Dir bannla al aranz ou lasanm, *bring up* ou standar, apre sa nou a kontinyen.

Mon ti a voudre se sa. I pa selman Praslin, i isi Mahé osi i annan enn de lotel, ki mwan mon ti a voudre zot ti kapab sorti dan sa bann - dan nou, dan nou lenvanter lasanm la. Ale al aranz zot, *bring zot up to standard* apre *carry-on*.

So sa ki mon kapab dir ou Onorab se ki, sa rekomandasyon ki nou pou fer pou *Cabinet* i pou en rekomandasyon reflesi. Nou pa pou ale zis an brit an ban koumsa, al fer li koumsa. Nou a pran tou sa bann diferan konsiderasyon, an bann diferan pwen an konsiderasyon. Mersi.

MR SPEAKER

Mersi Minis. Onorab Labonte.

HON ANDY LABONTE

Mersi Mr Speaker. Bonn apre midi Minis avek *panel*. Minis mon anvi komans par dir bonn fet *Tourism Week*, tou pep Seselwa, parey ou'n dir i en lendistri ki vremen enportan.

E mon vremen apresye sa program bomaten dan Bonzour Sesel ki madanm in prezante. I vremen edikasyonnel, i ankourazan. E mon vremen apresye par sa *Statement* ki ou'n fer.

Me selman mon *still* annan en konsern malgre ki ou'n dir *Minister*, poudir kot i konsern lanplwa i en keksoz ki

konsern lanplwa, bann dimoun ki travay dan *tourism* se Minister Lanplwa ki merit responsab zot.

Me selman ou koman Minister pou Tourizm, akoz mwan mon en dimoun ki'n, ki sorti dan *tourism industry, right?* Ozordi mon dan Lasanble me *still* mon leker i ankor laba.

E mwan mon santi poudir ler en touris i vin Sesel zot anvi ganny servi par Seselwa.

E bokou Seselwa la deor, malgre i annan en tre pti minorite ki pa pe delivre, i bokou ki delivre e i annan sa lanvi, ki ankor pe donner.

Me selman toultan, pandan sa dernyen 20an mon kapab dir, nou bann travayer dan *tourism industry* pa pe gannyen sa ki zot merite.

E zot santi ki etranze ki vini, i ankor pe ganny priyorite par devan nou. E mwan mon'n eksperyans sa. E mon'n lager toultan e mon ankor pe lager pou sa, e mon pou kontinyen lager koumsa.

So ki mon ti a kontan demande, eski ou Minister i ti kapab rod en fason, pou travay avek Minister Lanplwa pou petet get dan *welfare* travayer Seselwa *in term of* petet annan en *Scheme* spesyal, parey in ganny dir oparavan.

Ler sa bann dimoun i vini, ler zot anploye zot ganny menm saler ki en dimoun pe travay Lendi a Vandredi. So i pa ankourazan.

So ki zot kapab fer vreman, pou ankouraz nou zenn e petet ekout zot osi? Parey ou'n dir ler ou'n fer vizit ou pa'n ganny sans koz ek zot lo en baz endividuelman. Petet annan en biro *or I don't know*, kot nou kapab tann en pe nou travayer. So mon krwar lo sa baz ki la, i ase kler.

Apré mon dezyenm kestyoni en pe al lo laliny ki Onorab Churchill Gill in al lo la. Li in dir en *forum*, mwan mon poudir plito en biro. Parey nou konnen i annan sa Biro Lenformasyon. *Right?*

Ler nou pe get dan *Tourism Industry* la, i vre i annan en kantite, touris i vini pou li depanse. Me ler i pa pe ganny valer pou son larzan i en pe a dout. Menm tou dernyerman pandan dernyen 10an avan ki mon vin dan Lasanble, mon ti en *taxi driver, ok?*

Yer, ou avantyer en touris fek ganny vole. Mwan mon pou apel sa en vol. Sorti lo Erport pou li ariv kot *Jetty Inter Island Quay* i ganny sarze R1000. *Right?*

Apard sa R1000, sa i responsabilite sa drayver pou fer sir ki sa touris i tir tou son keksoz dan sa *taxi. By mistake*

e mon krwar, e mon krwar Bondye osi ki'n ede, sa touris i oubliy son *mobile* dan sa *taxi*, ler i oubliy son *mobile* dan sa *taxi*, i ganny kontak avek sa *taxi driver*, sa *taxi driver* i sarz li *extra* R300 pou retourn son *mobile*.

So ler bann lensidan koumsa i arive, konmsi eski nou ti kapab annan en biro. E mwan mon pe demande ki sa *taxi driver*, ka i ganny pran avek li serye e *Licensing* i okouran lo la.

E mwan mon krwar i responsabilite *tourism* osi pou nou fer sir, nou *follow-up* lo sa bann *case*. So ki mon pe sey demande, annan en biro swa apel li en Biro Konplent, en Biro Lenformasyon.

Me selman ki kapab ler en lensidan koumsa i arive, avan ler ki sa kliyan i ariv deor pou met li met en vilen zimaz lo nou lendistri. Sa *case* i ganny *deal* avek i santi li *happy*. So mon de kestyon i baze lo la.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Mersi Onorab. Onorab mon tann ou, nou lo menm paz nou. Si mon'n donn lenpresyon konmsi ki problemm travayer Seselwa, i pa mon problemm, i

pa problemm touris, i problemm Lanplwa. Mon eskize.

Par sa ki mon oule dir mwan, mon le dir ki i annan bann *issues* ki vremen i konsern Lanplwa. Me i pa anpes nou, si nou okouran trouv en mekanizm pou nou travay ansanm. Lo sa ki konsern bann pwen legal sirtou *terms and conditions of service*.

Kot bann *issues* i ganny anmennen kot nou. E la mon le pran ou pwen lo zafer bann, bann travayer ki riske, ki kapab annan kek konplent.

E mon'n dir sa avek Onorab Mondon pli boner ler nou ti pe koze deor. Travayer pa devret espere ler Minis i vin, i vin lotel. Parski Minis i kapab pa zanmen pe pas lotel. Demann en apwentman ale, al kot lotorite *point out issues* e ler dimoun i vini, nou toultan *take up*. Nou toultan *take up*.

Dan la mezir ki nou responsabilite Lalwa i permet nou fer, nou fer li.

Onorab ou fer, ou fer en pwen lo *taxi*. Sa bann lensidan koumsa la pe arive toulezour sa, pe arive toulezour. Nou problemm se ki i annan bann lankadreman, i annan Lalwa, i annan regilasyon ki kontrol tousala.

Nou gro problemm Sesel dan tourizm parey ayer dan lezot sektor, se ki

lenplimantasyon. Napa! I annan en kantite tapaz, tanbour me napa, napa ledan, pa morde.

So dan ka *taxi*, ou lezot konplent ki touris i annan, Mwan mon dir nou pa bezwen en biro parske sa in ariv anvil. Si ou met en biro anvil ou bezwen met enn Anse Royale, ou bezwen met en La Digue, ou bezwen ... Ou konpran mwan?

I annan mekanizm la kot dimoun i kapab raporte. Dan sa ka, mon ti a kontan *offline* ganny detay. Mon pa konnen si in ariv kot nou, si pa ankore ariv kot nou mon ti a kontan ganny detay. Parske sa i en lipye ki nou pe met ater avek *Licensing*. In ler pou nou azir.

Bann dimoun koumsa i fer ditor lendistri. I fer ditor destinasyon. Sa *taxi driver* pa devret dan sa biznes, a mon avi. So si mon ganny lenformasyon, nou a fer lanket, nou a rode avek *Licensing*.

Parske *tourism* napa pouvwar pran *license*. Me *Licensing*, nou a fer en reprezantasyon tre for, pour sanksyon ganny pran avek sa *taxi driver*.

MR SPEAKER

Byen mersi. Wi.

HON ANDY LABONTE

Leklersisman Mr Speaker.

MR SPEAKER

Wi. Ale vitman Onorab. Mon annan lezot Manm ki pe atann.

HON ANDY LABONTE

Yes, Minister mon byen apresye ou larepons e ou lantouzyazm, pou adres sa bann *issue*. Mon pou donn ou sa bann lenformasyon apre *offline* parey ou'n dir.

Me selman parey mon pe dir, vi ki nou en nouvo Gouvernman, mon ti a swete ki toudswit bann travayer la deor, i ganny sa lenformasyon poudir wi Minister i pare pou ekout zot.

Me petet annou annan en pe pli, latransparans dan ki fason zot kapab vremen *reach out* pou fer zot konplent lo sa baz koumsa. Mersi.

MR SPEAKER

Mersi. Mersi Onorab. Onorab Labrosse.

HON RICHARD LABROSSE

Mersi Mr Speaker. Bonzour Minis ek ou delegasyon. Bonzour PS, bonzour Mrs Bernadette, en zanfan Belvedere, en zanfan Plaisance, kontinyen sa zoli travay ki ou pe fer dan sa Minister.

E Minis mon kapab dir ou sa avan mon demann mon kestyon, ki mon vwar ki ou

Minster pe mars ase vremen vit ki bann lekspektasyon deor.

Lakantite touris ki pe antre, i montre ou ki ou annan bann dimoun kalib akote ou. E sa nou dir ou felisitasyon. Minis mon kestyon, mon'n asize mon'n ekout ou atantivman.

Me sa ki vin dan mon lespri la mwan, i konsern bann zenn. Nou'n koz bokou lo travayer, nou'n koz bokou lo lanplwa, nou'n koz lo bann reminerasyon ki zot devret pe gannyen.

Mon kestyon i konsernan Lakademi Touris. Tou le lannen nou war en *batch* etidyan ki ganny *graduate* dan diferan domenn. Sa i enkli dan sertifika, mon pa pe koz bann ki lo nivo avanse la en?

Me ki nou pe vwar, nou pa pe vwar zot pe al, pe ranplas sa bann etranze pe rod, pe *advertise* dan Nasyon tou le zour.

Selman mon ti a kontan konnen la avek sa nouvo lankadremman ki mon war ou pe antre ladan ek sa lankourazman, konmsi ki plan ou Minister la pou zot kapab ganny sa dyalog?

Sirtou kekfwa parfwa avek sa bann etidyan avan zot fini *graduate* ler zot pe al dan lendistri. Sa i mon premye kestyon.

Apré mon dezyenm kestyon, mon konnen la deor i annan bokou zenn ki annan lentere pou fer en biznes dan lendistri touris.

Swa ler zot al kot *SIB*, mon dapre ki mon pe ganny en konpran, kekfwa i annan bann swa i dir zot non, ouswa, konmsi non i vin en keksoz laba, mon pa konnen.

Me dan sa ka, eski ou Minister i annan en Departman *or* en lorganizasyon dan ou Minister, kot la bann dimoun ki annan lentere pou antre dan Tourizm koman en biznes, zot kapab ganny bann gidans ouswa bann *guidance* pou zot avans pli devan? *Thank you.*

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker, mersi Onorab. Onorab mersi pou ou bann roz antik ki ou'n annan avek anver nou. E se vre, mon annan, mon ganny antoure par en lekip solid.

Ki bann madanm i an mazorite dan *Tourism* ozordi. E mon konnen ki Mrs Willemine in zwenn nou. Parey zot konnen nou annan plizyer lannen leksperyans *marketing* enternasyonal, in Direkter nou biro Lerop.

E mon ki'n avek sakrifis osi ankor enn ki'n deside kit son fanmir Lerop, in vin isi pou vin fer sa travay ki nou annan. Mon kontan ki nou annan osi Mr Paul Lebon ki ti dan prive.

E napa personn ki kit prive, ki panse i pe ganny en meyer lapey dan Gouvernman. So i osi i en lot ki pe fer sakrifis pou nou pous en travay kolektif ki nou bezwen fer nou tou pou pous sa lendistri, pous nou pei pli devan.

Mon tann ou konsernan, koman konsernan bann *graduate* ouswa bann manmay ki sorti *STA*.

I annan en *challenge*, mon bezwen aksepte lanmen anler pou dir ki mon krwar pa si nou'n fer ase travay pou fer sir ki;- enn, bann manmay ki kit *STA*, zot vreman ganny ankadre lankourazman neserer, sipor neserer pou zot reste dan lendistri.

Parske nou trouve sa ki nou konnen, se ki en kantite pa reste. Zot fer zot *course*, zot sorti avek en sertifika. Zoli *NASYON*, televizyon ensidswit. Detrwa mwan apre ou trouve ki zot in *move on*.

I bezwen annan en problem. Swa problem ti konmans depi avan, ki tourism pa ti zot zafer *anyway*, zot in fer li ki ou a fer.

Ouswa in annan keksoz dan zot parkour profesyonnel,

ki fer ki zot panse zot pa devret reste. Sa nou bezwen fer en travay profon pou nou vwar ki pe arive.

Donn zot lankourazman, sipor, pou zot reste, me pa selman reste, pou zot osi progrese dan zot karyer. En dimoun ki'n fini *course* i pa oule al *front office* pou leres son lavi.

I oule kapab *rise in the ranks* pou li evantyeleman ariv en pozisyon *management*, *why not*. So sa i en travay ki nou pe fer, ki nou'n komanse fer. I a fer parti tou sa ki mon'n fer referans dan mon *statement*.

Lo sa *manpower needs* Lendistri Tourism. E tou bann mayon dan sa lasenn pou nou *attend* sa lobzektif ki nou oule.

Lo bann Seselwa, ou'n koz lo *SIB* se sa, si nou annan en seksyon spesifik dan *tourism*? Mon a pas avek *PS* pou adres sa issue bann zenn ki annan laspirasyon, ki annan lide biznes, ki mannyer nou ed zot.

MR SPEAKER

Yes PS.

PS SHERIN FRANCIS

Mersi Mr Speaker. Pou dir si nou annan en seksyon spesifik dan Departman pou donn sa kalite gidans e sipor, mon pa pou dir en seksyon spesifik.

Me selman nou seksyon ki get prodwir, ki pe ganny *headed by* nou DG ki la a kote mwan.

Nou annan en lekip ki nou pa ofer sa servis zis pou en zenn, me nenport ki anvi antre dan Lendistri Touris, zot bezwen gidans, zot bezwen sipor, zot bezwen konpran ki, kwa ki zot bezwen fer.

Si zot vin kot nou, nou pa pou zanmen refize pou donn zot sa sipor. E mon konnen osi *SIB* i fer parey.

Me selman pou nou spesifik pou Lendistri Tourizm, si ou annan en lide, ou anvi devlop li plis, ou pou demann en miting *either* pou war mwan, ouswa pou war DG, ouswa pou war nou Direkter dan seksyon.

Nou pa pou zanmen refiz-e pou vwar en dimoun pou donn sa sipor. Bann *staff* i, bann *staff* in ganny *train*. Zot konpran byen bann prosedir e kwa ki ou kapab fer, kwa ki ou pa kapab fer par egzanp.

E ki si i annan en keksoz ki ou pa kapab fer, nou sey rod fason ki mannyer nou kapab ankouraz ou dan direksyon kwa ki ou kapab fer.

E nou osi donn sipor ler ou'n fini annan ou prodwir, ou'n ganny ou *license* par egzanp, ou'n komans ou pti aktivite touristik.

Nou annan *platform* ozordi ki donn ou sa posibilite pou ou vin vizib *online* osi tou. Nou annan en *platform* ki nou fek lanse la ki konekte ek nou *website* avek lezot *platform* nimerik.

Ki donn ou sa posibilite pou ou *market* ou leksperyans, ou aktivite *or* nenport ki laliny dan sa Lendistri Touris ki ou anvi komanse.

So pou bann ptipti ki'n deza lanse ki pa ankor apros nou pou *feature* lo sa *platform*, pa ezite kontakte nou, kontakte nou lekip nou ava donn zot plis detay. Mersi.

MR SPEAKER

Mersi *PS*. Onorab Vidot.

HON AUDREY VIDOT

Mersi Mr Speaker. Bonzour Minis, delegasyon e tou Manm Onorab. Minis, apard ki met plis lanfaz lo formasyon lo bann zenn kot Lakademi Touris, eski ou Minister an partenarya avek Lanplwa, zot in deza komans zwenn, oubyen zot anvizaze zwenn bann lorganizasyon non-gouvernmantal ki pare pou ed Sesel pli byen ankadre nou bann zenn?

Pou zot kapab donn zot bann formasyon. Apre osi pou zot kapab ganny ase *training* ki pou permet zot kapab ranplas en etranze dan en lorganizasyon touristik?

Dezyenm, eski - mon konnen zot in konmans, Gouvernman in konmans enplimant reform. Me malerezman i ankor annan mankman dan kreasyon bann loportinite lanplwa. Par egzanp i annan - pli boner bann Manm in fer resorti konsernan bann *trail*.

I annan dimoun ki bann endividi ki i annan lentere. Ki zot pe rod akse finansyel atraver petet en pti *loan*, aste zot lekipman, repar serten sa bann *trail* avek en lagreman avek Gouvernman, ki zot kapab apre zot kapab apre zot kree bann program, anmas en reveni, e ki sa i tir sa *burden* petet lo Gouvernman.

E zot, zot war en loportinite pou zot kree lanplwa e osi resevwar en *income*. E ankouraz, pa zis pou touris, me osi lo nivo lokal, pou pli byen mentenir sa bann *trail*.

Akoz i annan dimoun ki servi, me zot pa kit li prop, oubyen zot negligans, zet bann *litters*. So petet sa osi i a ed sa dimoun kapab pli byen *manage* sa bann landrwa, e kree plis bann loportinite biznes. Mersi.

MR SPEAKER

Mersi Onorab. Minis wi.

MINISTER SYLVESTRE RADEGONDE

Mersi Mr Speaker, mersi Onorab. Onorab an sa ki konsern *training* bann zenn, nouvo Direkter depi ler in vini, Mr Terrence Max, in vin nouvo Direkter *STA*, i enn son bann priyorite ki in fer.

In revwar sa program *training*, e sa ki i pe fer se *involve* bann dimoun ki deza dan lendistri, ki annan leksperyans, ki annan konesans, *involve* zot dan - aktyelman *delivery*; konman *lecturer*, konman *guest structures*.

E i osi pe servi zot, zot bann letablisman pou anvoy manmay lo *attachment*. Sa i en program ki'n komanse e nou pou kontinyen. E se sa osi en, menm metod osi ki mon'n servi dan Departman Touris.

Ou a trouve ki otour mwan dimoun ki konn biznes touris, ki kapab koz lo la. Mr Lebon in dan enn de *MC*, i konnen, i kapab koz lo touris, lo kestyon sekter prive ki manner i pe ale.

Mrs Willemine in osi dan *marketing* parey *PS* isi. Menm latid, menm keksoz ki nou pe fer avek *STA*, servi leksperyans dimoun ki dan *trade* pou ede *train*, e donn zot loportinite *attachment* dan bann letablisman touristik.

An sa ki konsern akse pou *funding*, malerezman, mwan koman Minis Touris,

ouswa even Departman Touris, nou annan tre pe *say* ladan.

Nou konnen ki i annan bann kontrent. Nou konnen ki i en fe ozordi ki bann lenstitisyon banker i en pti pe pwa, ler i ariv donn *loan* pou bann proze touristik.

Zot panse ki, malgre i annan en lalimyer, malgre touris in konmans rebran, i pa ankor rebran ase pou donn zot sa konfor ki lenvestisman zot, anfet ki larzan ki zot prete zot pou gannyen demen.

Zot toultan panse ki en dimoun i vini i pran en *loan* pou al komans en proze touristik, apre i fware, aköz touris i aret vini, pa vin ankor, ouswa pa vini sifizaman.

Biznes pa marse, zot pou pran letan pou ganny zot larzan, ouswa pa ganny ditou. Vwala.

Malerezman Onorab, nou annan tre pe kontrol lo la. Mwan mon annan tre pe kontrol lo la. E Gouvernman osi. Gouvernman napa kontrol lo bann labank prive.

E mon krwar zot in swiv, zot swiv lentervansyon Gouverner Labank yer swar, Labank Santral, zot a vwar konmsi ki bann *challenge* ki i annan.

E nou sa ki nou kapab fer se *highlight*, fer konpran, be vwala i annan en *challenge*. Nou ti a kontan i sanze, nou

pouvwar fer lo o konmela nou napa. Mersi.

MR SPEAKER

Mersi Minis. Onorab, Onorab Vidot vitman silvouple. Aköz nou pe *run out of time*. Ale Onorab Vidot klarifikasyon.

HON AUDREY VIDOT

Mersi. Dan mon premye kestyon Minis, ou'n tous plizoumwen lo nivo zot kot Minister, zot bann profesyonnel.

Mon pe koz ou bann dimoun ki'n deza annan leksperyans dan *tourism*, pou plizyer lannen, i annan ki'n *teach*.

Ozordi i annan zot ki annan bann lorganizasyon non gouvènmantal. Zot anvi antre dan bann - zot pe konmans bann program pou zot kapab ed pei atraver ed nou bann profesyonnel.

Be it ki i annan ki deza dan lanplwa, oubyen letan zot sorti kot Lakademi Touris.

Eski zot in komans zwenn sa bann group dimoun, pou vwar kwa an plis ki zot kapab travay ansanm, pou fer sir ki nou ed sa bann dimoun, sa bann Seselwa ranplas sa bann etranze? Lo sa laliny ki mon ti pe rode.

MR SPEAKER

Mersi, mersi. Minis ou ava adres sa briyevman silvouple.

MINISTER SYLVESTRE RADEGONDE

Mersi Mr Speaker. Si mon konpran byen ou pe dir ranplas bann etranze dan ban letablisman touristik, *ok?*

I repran, Onorab i repran kestyon, anfen en kestyon ki mon'n reponn pli boner konsernan sa *succession planning* ki bezwen annan, ki i annan travay ki nou bezwen fer.

E mon pa krwar nou'n fer ase. I en travay ki nou bezwen pourswiv, pou vreman annan en kad ki kler. Konpran ki ler i annan etranze, konbyen letan sa etranze i la, prepar en dimoun *at the back*.

Ki en mannyer ki dan en *time* spesifik, dan en letan spesifik, ler sa etranze i fini, or i ale, mon fer sir ki i ale a lafen son peryod, en Seselwa i pare pou pran. Mersi.

MR SPEAKER

Mersi. Onorab Letourdie.

HON JANY LETOURDIE

Mersi Mr Speaker. Bonzour tou dimoun. Mr Speaker sa ki mon ti a kontan dir, se ki mwan mon apresye kontribisyon, aköz mon vwar ki Gouvernman pe met en

lirzans pou atrap Lendistri Tourizm.

Zis detrwa boner sa mwan, *Leader* bann Zafer Gouvernman ti anmenn Mosyon pou rektifye *Framework lo Ethics e Optional Protocol*. E bann pwen ki ti ganny sorti, se zisteman bann keksoz ki nou fer ki swa nou pe lev limaz nou pei, oubyen abes limaz nou pei.

Alors mwan sa ki mon ti a kontan dir, se tourizm parey Minis in dir, i konsern nou tou endividuelman, aköz i konsern vreman nou vant ek nou *gagne-pain*.

E alor parey granmoun i dir, nou pa met later dan nou lasyet manze e tou sa ki nou fer i enportan.

Minis, nou lar avek nou tradisyon, i zwe en rol vreman, vreman enportan anver promosyon nou Sesel. E alors, i annan en group travayer la deor ki apel zot artis.

Eski i annan en plan, oubyen en plan spesyal, oubyen bann konversasyon ki pe ganny fer pou redinamiz partisipasyon, kontribisyon e osi kree loportinite *gagne-pain* pou sa bann kategori dimoun ki apel artis? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker, mersi Onorab. Larepons kourt se wi Onorab. I annan en plan, e parey mon'n dir ou i annan serten keksoz ki mwan mon ti a voudre nou kapab komanse la toudswit fer li.

Me nou lanmen i anmare par bann kontrent sanniter ki nou annan. Me i annan lezot ki nou bezwen prepar en pti pe plis. I annan diskisyon ki nou pe fer.

Mon'n zwenn a detrwa repriz e mon pe zwenn Anbasader Victor ankor demen, pou nou zisteman diskite lo sa bann diferan stratezi plan pou nou met an plas.

Wi 100 pousan mwan mon pe pous *cultural tourism*, *involve*, *involve* nou bann artis, *involve* nou bann dimoun dan sosyete.

Pou nou fer sir ki kiltir Sesel, tradisyon Sesel, i ganny met devan dan tou aktivite touristik ki nou fer. Mersi.

MR SPEAKER

Mersi Minis. Onorab Cosgrow, e i a swiv par Onorab William si ou kapab met ou pare.

HON WALLACE COSGROW

Mersi Mr Speaker. Bonn apre midi Mr Speaker, bonn apre midi Minis avek tou delegasyon.

Mon ti anvi koz en pti pe lo disparite ant lapey travayer avek etranze dan Sekter Tourizm, sirtou dan bann gro lotel. Me mon krwar nou'n egzoz en pti pe sa topik, mon krwar nou'n koz en pe lo la.

Mr Speaker mon annan 2 kestyon. Premye i an relasyon avek lefe ki ladministrasyon avan pou en pe letan in demokratiz en pti pe sa sekter kot in, kot in annan bokou, bokou Seselwa ki'n antre dan sa sekter ki'n kree bann pti letablisman, e ki zot in ede grandi en pti pe lakantite touris ki vin Sesel, lakantite an term nimero touris ki vin Sesel.

Me selman Minis mon'n tann ou dir dan ou *Statement* ki nou pe met en moratwar, nou pe revwar en pti pe lo lakantite lili, lakantite lasanm ki nou annan.

E mon santi petet Minis ki sa i pou fer - i pou gard pri en pti pe destinasyon en pti pe anler. E ki nou pou atrakte en pti pe plis bann touris, parey nou dir odeganm.

E ki riske a detriman sa bann pti letablisman ki ozordi in ganny etablir e ki pe osi ede ed zot Seselwa, ki pe osi ede pou anmenn en pe plis larzan dan pei.

So Minis, eski, ki ou panse lo sa ki mon pe dir la? Eski zot Polisi pe al dan sa laliny?

Dezyenm Minis, nou konnen poudir *Air Seychelles* plis ki en 30enn lannen, pe al dan 40enn lannen, *Air Seychelles* in ede enormeman pou soutenir nou sekter tourizm isi.

E *Air Seychelles* in, si ou oule o sant, pou en pe letan o sant nou sekter tourizm kot in ede anmenn bann touris Sesel e ouver enn de marse petet kot ti neser pou nou al ouver.

Ki pozisyonman Minister ozordi an relasyon avek ou bann partner byensir? Akoz *Air Seychelles* pa tonm anba ou.

Me ki pozisyonman Minister Tourizm ozordi an se ki konsern *Air Seychelles* e lenportans *Air Seychelles* dan sekter tourizm ozordi. Mersi Mr Speaker.

MR SPEAKER

Mersi Onorab.

HON WALLACE COSGROW

Apré Mr Speaker en Mrs Michelin Henrietta Bradburn i dir mon dir ek Minis i regretab ozordi nou pe selebre Lazournen Touris.

Me non *former President* Sir James Mancham pa pe ganny nonmen koman en dimoun ki'n ede dan devlopman tourizm Sesel.

MR SPEAKER

Minis. Minis a not sa. Minis ou repons silvouple.

MINISTER SYLVESTRE RADEGONDE

Ok, alright. Mersi Mr.

(Interruption)

MR SPEAKER

Order! Minis ou repons *please.*

MINISTER SYLVESTRE RADEGONDE

Mersi Mr Speaker, mersi Onorab. Mon a pran ou dernyen pwen Onorab konsernan Mr James Mancham. Se sa, Sir James Mancham.

Sir James Mancham in ganny onore, i annan en plak dan *Pioneers Park La Misère*. In deza la.

(APPLAUSE)

MINISTER SYLVESTRE RADEGONDE

So Mrs Bradburn i a kontan pou konn sa. An sa ki konsern *Air Seychelles*, Mr Speaker, an sa ki konsern *Air Seychelles*, Onorab i a note ki se pa sa Gouvernman ki ti ouver, "*Open the skies!*"

Ler lesyel in ganny ouver pou tou dimoun vini, i vedit ki bann *Airline* ki pli for, ki annan plis mwayen in ganny

sa *share market* ki zot annan ozordi.

Mon pa oule al lo sa ros glise pou al diskrit *case Air Seychelles* la. Me selman ozordi sa ki mon kapab dir ou, e la konmsi mon pa pe fer zizman lo abilite *Air Seychelles*, ou non, mon pe dir ou en fe koman i ete ozordi.

Bann kliyan ozordi ki pe ganny transporte Sesel, i an gran parti par bann lezot *Airline*. *Air Seychelles* son poursantaz marse ozordi i minim. Mi..nim!

I annan serten vol ki vini sorti dan destinasyon - semenn pase par egzantp, mon krwar or semenn avan, mon pe regarde. *Whereas* diferan *Airline* pe vini avek 90, 100 ekek pasaze. I annan 2 fwa dan 2 zour, *Air Seychelles* i sorti dan en destinasyon avek 4 pasaze. Konmsi...?

Me konpran mwan byen, mon espere mon pa pe ofans person, sertenman pa *Air Seychelles*, i pa mon lentansyon. Mon pe dir ou, mon pe konstat en fe.

An sa ki konsern bann letablisman Onorab, mon pa *deny* lefe ki dan bann lannen ki'n pase, i annan bann dimoun ki'n vini, *change of use* en kantite.

Bann lezot ki'n fer konstriksiyon, ki'n ganny posibilite al dan sa biznes

touris. Ki pe fer byen ozordi ki mon kontan.

Me mon bezwen dir e ou ava aksepte avek mwan, ki i annan en kantite ka osi, kot nou'n erit en bann latet fermal.

E mwan mon'n erite, petet mon predeser avan i pa ti kapab fer tapaz lo la. Mwan mon kapab dir ozordi, akoz mon pa'n, mon'n annan, mon'n napa en par ladan.

I annan en kantite latet fermal, i annan dimoun ki'n ganny donneren *license* ki pa ti devret *à mon avis*. I annan en kantite letablisman ozordi ki mon krwar zot pa devret dan sa biznes touris. Pou plizyer rezon, nou pa pou al ladan. Me plan *moratorium* se pa pou konmsi tir dimoun al *focus only*, selman lo odeganm.

Pa sa, mwan mon pe dir, eski par en refleksyon nou bezwen fer, annou dir, be bon, eski nou bezwen kontinyen annan dan tou kwen Mahe, dan tou kwen partou dan tou vilaz annan en pti *guest house*, ouswa nou *focus* lo detrwa *guest house* o standar.

E avek sa standar ki zot annan kapab atir kliyan ki pey zot plis. E reveni pou pei i vin plis. Sa mon kestyon.

E *moratorium*, sa ki mon kapab garanti Onorab, se ki i pou, wi, anfen, nou toultan *fair, as fair as possible*. Mon pe get bann *statistic* la. Ou

konnen dan bann gran lotel, gran lotel lo Mahe, mon pe zis kot Mahe la, mon pe get Mahe.

I annan 10 gran lotel, lo bann *guest house* ki pou Seselwa, *guest house* - I annan 274, *ok?* (Non, *room* sa, pardon, *rooms*, non-non, i korek.) E bann *self-catering* nou annan 1700.

Ok, lasanm pardon, lasanm. Se gran mazorite ozordi, nou prodwir, mon krwar apepre 60poursan. Prodwi ozordi, nou *bank* lasanm ozordi i sorti dan bann *guest house*, bann pti lotel.

E sa i en fe ozordi, i pa nou plan, pas en leponz efase. Nou dir nou bezwen lev standar, anmenn zot la, ki zot kapab zot menm zot ganny en reveni pli o e pei osi pa la menm lokazyon ganny en kalite touris ki o, pou pa ganny vini dimoun avek *backpack* ki debarke pe al dan en pti lotel 50Ero.

Mon krwar pa viziter 50Ero, menm si nou mizer nou soz, mon krwar pa devret dan nou stratezi pou atir nenport ki vini, aköz i en touris. I bezwen touris ki anmenn en keksoz pou sa pei. Mersi.

MR SPEAKER

Mersi Onorab. Onorab William.

HON WAVEN WILLIAM

Mersi Mr Speaker. Minis mon'n apresye ou prezantasyon e mon apresye travay ki zot pe fer. Minis i annan detrwa mo ki avek ansyen Gouvernman, in fer nou en pti trakase letan nou tande, sa se sa mo

"Byento,"

"Epi" ouswa

"Pli tar."

So mon anvi demann ou Minis, baze lo ou *Statement* ki ou'n fer, parey ou dir ou menm, ki mon dakor avek ou, annou azir, nou'n ase koze.

E Prezidan li menm li in dir poudir nou Gouvernman i en Gouvernman pran desizyon avek pran aksyon. So mon anvi demann ou Minis, atraver sa bann keksoz nou pe vwar, bann diskisyon ki ou'n fer.

Eski ou'n kapab klasifye an term bann aksyon e desizyon ki kapab ganny pran dan kourt term, mwayen term e long term. Letan mon pe dir sa, mon pe refer.

Akoz pou mwan mon santi en pti pe anbarase. Aköz koz lo met bann latrin lo bann lans, i en diskisyon nou'n gannyen en bon pe letan pase, menm Mosyon in ganny anmenn dan Lasanble. I pa anba ou *watch*. Me mon pa krwar poudir sa bann keksoz i devret pran bokou letan pou pran bann desizyon.

E par egzanp, ler touris i ariv li *Airport* i annan zis en

conveyor belt. E sa touris son tansyon i konmans monte akoz in fer long voyaz.

Konmsi sa bann keksoz ki mon krwar poudir nou bezwen pe kapab annan bann dele letan. Akoz parey koman en Lasanble nou santi poudir ou bezwen sa sipor.

So nou bezwen annan en plan pou nou kapab sivre, an menm tan pou ede pou kapab bouz ansanm parey ou pe dir. So sa i mon de pti pwen. Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker, mersi Onorab. Mon ganny ou tre kler mwan. Mon osi mon kontan travay lo *timeline*, mon kontan, mon *staff* i konnen.

Mon donn dat e ler mon dir en keksoz, mon dir vwala mon oule li *by* tel dat e tel dat mon gannyen. Si mon ganny li 72erd tan avan *deadline* ki mon donnen, mon kontan.

Ou konnen i annan keksoz ki mon napa kontrol lo la, ki nou napa kontrol lo la, e ki petet menm Gouvernman napa kontrol lo la e ki petet menm Gouvernman napa kontrol lo la.

Vi nou sityasyon ekonomik ki nou ladan. Ou konnen ou'n koz lo latrin, ou'n

koz lo *conveyor belt Airport*. Ou sa menm si nou koz lo sa *Airport* li menm. Mwan si ou demann mwan, sa ki mon apel sa langar ki nou annan la, i pa la oter sa destinasyon Sesel, sa destinasyon 5 zetwal ki nou promote.

I pa en bon limaz ler ou debarke la, kwense la parey ou ete pou fer pti lake, anfen pti lake, gran laliny pou al kot Imigrasyon, gran laliny ankor pou al tir bagaz.

E ler 2 vol i ariv ansanm, anpakte la partou. Sorti deor tou dimoun i anta. Eski Gouvernman i annan larzan ozordi li pou fer nanryen?

Non, sa ki mwan mon konnen, sa ki mon kapab dir se ki i annan serten negosyasyon ki pe arive, nou pe get diferan opsyon pou kapab sanz sa fasilite *Airport*.

E avek sanzman fasilite, *improvement* fasilite, annan osi en pti pe plis ki enn *conveyor belt*. Parske sa 11 problemm ler nou aboli sa dezyenm *embarkation card* e nou dir tou dimoun ler i debarke pa fer lake kot Imigrasyon, pase.

Tou dimoun prezan pou al akimile en sel landrwa. Mon pa kapab dir en *timeline* la Onorab. Malerezman sa mon pa pou kapab dir ou.

I pou depan lo negosyasyon mannyer i ale, *funding* ki mannyer keksoz i

deroule. I pou menm zafer lo latrin. Mwan mon annan serten lide ki mannyer mon krwar nou kapab adres sa bann zafer latrin piblik.

Me selman an menm tan ler mon regarde, mon dir be petet mon pe reve. Mon pe regard bann latrin ki deza egziste. Si mon pran sa enn kot *stand taxi*.

Mon pa konnen si sa i en legzanp, en legzanp latrin piblik. Se koumsa nou oule dan bann distrik. Mwan, mon ti a voudre war en sityasyon kot i annan en *public private partnership*.

Kot swa Gouvernman i konstri, i donn en *operator* prive pou *manage*. Ouswa demann en *operator* prive li menm li, fer, *manage* sa zafer.

Be prezan ou dir be bon, en dimoun ki investir mon pa konnen konbyen i koute mon, ler pou met enn sa debout.

En dimoun a fer son *analysis*, son *business analysis* i a regarde, eski i pou gannyen, konbyen i pou sarze pou li kapab tir son lenvestisman? Ou konpran mwan?

Be i pa vedir aköz i annan tou sa bann konsiderasyon, nou pa devret bouze. Mon ti a voudre nou bouze. Nou, nou donn lide.

Nou dir be vwala, koumsa ti a bon, nou ti pe

regarde si nou tann en dimoun ki pe enterese, nou apros dimoun ki nou krwar i ava enterese, nou aprobe.

Me plis ki sa Onorab, dan sa bann *areas*, nou lanmen osi en pe anmare.

Par kont pou lezot keksoz lo lekel nou annan kontrol, lo sa bann zafer *localization of post*, lo sa bann zafer annan en program pou fer analiz konplet lo mank, lo, anfen lo bezwen Lendistri Touris an sa ki konsern mende.

Lo *gaps* ki annan, dan ki domenn ki annan, ki domenn nou devret al fer plis *training* ki *STA* i devret *focus*. Sa i donn ou kontrol sa.

Nou'n set nou lekor en target ki *by December*, *by* Desanm sa lannen nou'n fer sa. Prezan i ava en zafer *roll out* pou fer sir ki ansanm avek nou bann partner, nou kapab prezan enplimant li.

Mon pa konnen si mon'n reponn ou kestyon Onorab. Mersi.

MR SPEAKER

Mersi. Onorab si ou pou annan pwent adisyonnal fer li vit silvouple.

HON WAVEN WILLIAM

Yap.

MR SPEAKER

Nou pe *run out of time*.

HON WAVEN WILLIAM

Mersi Mr Speaker pou *with your indulgence*. Minis, mon'n ekout ou larepons. Mon anvi demann avek ou, par lefe ki nou bann konpetiter la, destinasyon pe al ouver.

Dapre ou la, ki bann keksoz imedyat, petet trwa keksoz ki ou kapab dir nou ki ou krwar poudir la nou bezwen fonsé ladan? Pou vreman kapab amelyor nou destinasyon. Mersi.

MR SPEAKER

Mersi Minis. Ou ava adres vitman silvouple.

MINISTER SYLVESTRE RADEGONDE

Konbyen letan nou annan. Nou napa lazournen. Mersi Mr Speaker. Onorab, ki nou bezwen fonsé ladan, mon krwar nou bezwen adres nou prop, konmsi si i problem lenfrastruktir, mon ti a voudre nou kapab.

Me si nou kapab menm avek nou langar ki nou annan Pointe Larue la, nou kapab adres nou servis, nivo servis. Nou kapab elimin sa bann zafer si i *delay* avek touris, donn li valer pou larzan.

Les touris ki annan en kadreman ki *safe* dan sa pei. Sa i deza 3 keksoz mon krwar ki parey Angle i dir, "*low hanging fruits*" nou kapab

adrese demen e i ava anmenn nou en gran distans.

Ki a fer dimoun oubliye ki vreman bon. *Arrival* pa tro, tro bon. Me i en pep ki reste akeyan, i *safe*, i pe donn nou valer pou larzan ki nou, anfen, larzan ki nou peye. E apre i en landrwa ki prop.

MR SPEAKER

Mersi. Mersi Minis. Bon mon annan 3 Manm ki'n lev lanmen lo dernyen moman. Mon pou apel zot, me selman mon pou demann zot, adres en pwen spesifik vitman silvouple. Onorab Sophola, i a swivi par Onorab Loizeau.

HON NOLINE SOPHOLA

Mersi Mr Speaker. Minis nou pe met lanfaz lo promosyon *Tourism Industry*. Me nou konnen i pa fasil, i annan bokou travay pou fer.

Minis i annan *outdated information* lo serten brosir ki pe sipoze promot Sesel ou serten distrik spesifik, ou menm letablisman touristik.

Par egzanp nou dir touris i kapab vizit La Digue dan saret. Ou osi akse lo lans i annan partou dan tou distrik.

Minis ki ou Minister i kapab fer pou asire ki bann lenformasyon i kredib, pou evit konfizyon ou pou aret, ou pou evit dezapwentman parmi bann viziter.

E dezyenmman, Minis ki pozisyon ou Minister lo *beach bed*, lo lans byen frekante lo La Digue, parey Grand Anse, Source d'Argent, Anse Coco e Anse Severe. Mersi Mr Speaker.

MR SPEAKER

Mersi Onorab. Minis.

MINISTER SYLVESTRE RADEGONDE

Eskiz mon Mr Speaker, eskiz mon. Mon pa'n ganny byen sa dezyenm kestyon Onorab.

MR SPEAKER

Dezyenm kestyon lo lans La Digue Onorab.

HON NOLINE SOPHOLA

Mersi Mr Speaker. Minis, ki pozisyon ou Minister lo *beach bed* lo lans byen frekante lo La Digue, parey Grand Anse, Sours d'Argent, Anse Coco, Anse Severe. Mersi.

MR SPEAKER

Mersi Onorab. Wi Minis.

MINISTER SYLVESTRE RADEGONDE

Mersi Mr Speaker. Mersi Onorab. An sa ki konsern lenformasyon lo brosir, mon pa konnen lo ki brosir, mon krwar tourism dan sa 2021, nou pe *move away from* sa

bann bout papye ki nou donnen.

Nou pe al *digital*. So petet i kapab annan bann dokiman ki deor la, nou bezwen regarde. E si lenformasyon pa korek, anmas tou sa bann papye brile *or disposed of them anyway*.

Pou saret byensir mwan personnelman parey mwan, mon krwar ou a regrete ki saret i nepli lo semen La Digue.

Nou espere ki byento nou a kapab trouv en landrwa La Digue, en kwen La Digue, par egzanp Linyon, kot nou a kapab remet saret pou touris ganny sa leksperyans.

Lo sa ki konsern *beach bed* lo lans, mwan personnelman mon napa okenn problemn mon. Me mon krwar nou bezwen regard sa dan lankadreman zeneral bann aktivite ki pase lo lans.

O si lontan ki en dimoun pa pe al fatig en touris pou al fors li pou en *beach bed* kan i pa oule, kan i pa enterese, la i ava annan en problemn.

Me si en dimoun i oule, mon pa dir al devan en lotel mon. En dimoun i oule, dan en lans par la, ofer en fasilite *beach bed* parey bann ki pe vann zot koko tann, parey bann ki pe vann zot fri, mon personnelman mon napa okenn problemn. Mersi Mr Speaker.

MR SPEAKER

Mersi. Onorab Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Mr Speaker mon ti annan mwan 5 pti kestyon. Selman mon a gete, mon a demann zis 1.

Minis, vi ki nou annan en ta gran lotel, nou annan bann mwayen letablisman, pti letablisman. E ozordi i annan touris ki zot pa anvi vin dan sa bann letablisman zot.

Zot anvi vin eksperyans sa lavi Kreol kot en fanmir. Kot ler mon pe kwi kari, li i pe rap koko ater. Ler zot pe al en piknik i deryer dan pikep i osi, nou pe ale, i pe *enjoy* sa lavi Kreol.

Eski Minis, eski zot annan sa konversasyon, pou al ver en pe dan sa direksyon. Kot i kapab ede soulaz serten fanmir osi ki anvi antre ladan.

Mon konnen i pa pou fasil pou annan bann Polisi, bann keksoz ki pou vini, pou kapab ankadre sa byen. Eski i annan sa konversasyon ki pe ganny fer en pe dan sa direksyon? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mersi Mr Speaker. Mersi Onorab. Larepons kourt se wi, sa i tonm dan nou konteks *cultural tourism*. Nou pou oule, nou pou ankouraze ler sityasyon i *improve*.

Ki bann touris pa pe neseserman pe al reste dan sa fanmir. Akoz pou ou kapab resevwar touris, ou pou bezwen annan en *license guest house*, annan serten minimonm.

Me pou partisip dan bann aktivite dan bann lakour, wi nou oule ankouraze kot touris i kapab al war kote pe fer kari, kote pe fer penpen, kot i fer galet.

Partisip dan bann aktivite dan vilaz, dan fanmir. Lobzektif ki nou oule se ki bann dimoun dan bann kontan, be ler dan ou ka Onorab, i partisip dan lendistri.

Me osi permet zot parey ou dir, ganny en reveni dan sa touris. E sa touris osi en leksperyans fantastik ki i gannyen al partisip dan bann aktivite koumsa. Mersi.

MR SPEAKER

Mersi Minis. OnoOrab Lemiel.

HON SYLVANNE LEMIEL

Mersi Mr Speaker. Bonn apre midi Minis avek ou delegasyon. Minis mersi pou ou lenvitasyon ki ou ti envit mwan dan vizit avek ou

delegasyon. Mon krwar i ti en vizit tre friktye.

Kot nou ti kapab diskite bann diferan *issues*. E an menm tan mon pou profit sa lokazyon, letan nou dan Lasemenn Touris, pou mon felisit bann dimoun ki dan domenn touris dan distrik Anse Royale.

Akoz mon krwar ki sa bann dimoun zot pe vreman travay dir pou zot kapab anmenn en bon servis e donn en bon servis bann touris ki vin dan zot letablisman.

E an menm tan mon reasir zot ki nou pou kontinyen travay ansanm, pou nou rezourd en pe problemm parey sirtou tapaz kot i konsern *Fairy Land* e bann lezot pti *issues* ki ler nou ti pase ti ganny met devan ou.

Such as netwayaz lans, bann pti keksoz koumsa. Minis, mon kestyon osi menm i vin lo kote touris. Zot vin Sesel pou zot dekouver nou kiltir, nou lakwizin, nou fason viv.

Me ou'n koz en pti pe letan Onorab Letourdie in demann ou kestyon konsernan artis. Mwan mon kestyon ti spesifikman lo kote nou annan Dr Patrick Victor ki Lanbasader Kiltirel pou Sesel.

Mwan mon ti oule konnen ki mannyer ou Minister pe angaze avek li? Ki mannyer zot pe angaze

ansanm pou li kapab travay pli pre avek ou Minister e bann lezot Departman Touristik, pou li kapab promot kiltir Sesel avek touris ki vin isi Sesel e osi menm aletranze? Mersi.

MR SPEAKER

Mersi Onorab. Minis.

MINISTER SYLVESTRE RADEGONDE

Mr Speaker mersi. Mersi Onorab. Mon a profit sa lokazyon Onorab pou mon dir ti en plezir pou ganny ou dan nou delegasyon.

Malerezman ou pa ti kapab fer fini tou le tour, apre ti vin pli enteresan. I annan ankor plizyer letablisman dan ou distrik ki nou pou retournen.

Mon espere ki nou a kapab *send*. E se vre, i annan bann, an zeneral, mon krwar Anse Royale, rezyon Anse Royale, Pointe Au Sel, ensidswit, ki annan bann letablisman o standar e ou trouve ladan bann dimoun ki pe mank dinamik, devoue ki pe persevere dan sa lendistri. E nou kontan kontribisyon ki zot fer.

Lo kestyon spesifik Onorab i en diskisyon ki nou pe fer avek Anbasader Patrick Victor. Nou pe servi li, son pozisyon ofisyel.

Me osi annan konesans, i annan son bann konesans li menm li koman en mizisyen *aguerri* parey Franse i dir. E ki i kapab anmenn en kantite lide. Nou pe diskite ki mannyer ki meyer.

Nou, nou annan nou lide, nou asiz dan biro, nou annan lide ki mannyer nou ti a voudre. Me i byen ler nou al sa bann lide, nou konmsi nou larg avek en dimoun ki lo teren, i konnen, i dir nou be regarde, sa i bon, me selman ti a bon ou aziste li koumsa pou fer li koumsa.

Nou annan deza serten plan ki nou'n fer. Nou'n koz lo La Digue par egzanp, ki mannyer pou servi linyon koman en aktivite pou lans bann aktivite kiltirel La Digue.

E i annan lezot aktivite, par egzanp nou pe regarde, be bon, moutya koman en legzanp, moutya. Nou ti a kontan kapab promot moutya.

Me enn fwa ki nou promot moutya, i bezwen ler sa touris i vini, i konnen ki ou dir i annan moutya Sesel, i bezwen kapab dir be en *taxi* anmenn mwan kot i annan moutya.

Ozordi ou a dakor avek mwan, napa en landrwa kot touris i kapab ale pou li war moutya. Moutya i en zour i annan, en zour napa.

Si i fer dan zedi, en zour ou ale i komans 8er, en zour i

7er, apre ler ou ale en zour in fini. Se sa *consistency* ki napa.

Nou oule kontinyen travay avek li, nou oule kontinyen diskite, nou oule kontinyen diskite avek bann Lotorite Distrik e bann lezot dimoun dan distrik ki an deor ladministrasyon.

Pou nou trouv en lankadreman ki kapab marse. I pa mars pou en zour, pou en de zour, me *consistently*. Nou ti a kapab kontan, par egzanp anler Mont Plaisir, nou ti kapab anmenn dimoun ki nou konnen laba, ou ale, ou ale pou sa aktivite, e i la.

Si nou dir tou le Mardi 6er, tou le Mardi 6er nou kapab dir ek bann gid vwala ki i annan Mont Plaisir. E nou oule annan sa bann aktivite, en mannyer ki nou kapab annan en kalandriye aktivite ki nou a met lo nou *website*.

Distribye avek touris ler zot arive, ki ler touris i debarke, i konnen Sesel si i pe vin fer en semenn, dan sa semenn, vwala ki i kapab fer.

So ki mon oule dir ou, se ki i en diskisyon ki nou'n komanse, ki nou pe pourswiv. I annan serten aktivite ki nou'n pare pou lanse.

Me i annan lezot ki nou bezwen *fine-tune* e nou a kontinyen fer sa travay. E nou espere ki byento nou a kapab vwar en keksoz ki anfen

rezilta. I pa zis koze. La prezan nou aksyon. Mersi.

MR SPEAKER

Mersi Minis. Onorab Georges ou ti'n dir ou pou annan kestyon pli tar. Me selman mon pa'n war ou lev lanmen. Ou ti a kontan annan laparol la avan nou terminen?

HON BERNARD GEORGES

Wi mersi Mr Speaker. Annefe mon ti'n lev mon lanmen, me apre mon'n al lo *Order 38*. Mersi. Mersi Mr Speaker.

Mr Speaker premyerman, permet mwan lo lapar nou *Caucus, extend* nou kondoleans avek lafanmir St Ange pou disparisyon resan Miriam.

E atraver ou, eski mon kapab demann avek Onorab Sophola e Onorab Uranie pou transmet nou kondoleans avek lafanmir.

Mr Speaker mon ti a kontan dezyenman remersi Minis avek son delegasyon pou en apersi ekstrememan konpreansiv, lo nou lendistri prensipal ki'n sitye nou egzaktaman la kot nou ete ozordi dan sa konteks *post COVID*.

E mon krwar par lakantite kestyon in ganny demande bomaten, nou rekonnet lentere ki nou popilasyon, ki nou, nou

reprezante isi i annan pou sa lendistri, ki nou Lendistri Touris.

E mon ti a kontan osi, atraver ou Mr Speaker, Demann avek Minis pou felisit ladministrasyon ki i form par ladan pou ou bann desizyon ki zot in pran.

Ki'n permet ki ozordi nou annan nou en lendistri ki performan konpare avek kot nou sorti.

I annan de keksoz Minis ki ou'n dir bomaten, ki mon ti a kontan pran 30segonn pou rapel pou demann ou, rapel avek nou popilasyon silvouple, son lenportans, enn se latitid, lot se diversifikasyon.

Mon krwar sa se de eleman kle dan, si mon'n konpran ou byen dan ou *focus*, ou *focus* ou Departman pou sa lendistri dan bann lannen ki pe vini.

E ki nou bezwen fer nou popilasyon rapel ki nou pa sel pei, nou pa sel destinasyon zil dan lemonn antye ki konpetisyon i feros partou laba deor.

E ki enn bann keksoz ki pou fer sir ki nou, nou kontinyen, se latitid ki nou annan koman bann travayer dan Lendistri Touris e nou popilasyon an zeneral anver bann viziter ki vin dan nou pei.

Mon krwar sa set en keksoz ki nou pa devret zanmen bliye. E

dezyenmman, mon kontan ou mantra diversifikasyon, diversifikasyon, diversifikasyon, nou bezwen al dan bann lezot vole sa lendistri e non pa zis *focus* lo *hebergement*.

E la ankor, enn bann keksoz ki mon krwar ki mon pa'n tande ozordi. Me mon ti a demann ou silvouple, met en pe lanfaz lo la, se ki bann ki al dan *crafts* avek *souvenirs*, prodwir plis en pe lokalman e non pa zis fer vini bann keksoz sorti *Bali* apre ekirir *Seychelles* lo la.

Akoz mon pa krwar sa set a limaz en destinasyon 5 nivo. E mon kestyon finalman, Mr Speaker se kestyon *of the elephant in the room* si mon kapab dir.

PS Francis in fer nou konpran ki bann marse nouvo ki nou'n etabli pandan letan *COVID* pou reste, malgre ki kekfwa zot pou diminyen. E nou konpran sa tre byen.

E bann nouvo marse, bann ansyen marse pe vin *online*. Kan eski, kan eski zot pe prevwar ki nou pou ariv lo nivo 2019?

A savwar apepre mil touris tou le zour. Pou ki nou annan nou anviron 350mil *or more* par an? Mersi Mr Speaker.

MR SPEAKER

Mersi. Minis ou a kapab adres sa bann pwen silvouple.

MINISTER SYLVESTRE RADEGONDE

Mersi Mr Speaker, mersi Onorab. Onorab mersi pou ou zantiy mo ki ou'n annan. Ou'n fer detrwa pwen, wi diversifikasyon, diversifikasyon, diversifikasyon.

Mon krwar i, wi i *focus*, i *focus*. E tou, e tou dimoun dan Departman zot konnen ki nou bezwen al dan sa direksyon, nou pa kapab.

Sesel i bezwen, i bezwen sorti dan sa lafoul. I bezwen met li apar pou ganny remarke, ki konpetisyon parey mon'n dir avan i *fierce*, *Maurice* i a ouver dan detrwa zour, *Sri Lanka* i ouver, *Maldives* i ouver.

Sesel i ofer en lot kalite prodwir, e nou bezwen kontinyen kapab ofer en lot kalite prodwi, o kalite.

Pa neserman, anfen mon ti a voudre, osi bon marse ki posib. Me nou pa pou kapab *compete* avek bann lezot *market*.

Me parey mon dir, valer pou larzan, pou sa kalite prodwir spesyal inik ki nou kapab ofer. E nou annan tou pou nou ofer. Lartizana wi i en *gro challenge*.

I annan de ler i depriman, ou pase dan bann

diferan magazen, ou regard kantite keksoz enporte. E dimoun i krwar ki lefe ki ou'n enport en zafer sorti *Thailand* sepa kote, met en *sticker* made in, or met en *sticker* Sesel lo la, sa i fer li en prodwir Seselwa.

I pa prodwir en Sesel, i pa en prodwir Seselwa. Ou pe manti avek ou lekor, ou pe sey osi manti avek kliyantel ki pe vin aste sa prodwir.

Nou bezwen kontinyen pouse pou annan en prodwi, pou nou bann artizan prodwir lokal. I pou zot benefis, zot ganny en lavi ladan.

I aktivite ekonomik ki donn lavi kominote e pei *at the end of the day* i benefisyé. Sa nou kontinyen pouse.

Mon rapel ler nou komans Bazar Labrin, *many moons ago*, sa i en keksoz ki nou ti vreman tap for lo la. Ki dan sa Bazar Labrin, napa nanryen ki pa Seselwa, ki pa lokal.

Lanmizik, manze, labwason, prodwir artizanal tou ti bezwen lokal. Apre malerezman in degrade, in vin en nespes *fancy fair - fancy fare* piblik.

Lo nou prozeksyon kote nou pou ete, kan. Mon a les PS koz lo la. *It will be hopefully sooner, rather than later.* Ale PS. Mersi.

MR SPEAKER

Mersi Minis. PS.

PS SHIRIN FRANCIS

Mersi Mr Speaker. Mersi Onorab pou ou kestyon. Avan mon reponn ou kestyon direkteman, petet mon bezwen koz en pti pe lo globalman ki bann prediksyon ki pe ganny fer.

An se moman la, globalman, *in terms of air travel we still at 42percent*, Septanm la, *we still at 42 percent* sa ki lemonn ti annan an 2019. *42-42 percent.*

E menm letan lannen pase nou ti 24 pousan. Dan sa bann peryod an 2019, *travel* pou 'QU4' ti apepre 140 milyon pasaze. E la i ankor anviron apepre 40milyon.

So sa i donn nou en apersi globalman ki mannyer keksoz i ete. Ki ler ou ekout *IATA Economics*, ou ekout *UNWTO* avek tou bann diferan lorganizasyon mondyal, menm *IMF* ek *World Bank* osi nou regard zot prediksyon. Zot menm pe dir pou *tourism globally* kapab *recover*, zot pe regard en lespas letan petet 2024, e menm 2025, *tourism globally to recover.*

Me selman Sesel nou war poudir nou pe *perform* pli byen ki sa prediksyon ki pe ganny fer globalman.

Par egzanp depi ler nou'n reouver *Airport*, nou'n war on average, nou pe ganny apepre 500 viziter par zour, ki apepre

50poursan sa ki nou ti abitye pe fer dan en bon lannen.

On *average* dan en bon lannen nou ti apepre, nou ti a pe fer apepre mil viziter par zour. So ki montre nou'n kapab rekiper apepre 50 poursan nou biznes.

I annan mwan, par egzanp Out, kot nou ti'n menm ariv en *average* 700 viziter par zour. Me selman Septanm la, sa *figure* in desann.

E Septanm normalman, abityelman i annan sa pti desant si ou get dan bann *trend* 2019, 2018. Avek bann vol ki pe vini, *Condor* ki arive sa *weekend*, *Air France* ki arive dan bann semenn ki vini.

E ler nou get prediksyon osi tou, nou bann marse tradisyonnèl, kondisyon vwayaz pe amelyore. Nou'n kapab devlop en lafors lo nou bann nouvo marse osi tou.

Nou pe predir ki nou *daily arrival* i pou monte. Lo komansman ler nou ti fer prediksyon, nou osi nou osi nou ti'n met nou lekor petet 180mil apepre sa lannen, en 250 pres 300mil lannen prosen.

E petet nou 2019 *figures* kekfwa dan bann 2023 menm 2024 ki nou ti pou zwenn. Me selman ler nou pe get nou performans la, si tou keksoz i al dapre plan ki nou napa okenn sok, akoz dan sa lespas

letan ki nou pe *operate* la, nou realize poudir keksoz i sanze en zour a landmen.

I kapab ozordi nou bann pei tradisyonnèl, nou bann sours marse tradisyonnèl, i dir nou i *ok* pou zot bann vwayazer, pou zot bann sitwayen kapab vin vizit Sesel.

Demen zot sanz zot *travel advisory*, zot dir non, zot on sanz zot lide, non i pa posibil. Or i kapab riv en lot keksoz. Nou pa konnen.

I vreman nou pe ankor pe *operate* dan en lespas *uncertainty*. Me selman si tou keksoz i al parey nou pe war la, kot nou war sa progresyon i pozitiv.

Mon mazine par lafen lannen Desanm, nou pou'n konmans war sa mil viziter par zour. Me selman i pou *fluctuate*. Probableman nou pou war an Desanm, nou pou arive sa mil viziter par zour.

Me Zanvye i riske drop en pe. Fevriye i a monte desann, monte desann. E ki nou santi ki 2022, si tou keksoz i al lo plan, nou riske ratrap en bon pe, 2023 nou kapab sirpas nou 2019 *figures*.

MR SPEAKER

Mersi *PS*. Bon be pou termin sa sesyon nou a repas dan Staz Lasanble. Bon i en mo remersiman pou Minis avek son delegasyon pou zot

travay e pou zot partisipasyon avek nou.

E mersi bann Manm pou zot bann kestyon byen enstenktif ki'n permet nou egzamin sa lendistri. Nou en pe an retar, nou a propoze ki bann Komite ki ti pou zwenn i retarde par en demi erdtan.

Enkli *Assembly Business Committee*, nou a met li 1.45 olye 1.15. E nou a repran travay 2er edmi. Minis, delegasyon, mersi bokou e bonn kontinyasyon, *bonne journée*. Nou a pran *pause*.

(BREAK)

MR SPEAKER

Bonn apre midi tou dimoun. Bon nou pe, Madanm Clerk mon war lasal konmsi i mank en pe Manm. Eski nou annan en *quorum*. Nou annan.

Bon nou pe pran travay lo en Lalwa ki apel *Prevention of Drug Use and Rehabilitation Agency (Repeal) Bill, 2021*. Madanm raporter nou ava apel Vis-Prezidan ki pe ranplas Minister, Minis Lasante pou sa avek son delegasyon.

Byen, tou dimoun in ganny en plas. Bonn apre midi Vis-Prezidan Ahmed Afif e delegasyon avek Vis-Prezidan i Dr Bernard Valentin, *Principal Secretary for Health*.

Attorney General Mr Frank Ally e Dr Winnie Low-

Wah, *Senior, Liaison Officer* pou APDAR. Nou pe pran *Prevention of Drug Use and Rehabilitation Agency (Repeal) Bill, 2021*.

Mon ava apel *Leader Biznes Gouvernman* pou prezant Mosyon pou *Second Reading*.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi Vis-Prezidan, *PS Valentin, Attorney General* ek Mrs Low-Wah e tou bann Manm Onorab, e tou dimoun ki pe ekout nou dan Lakour.

Mr Speaker anba *Order 69(2)* nou *Standing Orders* mon move ki *Prevention of Drug Abuse and Rehabilitation Agency (Repeal) Bill, 2021* i ganny lir en Dezyenm Fwa. Mersi.

MR SPEAKER

Mersi. Mon a ganny segonnman silvouple. Onorab Arissol.

HON SANDY ARISSOL

Mersi Mr Speaker. Bonn apre midi Mr Speaker, Minis ek delegasyon. Mosyon i ganny segonde. Mersi.

MR SPEAKER

Mersi. Mon ava apel Vis Prezidan pou entrodwir *Bill* silvouple.

THE VICE-PRESIDENT
AHMED AFIF

Mersi bokou Mr Speaker. Bonn apre midi Mr Speaker, *Leader Government Business*, tou bann Manm Lasante ki prezan e tou dimoun a lekout.

Labi drog ek lalkol, oubyen labi sibstans parey nou osi dir li, i kontinyen reste en problem mazer dan nou pei. Pe kontinyen afekte bokou zenn e bokou dimoun lezot laz osi.

In estimen ki plis ki 5 mil Seselwa i servi eroin regilyerman. Bokou plis ankor i servi lezot sibstans ki osi enkli lalkol. I reste lentansyon ek volonte ferm sa Gouvernman pou redouble zefor Nasyonal dan lalit kont labi sibstans.

Gouvernman pe met plis lanfaz lo redwir demann pou drog dan pei e an menm tan i pou met plis lanfaz lo prevansyon, plis lanfaz lo tretman ek reabilitasyon an *servant* bann model *bio-psycho-social* e spirityel ki'n seye e teste atraver lemonn.

E ki'n prouve ki zot kapab anmenn sikse konsiderab. Gouvernman pou kontinyen adres problem drog ek lalkol koman en problem lasante piblik avan tou.

E non pa zis koman en problem lord ek Lalwa. Dan sa konteks e *conformement*

avek lapratik dan Lasante, Minister Lasante pa zanmen ziz bann ki bezwen led e ki senserman vin rod led aköz drog ek lalkol. Nou pa zize, nou pa pini, nou pa abese.

Mr Speaker mon pou sit serten rezon, aköz nou'n deside pou al dan sa direksyon e met sa servis anba Minister Lasante.

Premyerman, e i annan 10 rezon. Labi drog ek lalkol i dabor e avan tou e en problem lasante piblik.

Dezyenmman, la mazorite travayer *APDAR* se bann profesyonnel Minister Lasante.

Savedir dokter, ners ek psikolog eksetera.

Trwazyenmman, tou le 3 dokter ki aktyelman travay avek *APDAR* se bann dokter ki anploye ek Lazans Swen Lasante, ki en antite dan Minister Lasante. Zot in senpleman ganny segonde kot *APDAR*.

Katriyenmman, 18 ners *Health Care Agency* i travay *part time* kot *APDAR* an plis ki sa 9 ki anploye a plentan kot *APDAR*.

Senkyenmman ler *APDAR* napa dokter oubyen ners pou okenn rezon, i bezwen vin kot Minister Lasante pou parey nou dir, degaz lasasen.

Sizyenmman, tou program ki *APDAR* i fer, swa

lo prevansyon, tretman oubyen rehabilitasyon, i bezwen fer li an kolaborasyon avek Minister Lasante pou li reisi.

Setyenmman, lenportasyon bann latizann tel ki *methadone* ek lezot prodwir medikal tel ki sereng, legan eksetera, i kapab fer pli byen si i fer atraver Minister Lasante, ki annan en sistenm solid pou fer sa.

Wityenmman, i annan en lyen direk ant problenm drog ek lalkol ek bann maladi parey *HIV, SIDA, Hepatitis* ek maladi ki transmet par sex ki tonm anba responsabilite Minister Lasante.

Nevyenmman, i annan en lyen direk ant labi drog ek lalkol, ek bann risk ek maladi ki bann manman ki lo drog i annan pandan zot lansentman.

E ki pe fer ki nou pe vwar ki i pe annan plis lanmor bann manman pandan zot lansentman. E pe annan plis lanmor bann baba avan e apre zot nesans akoz problenm drog ek lalkol, e ki Minister Lasante i bezwen adrese dan en fason global e par pti bout, par pti bout dan en fason dekonekte.

E dizyenmman e dernyen rezon, Minister Lasante i bezwen re aziste son bann programm psikyatrik. Akoz ti annan en pe konpetisyon e menm konfli pou lespas, par

egzanp kot *Wellness Center*, ant Minister avek *APDAR*.

Desizyon alor pou restriktir bann programm lalit kont drog ek lalkol i osi baze lo nesosite pou mye servi resours limite e koup serten depans ki pa absoliman nesaser. Mon a donn detrwa, 3 legzanp.

Zis Biro Sekreter D'Eta pou *APDAR* avek tou bann depans ki vin avek, tel ki loto, sekirite, biro ek lezot ankor, ti pe kout apepre R100mil par mwan.

Sa *Board* ki ti annan 22 dimoun ti pe kout pei minimonm R66 mil par mwan. Bann depans ki Gouvernman ti pe fer pou lwe landrwa kot *APDAR* li menm ti ete dan bann batiman ti R3.1milyon par an.

Sekirite R1.2milyon par an. R100 mil par mwan. Sa se zis detrwa legzanp lekonomi ki'n fer ziska prezan. An menm tan ki bann programm i kontinyen lo menm lanpler.

Mr Speaker nou tou nou konnen ki problenm drog ek lalkol i pa en problenm fasil pou rezourd.

Si i ti fasil, lontan lemonn ti ava'n rezourd li. Me nou tou nou konnen ki lalit kont labi drog ek lalkol i bezwen redinamize, avek plis zefor lo rediksyon demann pou drog ek lalkol, e rediksyon bann domaz ki drog ek lalkol i koze.

Sa Prozedlwa pou *repeal* sa Lalwa *APDAR* ki devan nou, pe propoz sa bann keksoz swivan. Premyerman, tou bann propriyete mobil oubyen imobil ki *APDAR* ti annan, pou transfer lo Minister Lasante.

Dezyenmman tou bann kontra ki *APDAR* in sinyen ek bann lobligasyon e responsabilite legal ki *APDAR* i annan avek bann diferan personn pou kontinyen reste anba Minister Lasante.

Trwazyenmman, tou travayer ki aktyelman anploye ek *APDAR* pou kontinyen avek zot lanplwa dan Gouvernman, pli partikilyerman Minister Lasante, avek bann menm term e kondisyon ki zot annan la konmela.

Repeal sa Lalwa ki ti kree *APDAR* an 2017, pa retir nanryen dan volonte ek determinasyon Gouvernman pou lit kont labi drog ek lalkol.

Bi sa travay se pou anmenn plis rasyonnalite, efikasite ek lekonomi dan sa demars.

E met plis sa bann resours limite ki nou annan dan vre solisyon drog ek lalkol. Bidze pou bann program ki *APDAR* i fer pa'n sanze. O kontrer i pou azout avek sa ki Minister Lasante i deza annan.

Mr speaker, vwala avek sa bann rezon ki mon'n soulinyen, mon demann tou bann Manm Lasanble pou

repeal sa Lalwa 2017 ki ti kree Lazans pou Prevansyon kont Labi Drog ek Reabilitasyon parey sa *Bill* pe demande. Mersi Mr Speaker.

MR SPEAKER

Mersi Vis-Prezidan pou ou prezantasyon. Lasanble i ouver pou lentervansyon bann Manm. Bon, nou a ouver lasal pou deba. Onorab Georges ou'n lev lanmen premye. So sa voyaz mon sipoze ou anvi adres Lasanble boner. Onorab.

HON BERNARD GEORGES

Mersi Mr Speaker. Mr Speaker efektivman mon ti anvi pran laparol an premye. E mon krwar bann Manm ava konpran akoz an mezir ki mon koze.

Bonn apre midi parey mon'n dir taler, delegasyon. Mersi Vis-Prezidan pou ou lentrodiksyon a sa *Bill* apre midi.

Mr Speaker, parey ou konnen e parey bokou bann Manm isi dan sa Lasanble i konnen, *APDAR*, *APDAR* ek drog an partikilye set en keksoz ki tre pre avek mwan.

Annefe zis o konmansman Sizyenm Lasanble, enn bann premye Mosyon ki kote *LDS* ki ti anmennen, sete mon Mosyon lo drog.

E bann Manm ki la i ava rapel ki i ti en long Mosyon, en long deba. E nou ti pas atraver sa fleo e sey *sketch out* en plan pou atak sa fleo e trouv en solisyon.

Out of that, e kekfwa an menm tan ki sa, *APDAR* in ne. Me si mon retourn lo mon Mosyon, mon Mosyon Mr Speaker mon'n anmennen akoz mon'n reprezant dan sa Lasanble, pou sa dernyen 20an enn bann distrik nou pei ki ti pli ganny touse avek sa fleo.

E mon'n konstate o fir an mezir mon reprezantasyon, ki olye *improve* ler mon ti ariv Mamelles pou premye fwa, problemm ti en problemm *Cannabis, Hashish*.

E o fir a mezir sa in grandi e nou ti *end-up* avek en problemm bokou pli grav a sa vwar eroin. E eroin i enn sa bann drog ki enn fwa ki ou'n komanse, i preske pa posibil pou ou sorti lo li.

And that's, e se sa enn bann gran dranm avek sa keksoz, avek sa drog, avek sa fleo.

Me osi fodre pa nou bliye, akoz toultan nou *focus* lo drog, me fodre nou realize osi ki nou pei i annan en lot fleo e sa se lalkol. Ki kekfwa ankor pli gran e ankor pli grav ki drog.

E mon ti realize ki deplizanpli bann zonn ase zenn, e prensipalman bann

zonn, me osi en serten poursantaz bann madanm, ase zenn dan zot karantenn, dan zot senkantenn ki ti napa okenn rezon pou zot mor, ti mor akoz zot ti bwar bann lalkol ki pa neserer oubyen ki pa prop, oubyen ki pa bon.

E zot ti bwar li ann ekse, e zot ti bwar parey nou dir, dan nou bann rezyon, san manze. E donk zot ti annan sa problemm.

E sa 2 problemm pa'n ale, sa 2 problemm i ankor la, i annan en serten amelyorasyon ki'n arive e avek ou permisyon taler mon ava tous en pti gin lo la.

Atraver methadone, at least as far as heroin is concerned. Me zeneralman problemm i ankor la.

Mon ti dir dan mon Mosyon, e mon ankor dir ozordi, e mon kontan ki *VP* apre midi in tous en pti pe lo la anriflan, ki lager kont drog ek lager kont drog ek lager kont lalkol i bezwen en lager antoure.

Ou pa kapab annan zis en sekter pe travay dan en *silo* oubyen en lot sekter pe travay dan en *silo* e i ekspekte ki ou pou annan en rezilta. *It does not work like that* e nou tou nou konn sa.

Mon mwens ki tou, akoz mwan mon en Avoka, mon pa en dimoun medikal, mon pa

en psikolog, mon pa okenn sa bann dimoun.

I zis ki mon'n annan loportinite pou mon travay dan en distrik kot sa bann fleo i la. E mon ti a kontan profit sa lokazyon pou mwan dir en mo remersiman spesyal pou tou travayer APDAR pou sa travay devoue ki zot in fer.

E Ms Low-Wah i konnen, i ti dan bokou bann *meeting* ki mon ti asiste. E zot fer en travay eksepsyonnel. Zot fer en travay, se bann dimoun ki pou pa ti konnen ti annan sa talan, oubyen sa latitud pou dil avek en problem.

E *all of a sudden* ou ti vwar ki non selman zot ti annan sa, zot ti annan SOPs, zot ti annan en plan, zot ti annan en kapasite. E zot ti konnen ki mannyer pou abord sa problem.

Donk Ms Low-Wah lo mon par silvouple, ou ava dir avek bann lezot travayer APDAR ki mannyer mon rekonesan. *At the end of* sa deba ki nou ti annan, APDAR in ne.

E ankor enn fwa ler Lalwa APDAR in vin devan nou Lasanble pou pase, e nou ti annan en gran deba lo son grander son *Board*.

Enn bann keksoz ki - enn bann rezon ki nou ti ganny donner e ki mon ti krwar fermeman ladan, se ki pou ou kapab fer en lager antoure, ou

bezwen anmenn dimoun sorti dan tou bann sekter pou zot kapab raport en kontribisyon.

I pa'n arive pou divers rezon. Pa neserman aköz APDAR, me parey nou konnen bann *Board* ki rankontre dan en fason ki pa regilye avek bann dimoun ki pa *committed* e ki pa *sweat the problem*, ou kontribisyon i limite.

Me sete sa lide, lide sete ki nou ti bezwen annan reprezantasyon sorti an plizyer sekter, pou ki nou kapab annan sa lager antoure.

E lide sete ki nou bezwen annan en dimoun ase for pou *lead* sa Lazans.

Pou ki lager kont sa de fleo ti ava ganny *undertaken* par sa bann lezot pei i apel en *drug ...*, en dimoun ki fer zis sa e i rod resours en pe partou kot i kapab pou li kapab fer sa lager.

E mon ti demann avek Lasanble, aköz ti annan en Manm lo sa *Board* ki ti sipoze sorti dan Lasanble, e mon ti demann avek Lasanble, mon ti dir ler nou arive pou nou swazir sa Manm, mwan mon ti a kontan al lo sa *Board*.

E pou bann rezon ki mon fek evoke. E apre nou ti met 2 Manm, aköz nou ti dir enn toultan fodre i sorti dan Lopoziyon. Parey i pa ti pou byen ki pou annan zis 1 Manm, me i ti ava byen ki i annan en Manm sorti lo sak

kote latab. Akoz drog i en problem nou tou. I pa en problem zis Gouvernman oubyen i pa en problem zis Lopoziyon, i en problem nou tou.

E donk *LOTO* ti ganny nonmen a sa moman letan, i ti Onorab Pillay ki ti asiz lo sa kote latab an plas kot Onorab Sandy Arissol i asize. E se li ki ti vin sa dezyen Manm lo *Board APDAR*.

E mwan, pou en rezon ki mon pa tro sir. Me mon ti ganny loner pou mon vin *Vice-Chair APDAR*. E set en travay ki in pasyant mwan bokou. Me nou konpran ki la sityasyon in sanze.

APDAR parey *VP* in eksplik nou, i ti pe kout en kantite larzan pou mentenir son lekor. E ki sa larzan i ava pli byen ganny itilize dan ban program *APDAR*.

That's where larzan i bezwen ale, non pa dan ladministrasyon. E sa se, e la mon ava met mon sapo politik.

Sa se filozofi sa nouvo ladministrasyon, *trim the fat, cut the partou* kot pa neser - bann depans, servi bann resours limite, kot aksyon i bezwen ganny pran.

E non pa pou annan bann Lazans ki egziste for the *existing* - parey nou'n vwar dan bokou ka. E mon pa pou koz lo *APDAR* dan sa konteks.

Akoz parey mon'n dir, mon ti mwan menm mon form parti sa lekip. Donk restriktirasyon i en enportan. E mon kontan vwar ki sa *Repeal Bill* pe gard tou *staff in post*, me pe *shift* zot anba Departman Lasante. E sa i fer mon gran plezir. Akoz parey mon'n dir, se bann dimoun ki *dedicated to their job*.

In fact rar ou vwar en group dimoun ki telman *dedicated* a en lobzektif ki sa group dimoun ki travay pou *APDAR*.

Vreman i ti en revelasyon pou vwar zot komitman, zot degre, zot degre lanvi travay e zot rezilta ki zot ti akonplir. *Having said that*, mon ava demann *VP*, e kekfwa Dr Valentin. Akoz sa se son Minister, donn mwan konfor.

Donn mwan konfor ki Minister Lasante anba sa presyon ki i annan deza, zeneralman pou *run* en Servis Lasante ki, eskiz mwan pou dir, me i annan kritik deor lo son nivo performans.

E sa i pa en sekre. Avek doub presyon ki *COVID* in vin enpoz lo zot, donn mwan sa konfor ki pou annan lespas e ki pou annan kapasite pou zot kapab *run APDAR* dan en lot laform.

Silvouple donn mwan sa konfor. Fer mon sorti la apre midi an konesans ki sa pa ki nou pe fer i en pa pozitiv e ki

sa bon travay ki'n ganny fer lo nivo profesyonnel i ava kontinyen anba en lot parasol. Akoz sa se mon, en keksoz kot mon napa okenn lenformasyon.

Alor Mr Speaker, mon pa anvi koz tro lontan, me mon bezwen avek ou permisyon, tous en pti pe lo travay APDAR li menm. Parey VP in dir, *laissent* lalkol a kote pou lenstan.

Akoz mon krwar sa set en sityasyon kot nou konnen egzaktman ki son problem e ki mannyer nou pou bezwen rezourd li. Annou *focus* lo nou problem drog.

E parey VP in dir, i annan anefe 3 vole ki nou bezwen dan sa lager antoure atak an menm tan. Premye se *supply reduction*.

E sa parey nou'n ganny dir i en *Law and Order issue*, se Lapolis ki bezwen travay pou anpes drog antre dan pei oubyen si i antre dan pei, anpes li ariv kot bann adikt.

Sa nou konnen i bezwen ganny fer. Dezyenman i annan en demann *reduction*. Ou bezwen osi kapab fer sir ki i annan serten prosedir oubyen program pou anpes dimoun anvi drog, malgre ki i la lo marse.

E la osi i annan en kantite travay pou ganny fer, pou anpes dimoun anvi drog. Oubyen pou touy *supply by*

killing demand. Akoz i annan 2 fason regard sa.

Swa ou anpes drog antre alor dimoun pa pran drog aköz napa. Swa ou fer drog telman aksesib ki dimoun pa pou bezwen *supply*, aköz drog i ava aksesib dan en fason legal.

Nou pa pou al dan sa ozordi, i pa le moman, nou pe *repeal* en Lalwa. Me mon konnen ki sa se en bann deba ki sa *unit* dan Minister Lasante pou bezwen kontinyen avek bann ansyen travayer APDAR.

E apre i annan *harm reduction*. E la mon toutafe *onboard* avek, lefet ki i bezwen al dan Minister Lasante e non pa en lot Minister.

Akoz, parey VP in dir, se Minister Lasante ki pli *linked* avek sa kestyon *harm reduction*. E mon krwar se la enn bann gran sikse APDAR.

Si zot ava rapel, avan ki *methadone* ti konmans donnen, nou ti annan en kantite problem lasante premyerman, proliferasyon *HIV*, bann sereng ki ti ganny servi, *Hepsi* ki'n vin en problem ki nou pa ti konnen en zenerasyon *ago as* sa lanpler. E donk –

E non selman sa. Me vol tou bann *addict* ki ti bezwen larzan, pa ti travay, zot ti vole, *including* vol zot prop manman oubyen zot prop frer ek ser dan lakaz.

Vol manze, nou tou nou'n konn sa, nou ganny en kantite deba lo la. *Methadone* in permet - e la mon krwar sa set en sikse ki nou bezwen rekonnet in permet annan 2 keksoz.

Enn in *reduce* lensidans *harm* ki bann dimoun in *self-inflicted*, bann *addict*. E in osi redwir dan en fason enportan sa bann lensidan vole eksetera, pou bann dimoun ganny larzan pou zot al rod zot *fix*.

E sa parey mon dir, i en sikse *methadone*. Me nou bezwen regard li osi dan en lot konteks. Akoz *methadone* paret nou konnen - e i annan bokou dimoun ki pa kontan, pa kontan ki nou pran larzan *tax* pou nou donn bann *addict* ki selon nou, se bann dimoun ki'n anmenn sa lo zot prop lekor. Akoz ki nou, nou ava bezwen la pou zot.

Me paret *VP* in eksplike Minister Lasante pa gete lekel ki vin devan li.

Ler en dimoun i vin avek kanser poumon, akoz in fim 40 sigaret par zour pou 40an, Minister Lasante pa dir li "sorry men, sa lili nou bezwen akoz i annan en dimoun. Ou ou'n al rod sa ou'n enpoz lo ou."

I pa gete, i tret ou. E mon krwar nou bezwen regard li dan sa konteks. E dan sa konteks parey mon'n dir,

methadone i en program ki nou donnen.

Me problemm avek *methadone* se ki li osi i en drog. Sel keksoz ki i fer se ki i tir ou lo en drog e met ou lo en lot ki pli oubyen mwen nosif, pli benefik, si ou anvi dan en serten sans.

E sa si nou zis fer sa, e se sa kot *APDAR* in kaye *unfortunately*. Nou apel sa en *low threshold program*. Nou pa fer plis.

Me pou tir en adikt konpletman oubyen pou reabilit li, i annan bokou lezot pa e nou pa pas ladan ozordi pou fer *mentoring*, ou bezwen annan swiv, ou bezwen annan landrwa kot ou pou al *detox*.

Prezan ou annan tou sa bann lezot servis ki larzan e kapasite pa'n permet nou annan ziska prezan. Donk nou pa'n kapab fer sa e nou'n kay lo *methadone* ki'n annan son sikse.

Me *the problem is*, menm avek en *high threshold methadone program*, relapse i o e nou konnen ki i pa tou dimoun ki pou antre ladan ki pou sorti byen *and off heroine* en zour.

In fact mon ti konsernen pou mon aprann ki 80 pousan dimoun ki sorti lo *heroin* i relapse dan en peryod 8an. Donk *it's a major statistic*.

I difisil, mon war Ms Low-Wah pe dakor avek mwan. I en gro problemn. I pa en problemn kot i annan en solisyon e ou kapab dir dan 10an si nou fer sa tou dimoun pou *off heroin. It's not going to happen.*

Alor se pou sa rezon ki nou bezwen konsantre lo pandan ki Lapolis ek Lafors Lord pe diminyen *supply*, pandan ki SBC avek lekol pe edik dimoun pou *reduce demand*, Lasante i bezwen dil avek *the harm reduction*. Akoz sa i la, e i la toulezour, e i pou la pou en peryod letan. Donk vwala en pti pe Mr Speaker, kote nou ete ozordi.

Alor tou sa ki nou pe, tou sa ki nou'n fer i pou bann rezon valab ki'n ganny donnen, se nou pe *move* en program *from APDAR* e nou pe met li anba Minister Lasante.

Sa ki, sa dezyenm keksoz ki mon ti a kontan aprann ozordi avek Minister Lasante, se *what then?* Enn fwa ki zot in pran sa *onboard* e zot in reorganiz *APDAR* e ki zot pe *run the low threshold program*, ki mannyer nou pou *move to the next step?*

Which is build capacity pou nou kapab al lo en *high threshold program*, kot nou ava kapab target bann dimoun enn par enn.

Nou pa pou pas letan ozordi, mon annan mon prop lide ki mon'n partaz avek *PS Valentin*, avek *VP* e mon'n partaz avek detrwa Manm Lasanble. Sa se mon lide *for what is worth.*

Me mon konnen ki i annan bokou lide ki nou kapab met ansanm koman en Lasanble, koman en Nasyon pou siport sa *program going forward.*

Alor Mr Speaker, eskiz mon pou letan ki mon'n pran, me mon i anvi koz premye, akoz mon annan en pti konesans dan sa size.

E mon ti anvi donk sitye sa, donn en pe *background* lo sa ki'n arive pei *APDAR* in ganny *set-up.*

Pou nou konpran egzaktaman ozordi kote nou ete e pou nou demann avek *panel* e sirtou avek Minis, *PS Valentin*, kekfwa Ms Low-Wah, *what now?* Eksplik nou ki sa ki nou kapab *expect* dan sa lalit kont sa fleo ki drog avek lalkol.

Avek sa detrwa mo Mr Speaker, mon remersye ou pou letan ki ou'n donn mwan. Mersi.

MR SPEAKER

Mersi Onorab Georges. Mon ava apel pou entervansyon Onorab Aglae.

HON EGBERT AGLAE

Mersi Mr Speaker. Bonn apre midi Vis-Prezidan, AG, dokter e 2 dokter. Mr Speaker mon'n asize mon'n ekout en pe largiman ki Vis- Prezidan e rezondet pou *repeal* Lalwa APDAR ki an egzistan.

E mon'n sorti ek en konklizyon. E baze lo konklizyon, mon pou get keksoz dan 2 fason.

E premye konklizyon ki mon'n tire, se ki Gouvernman atraver son bann reform, restriktirasyon, in war li annan gran nesesite pou koup bann depans ki swadizan zot santi i pa tro nesese dan bann diferan lorganizasyon ouswa departman.

Me lanaliz lo en lot kote si nou pou get li an term en servis, en servis ki annan en lenplikasyon medikal avek, kot nou pe koz en adiksyon.

E nou pe koz pasyan osi, i fer mon realize poudir petet ki valer ki nou anvi atase avek en program dan sa laliny e magnitud ki sa problem i poze dan en sosyete.

Menm si nou pe dir, parey granmoun i dir, lasante ou pa tro kapab egal li avek en sonm, akoz i konsern lavi. E lavi ou pa kapab met en kou en sonm larzan avek.

E pou mwan Mr Speaker, koman en dimoun ki'n pas atraver sistenm Lasante, mon'n travay laba pandan plis ki 8an, mon war li nesese pou

nou anmenn osi refleksyon dan sa laliny, kote ki nou anvi arive ouswa ale.

Pou nou kapab *tackle* sa fleo ki vreman difisil. I en lalit ki nou tou nou bezwen pe fer nou bout avek.

Mr Speaker avan mon al tro lwen, mon anvi retourn en pti gin an aryer, Onorab Georges in sit enn de akoz in la lo konmansman li menm li dan kreasyon, in form parti si mon pa tronpe lo sa *Board*.

Lazans ti ganny kree pou li menm li anpar tou sa bann lezot akter ki ti pe lalit kont drog e fleo, e lalkol.

Sa ti son bi prensipal kot i ti pou donn bann kordinasyon, etabli osi bann Polisi nesese pou kapab annan lefikasite dan lalit sa 2 fleo.

E letan Sesel li in pas li dan en peryod kot fleo eroin ti pe ronz nou sosyete, bokou nou bann zenn sirtou, nou ti war poudir ti annan en nesese dan en lizards pou kapab rod bann solisyon.

E nou tou petet ki fer nou bann resers, nou konnen poudir i napa en solisyon direk pou lit kont sa bann kalite fleo.

Bokou pei in antre li dan diferan fason fer pou zot kapab *tackle* sa fleo drog li menm. E mon kapab dir, pou ganny en sikse 100poursan dan sa laliny i vreman limite.

Parfwa ou bouz devan, parfwa i annan bann lezot fakter ki fer ki ou tant pou regrese. Me sa i pa vadir ki ou perdi lespwar, ou *give hope*.

I zis parey si ou annan en manm fanmir ki tonm dan sa adiksyon, ou kapab deside pran ou larzan anvoy li deor, parey i annan serten i fer pou al *detox*.

I ale, dan 2 mwan, 3 mwan i tournen, apre i tonbe e fanmir i war i bezwen kontinyen apiye akoz i son zanfan.

E pou mwan ler nou dir “Sesel i pou tou son zanfan”, mon mazin dan sa kalite direksyon kot enn mon frer ou ser i war li dan bann sityasyon ki petet i pa’n mazin en konsekans ki i pou ladan ozordi.

Me in arive, i war li ladan. E pou mon listwar *APDAR* Mr Speaker avek son bann sikse, Onorab Georges in dir in avoue ki in annan sikse ladan. In annan bann diferan sikse.

E nou koman bann Manm Lasanble, nou ti ganny sans zwenn avek bann akter lo bann *success story* ki sa lorganizasyon in pas atraver.

Premyerman in ede anmenn en konbat e en rediksyon osi atraver program *methadone*, redwir en pe bann ka krim, vol ki ti pe arive. Sa wi in fer.

In osi ede konbat en pe bann maladi kominikab, sirtou atraver bann *heroin user* ki ti pe pike. Kot ti annan bann program lesanz sereng ti ganny fer. E kot nou ti war nou en moman letan avek en nivo epatik.

Bese, ki ti pe leve, e Minister Lasante osi ti pe kriy ayo. E menm dan Servis Prizon nou ti war bann difikilte maladi ki ti pe arive.

E program in ede *curb* en pe sa sityasyon, ki fer ki ozordi keksoz i dan en fason stab. En lot keksoz ankor ki enportan positiv dan sa direksyon, se ki i kapab en program, in kapab osi retourn serten lo bann adikt dan lanplwa, dan en lavi sivil, sosyete sivil.

E redonn zot en lespwar, poudir malgre ou en adikt, mon kapab *still* kontribye pou mon pei. E se sa direksyon ki mon santi nou devret pe kontinyen e nou pe ale.

Mr Speaker *APDAR* li menm li avek sa *repeal* ki pe ganny propoze, petet mon ti a demann *VP*, ki direksyon ouswa *way forward* ki nou anvi pran kot i konsern sov nou bann adikt.

Malgre i pou pran letan e letan, nou bezwen asize e fer en bon refleksyon. Nou politisyen, ozordi nou pe mazin wi, nou bezwen koup bann kou.

Me lo lot kote bann eksper medikal, li i dir ou nou bezwen sov sa bann ki pe tonbe. E pou mwan ler mon pe get sa propozisyon pou vin devan, pou pous sa Lazans anba Minister Lasante, eski nou'n pare pou sa?

Ler mon koz demann sa keston, i annan 2 kote sa *coin*. I annan kote lenfrastruktir ki li menm li Minister Lasante i kwense kot i ete, pou li kapab *run* son bann program.

Depi son *outpatient*, depi son *admission*, depi son spesyalis tousala. I deza napa ase lespas, avek bann program ankor ki Minister Lasante i bezwen war li pe fer baze lo bann rekomandasyon Minister Lasante.

Eski lespas pou annan ouswa nou pou bezwen war nou pe al rod en lot landrwa pou kapab donn sa servis. E osi sa laspe resours imen. Ou konnen poudir la mazorite sa bann travayer *APDAR* ti *once* en travayer Minister Lasante li menm, ki ti bezwen, zot ti ganny *recruit* pou al laba.

E mon'n tann *VP* nonmen ki poudir zot *package* pou reste parey. Mon swete ki zot *package* ek *APDAR* ki ti en pti pe pli meyer, i reste parey. Si zot pe retourn li anba Minister Lasante.

Me eski nou pa pou al antre dan en lager travayer

prezan la. Letan ki Minister Lasante la li, i en pti pe *overwhelmed* avek sityasyon *COVID*.

Kot nou vwar poudir i annan servis esansyel ki ganny neglize. E la nou pe vini nou pe anmenn en lot servis anba li, ki sa servis li menm li i annan son bann kompleksite avek travay, avek sa bann adikt li menm.

Eski nou pa pou negliz, aköz dan program rehabilitasyon i annan bann diferan letap. E ou bezwen annan serten pasyans pou kapab swiv, ouswa zis nou pa pou vini, la ou *methadone*, al se ou, nou pa enterese ki arive ek ou apre sa, retournen demen vin pran toulezour.

Eski sa pa pou vin sa kalite latitud? Mon konsernen ladan. *Ok?*

Lot bout ankor mon krwar ki enportan, se *procurement* pou sa *methadone* li menm, ki avan sa ler i ti komanse sete Minister Lasante menm ki ti pe fer vini sa, pe stoke.

Me apre nou'n vwar poudir zot ti annan serten kontrent e ti sorti anba zot sistenm pou procure e *storage* osi pa ti pe kit kot zot laba, ti pe kit dan en fasilite ki en pti pe pli sekirite.

So eski la prezan nou pe dir, son zerans li menm li i ava vin dan menm landrwa kot tou

bann *procurement* Lasante pou vini e keksoz a ganny zere?

An menm tan nou'n pran kont poudir dan lepase prosedir pou ou kapab fer sa sistenm *Procurement*, i bezwen pas a diferan letap, akoz i en *control drugs* li menm li.

E in annan bann retar, akoz petet serten desizyon pou pas dan serten lanmen, ki'n ganny retar, ki'n fer ki nou ti annan bann mankman osi.

Eski nou pou pran kont tousala, pou annan son seksyon ki pou dil avek sa pou fer sir ki ou pa a okenn moman annan problemm mankman *methadone*?

En lot laspe ki petet mon ti a kontan touse, bokou pei zot annan bann lazans menm dan sa zanr ki ede konbat. Me selman zot tonm anba en *parent Ministry*.

E zot *answerable* avek sa Minister li menm li. E la ler mon pe gete, nou pou al met li anba Minister Lasante li menm li. Eski sa manda li menm li, Lalwa pe sorti la, akoz Lalwa *APDAR* i annan serten bann rekomandasyon ki ganny gide, sirtou anba atraver, anba *OECD*.

Eski nou pa pou negligiz serten sa bann konponan enportan, ki'n ganny site anba la? Pou fer ki nou tret sa bann adikt li menm li koman en senp pasyan parey en dimoun

ki vini avek en latou swa en lafyev dan plas donn li sa swen, sa swivi.

Akoz sa tretman la i annan son kour term, mwayen term, long term e osi i annan son fason kot si nou kapab reisi reabilit li koman en dimoun normal dan lasosyete pou li kapab kontinyen.

E pou terminen Mr Speaker, mwan mon ti a kontan met sa devan. Mon pa konnen si akoz *APDAR* ti pe ganny zere par SS Herminie ki ti la, nou tou nou konnen.

E ki pa ti en dimoun popiler ki bokou pa kontan zot, sirtou dan *LDS*. Ouswa mon pa pou, mon a poz kestyon ankor.

Si *APDAR* ti pe ganny run par en lot dimoun petet, eski nou ti pou pran en desizyon parey, ouswa zis nou anvi retir en Lazans ki'n anmenn en pti *short legacy* dan sa konbat pou adiksyon e met li akote e fer dimoun tou dimoun bliye e konmans ek en lot.

Ouswa, baze lo bann pwen ki mon'n met devan, Minister Lasante, sa preparasyon si i pa ganny fer byen, i pou war li avek en montanny pli o pou li monte. E a lavenir nou riske war nou avek en lot kalite Lazans ki pou sanz non pou kapab travay avek sa.

E Mr Speaker atraver ou, mon ti a demann *VP* osi, e nou annan en dokter parmi nou dan lasal.

Petet ki bann gidans, ki bann lorganizasyon enternasyonal i rekomande ler ou anvi fer en program reabilitasyon pou ou kapab sov tou sa bann zenn?

Ki mon pa swete nou kontinyen annan ki tonbe, me lefe i arive ki zot in deza tonbe koman en pep, koman en Gouvernman mon krwar ki annan serten responsabilite, nou rod fason pou nou sey ede.

Malgre ki nou pe servi *taxpayers money*, i mon larzan e ou larzan, i larzan nou tou la anndan. Me parfwa ou bezwen mazin sa bann ki tonbe. Mersi Mr Speaker.

MR SPEAKER

Mersi Onorab. Ou annan en pwen pou fer la Onorab Georges?

HON BERNARD GEORGES

Wi avek ou permisyon Mr Speaker, mon ti anvi zis pran laparol pou mon ofer mon *apology* avek Dr Low-Wah, mon'n apel li Ms Low-Wah atraver mon lentervansyon. *In fact* son vre tit se Dr Low-Wah. *So apologies* donk. Mersi.

MR SPEAKER

Thank you, mersi. Lo sa kote, Onorab Naidu.

HON SATHYA NAIDU

Bonn apre midi Mr Speaker, bonn apre midi *VP* ek ou delegasyon, bonn apre midi tou koleg Onorab e tou dimoun ki a lekout. An sa ki konsern *APDAR*, ti'n vin an kreasyon an 2017.

Annefe mon ti pe asiz dan galwar anler, mon ti pe swiv deliberasyon lo sa *Bill* ki'n permet kreasyon sa antite. Annefe ti en Lasanble 15 lo 10 ki ti pe ganny dirize par *LDS* sa letan, ki'n les Legzekitiv fer le neserer.

Me malerezman pou en rezon ou lot, Legzekitiv pa'n kapab egzekite e nou koman en pep, nou ti pe oule vwar keksoz i sanze.

Se pourtan se pou sa rezon ki le 25 Oktob 2020, pep Seselwa in vot pou en sanzman. Savedir en nouvo lapros, nou pa ti kapab kontinyen konmkwa i ti *business as usual as then*.

Paz 27 nou *manifesto* paragraf 3 ek 4 i met lanfaz lo sa laspe prevansyon e reabilitasyon. Me Onorab Georges in fer resorti ki i annan *low threshold methadone program* apre i annan *high threshold methadone program*.

Mon ti pe pas lo bann *statistic* ki nou, nou ti'n

resevwar koman en Lasanble dan mwan Mars ler nou ti pe depouy zot Bidze.

E mon'n vwar ki 90 poursan si non plis i lo *low threshold*. E ler ou fer en pti gin resers ou regarde, savedir ki zot pe pran eroin an menm tan ki zot pe pran *methadone*.

E se sa ki nou'n dir avek sa pep laba deor. E zot ki zot ti fer dan letan konpany, zot ti'n servi sa koman en baz pou dir *LDS* pou aret *methadone*.

Well dan nou manifesto ki pep Seselwa in vote pour, nou'n fer resorti ki nou pou kontinyen avek sa program *methadone*, me selman i pou annan en diferans.

En diferans pa savedir menm zafer parey zot, zot ti fer. En diferans savedir nou bezwen met lanfaz lo laspe reabilitasyon.

Mon'n koz avek plizyer sa bann manrmay e mon'n demande akoz ki zot vwar li difisil pou zot pa kontinyen avek sa program?

Akoz eski zot ganny sa problem *relapse* par ler? *Addiction is not what we think it is. We think the way we look at addiction in itself.*

E lo sa size ler ou pe regarde, si napa sipervizyon pou fer sir ki sa zenn i kapab kontinyen avek sa program *methadone*, kot i kapab sorti lo *low threshold* e al lo *high threshold*.

E parey Onorab Georges in dir, i 75poursan adiktiv. Me selman nou napa le mwayen pou adres sa, pou fer sir ki nou pa ganny en lot zenerasyon ki pou soufer avek sa kriz.

E ler nou pe get *high threshold*, dan ka Saint Louis mon pou war i annan apepre zis 10 zot. E nou annan apepre 200 zot an tou koman e bann kliyan, e sa i pe afekte mon distrik.

I fatig mon lespri dan tou kwen. Stevenson Delhomme, kot *DA's Office*, Belonie, *Spectra*, Lari Hangard, partou kote *it really hurts me*.

And it really hurts me, i mon swe se ki sa lazans ki pe tonm anba Lasante, zot vin avek en Polisi kler lo ki mannyer eski nou pou kapab pouse? Mon konnen i difisil, zot annan bann konstrent an sa ki konsern mendev.

Me selman la vi ki zot pe tonm anba Lasante, wi nou dan en kriz *COVID*, me selman fodre ki i annan lanfaz ki ganny mete lo bann adikt pou donn zot sa swen ki zot, zot bezwen.

Nou bezwen met lanfaz lo la. E an sa ki konsern lezot Departman ki nou annan dan Minister, Ledikasyon, i enportan ki lo kote Ledikasyon nou met sa lanfaz neser dan bann lekol.

Kot size *Social Studies*, i enportan ki le nesese i ganny fer. *Wi it's not got something to do directly with the Ministry of Health.* Me selman i bezwen annan sa sinerzi an diferan Departman. Menm zafer i aplik pou Departman Sosyal. *You also have to get involved.* Menm zafer i aplik pou Minister pou zafer fanmir, *you also have to get involved!*

E nou koman bann politisyen, nou tou nou annan en rol pou zwe vizavi sa program ki Minister Lasante i anvizaze anmennen vizavi reabilitasyon bann manrmay. Annou pa dir i enposib.

Wi i pou ekstrememan difisil, demen nou pa pou war rezilta deswit. Me selman nou bezwen met en zefor konkret vizavi reabilitasyon.

E mon swe se ki atraver sa Bidze ki pe vini, nou sipoze annan apepre 100milyon pou fer sa proze ki Linyon Arab Ini pe siport nou pou ganny en *Rehabilitation Center*.

E mon swe se ki ler sa i arive, nou pou konmans war rezilta. Be annou pa bliye, nou annan bann zil. Si i amann *high threshold methadone program users*, aköz eski nou pa pou kapab met en pti gin lanfaz, anvoy en pe travayer, ki Onorab Georges in dir, *the selfless, the dedicated, the devoted.*

If so, I would like to say some of you on an island, helping out these kids out. Pou nou kapab anmenn sa reform nesese. Pou nou kapab dir ki sa Gouvernman ankor dan sa 5an ki fini, *we have made a change. Because it hurts me, it pains me.*

I annan bann zour kot mon pa'n dormi aswar, senpleman aköz mon war sa bann manrmay, bann manrmay ki mwan mon'n lekol avek, *and today to see them in that state, it pains me.*

Yes I will repeat it over and over again. Because have the previous regime done their job right, we would not be in the problem that we are in today! We would have been far better of but we are not.

Nou bezwen rod en lot mwayen. E se pourtan pou sa rezon pep Seselwa in donn nou sa manda. Wi mon pou repete! Wi sak fwa nou ganny loportinite pou repete, nou pou repete. E nou pou dir, aköz nou pou anmenn sa diferans ki nesese.

I enportan ki nou regard lezot pei, regard en model kot nou kapab met li an aplikasyon. *Portugal, well* zot ti fer en keksoz en pe radikal, zot ti'n *decriminalize* tou bann *hard drugs*.

Me selman dan lannen 2000, 15 pli tar ki ti'n arive ek *Portugal?* 50poursan zot

dimoun ti'n sorti lo eroin. Me selman *Portugal* pa Sesel, *Portugal* in bezwen annan bann dimoun ki annan sa lekspertiz nesaser pou kapab fer sa tranzisyon.

Dan lot kote, en lot pei en pe ekstrenm, se *President Duterte, Philippines*. I ti'n *issue a Shoot to Kill Policy*. Apepre 17 mil users in mor dan peryod 6 mwan.

La i annan en zafer devan *International Criminal Court*. Nou pa pou kapab pran sa byensir, akoz nou annan en *President who believes in the Rule of Law*.

Who believes in the fact that the rights of the methadone users are respected at the same time and they are treated like human beings.

Nou Gouvernman ozordi i bezwen tret sa bann *methadone* users koman bann imen. Annou pa tret zot konmsi zot bann zannimo.

Si nou ti kapab tay deryer zot pou ganny zot vot, ou pa pou kapab tay deryer zot pou fer sir ki zot kapab dres zot lavi?

Mwan lo mon kote, dan mon distrik, mon pou demann e mon pou lans en lapel avek mon bann zabitan. Mon pou anmenn en program devan lo sa size pou ed Minister Lasante.

Si tou nou, fer le nesaser lo nou kote koman

bann endividi, pou ede *at least* enn ou de, nou pou kapab. *Don't say it's impossible, just say it's possible and try your best.*

This is the kind of encouragement ki mon santi ki mon lekip nou kote Legzekitiv i bezwen, i pa fasil ditou. Me a sa ki konsern lalkol, tou resaman, nou'n war ki *moratorium* in ganny tire.

Mon swe ki sa moratorium ler in ganny tire, i annan bann reg spesifik ki vin avek a sa ki konsern prodiksyon. I annan serten endividi, *sorry*, mon bezwen dir, i enport lalkol, bann *spirit* sorti aletranze, i vin isi Sesel, zot melanz li apre zot vann. Mannyer? Pti Ponm, be sa Pti Ponm ki pe detri sa bann vyeyar ozordi. *It's sad.*

Nou annan bann dimoun ki zenn, bann dimoun ki aze, eskize, bann dimoun ki aze ki dan lalkol ouswa drog. *And it's a sad state that you are in.*

E a sa ki konsern bann marsan dan mon distrik, mon pe fer en lapel avek zot, obeir sa Lalwa ki konsern lavant bwar, sa ler ki vin avek, respekte li.

Akoz ler Lalwa pou ganny met an aplikasyon e ler zot *license* pou ganny sispann, pa vin rod mwan silvouple! Akoz in plis ki ler pou zot osi koman bann marsan, pa zis fer profi lo malere, i pa *ok*.

It's high time we stop this!
Mr Speaker, se sa mon bann santiman vizavi sa size. Mersi bokou.

(APPLAUSE)

MR SPEAKER

Mersi. Mersi Onorab. Nou a ekout Onorab Zialor.

HON NADDY ZIALOR

Mersi Mr Speaker. Bonn apre midi Mr Speaker, bonn apre midi Vis-Prezidan e ou *panel*, bonn apre midi Lepep Seselwa.

Mon'n ekout mon koleg Onorab Naidoo avek pasyon, senpleman akoz i en zenn, e wi koman en Lasanble nou konsernen letan nou vwar nou bann zenn ki ti kapab pe fer en kontribisyon eksepsyonnel vizavi son pei, me nou war ki zot in tonbe.

E mon pran mon parol apre midi pou mon aport mon soutyen vizavi *repeal of sa Act*. Me an menm tan pou zwenn avek Vis-Prezidan e avek Minister Lasante pou nou regarde *what is the way forward*.

Ki nou fer an plis? Eski nou kontinyen avek sa menm metaform oubyen parey *LGB* in dir, nou ouver laport pou eksplor posibilite pou enn, revwar bann diferan metod

reabilitasyon ki nou kapab ofer nou pep.

Me pli enportan, e la mon anvi azout detrwa mo lo sa ki Onorab Naidoo in dir, nou sosyete i bezwen konpran ki sa 5mil ki *VP* in nonmen apre midi i 5mil nou dimoun, i nou frer, i nou ser, i nou vwazen.

Probableman i pe reste dan menm lakour avek nou. E nou koman en Gouvernman nou bezwen aksepte en latitud kot nou pa zize, nou pa pini, nou pa imilye e nou pa abize, me nou tyonbo lanmen nou frer e nou ed li pou etabli son lavi.

Mr Speaker bokou in ganny dir lo *APDAR* ki swa pozitiv, ki swa negativ, ki swa *proactive*, ouswa inovativ.

Me sa ki enportan se ki, ou konnen, fodre pa ki ou donn lenpresyon ler nou pe fer transfer administrativ ki fizikman sa bann dimoun pou sorti kot zot ete pou vin *flood in* dan Lopital Victoria e pou napa plas.

Non Mr Speaker. Sa ki pe ganny dir, se ki administrativman, petet Vis-Prezidan si mon mal ou ava koriz mwan. Nou pou annan en antite ki pou responsab *day-to-day running of* bann fonksyon ki *APDAR* ti pe deservi.

E mwan mon anvi al pli lwen ki sa. Malgre petet i pa sa moman pou nou fer

rekomandasyon. Mon pe mazin, *well* se en adikt *actually* ki'n fer sa propozisyon avek mwan.

Ki li i anvi sorti, e i vwar serten defayans parfwa ki i annan dan administrasyon. I annan sa program donn *methadone* dan bann distrik ki pe donner dan bis.

Mwan mon pe propoze, petet Dr Valentin ou la, ou a regard dan sa posibilite, par lefe ki nou'n dir ki i en *public health issue* e nou anvi valoriz e donn valer si ou oule nou bann frer.

Letan ki nou war en laliny devan en bis kot Ladministrasyon Distrik, nou *mindset* osi i bezwen sanze vizavi sa bann dimoun.

Annou pa koul, "sa bann manmay *methadone*, zot pe al pran zot latizann bomaten." So gradyelman ki mwan mon pe propoze, dan bann *Regional centers*, nou annan bann lezot Sant Lasante ki pa neserman i operasyonnel on a *daily basis*.

Annou bouz sa servis dan bann Sant Lasante lo nivo distrik. Ki swa i a ava ganny servi koman sa platform pou sa bann adikt al pran zot latizann.

E ou pa ava annan sa *timeframe* ki, par egzanp ou ti Anse Boileau 9er, 10er. E souvandfwa ou war en adikt li i reste Anse Boileau in mont

10er i bezwen desann Takamaka pou li al pran son latizann.

So ou ava annan par egzanp Beoliere klinik ki li i ouver e i donn *methadone* en pti moman depi 8er bomaten ziske 3er.

En adikt zour li i santi la i son ler pou li al pran son *methadone* i ava al pran. Mon'n travay tre longman si ou oule avek sa group dimoun, dan letan ki ti annan program *URS*, zisteman an kolaborasyon avek *APDAR*.

Kot nou ti pe plas sa bann group dimoun) ki mon prezimen *back then* zot ti pe ganny konsidere koman bann dimoun vilnerab) dan lanplwa. E apre midi i annan sa mo *low* ek *high threshold* ki'n ganny mansyonnen longman.

E la mon krwar ki i annan en travay ki pou bezwen ganny fer, sirtou avek bann ki lo *low threshold*.

E mon prezimen dan zot kapasite koman bann profesyonnel Lasante, zot ava regarde ki pli meyer fason. Zisteman otrefwa la nou ti pe koze dan Lasanble, bann diferan travay kominoter ki annan pou fer ki bezwen mendev.

Petet sa i ava ganny enkli dan program reabilitasyon nou bann dimoun. Mr Speaker en mesaz ki mon anvi pase deor laba.

Ki tre souvan isi dan nou Lasanble, ler i donn en fraz, nou pran zis en mo ladan e nou vir li anba lao. E mesaz ki mon anvi pase letan mon'n tann Prezidan koze, se ki pou mwan mon konpran.

Parske ou'n pran bann profesyonnel Lasante ou'n anvoy kot APDAR, e la zot pe retourn dan Lasante. So pou mwan i pa fer en diferans pou regarde *in terms of whether* kote zot pou ete, si zot pou kapab kontinyen delivre.

Mon mazine ki i ava dan en pli bon fason la zot koman bann profesyonnel, kot ler ki nou pe dir nou pe al Grand Anse, nou pa bezwen pas par Takamaka, nou pa bezwen pas par Anse Royale, nou konnen poudir nou annan en semen ki apel La Misère ki nou kapab ariv en pti pe pli vit, pli byen. Menm si nou pou bril en pti karbiran. Sa ki konpran mwan, i ava konpran mwan.

Mr Speaker, en mesaz osi ki mon anvi pas avek, e sa i en mesaz ki mon ti pas tre for letan ki mon ti fer mon premye Diskour Leta Lanasyon.

E mon pa anvi ki ankor enn fwa nou konfiz nou bann dimoun, se ki nou Gouvernman pou kontinyen rod mwayen, rod fason pou nou ed nou frer ek nou ser ki'n tonbe, pou nou met zot lo zot lipye.

Menm si parfwa pou annan letan kot nou pou bezwen koz for, fran, dan en fason *bold*, i pa dan en fason kot nou anvi detri zot. Me nou anvi atrap zot lanmen e met zot lo sa semen ki apel lavenir.

Avek sa 2 pti mo, mon reasir mon *Leader LGB* e reasir Lepep Seselwa ki zot pou ganny mon sipor e nou sipor pou nou met en Sesel pli sen, pli prop e pli prospere, an se ki konsern eliminasyon e rehabilitasyon drog e nou bann frer ki'n tonm dan drog. Mersi.

(APPLAUSE)

MR SPEAKER

Mersi Onorab. Nou a ekout Onorab Vidot.

HON AUDREY VIDOT

Mersi Mr Speaker. Mr Speaker labi drog ek lalkol oubyen labi sibstans, pou tou touzour reste en problem mazer pou Sesel ek Seselwa, toultan zefor e langazman serye pa ganny mete pou elimin drog antre Sesel.

E si Lotorite pa anmenn devan lazistis sa bann endividi ki pe detrir lavi pou pep Seselwa pe persi lespwar ki drog, biznes drog pou ganny eliminen Sesel.

Wi mon a dakor ki lalit kont lavi sibstans i bezwen en

travay lekip, mon kominote Roche Caiman pa ganny eparynen avek sa bann problemn labi sibstans ki swa drog el lalkol.

Mon'n tann e vwar plizyer paran kot larm pe marse dan lizye, akoz zot zanfan in tonm dan labi sibstans ek lalkol.

Me mon bezwen rekonnèt e dir mersi pou bann paran e bann travayer APDAR, pou pa perdi lespwar lo nou bann dimoun ki'n tonm dan sibstans, me ki'n ganny loportinite pou ganny sonnen pou ganny trete e ki ozordi i annan zot ki'n nobou kapab refer zot lavi.

Mr Speaker nou'n ganny dir a plizyer repriz ankor enn fwa ankor par Vis-Prezidan ki plis ki 50mil Seselwa i ganny, i servi sibstans tel parey eroin regilyerman e kot bokou plis ankor i ganny servi dan bann lezot sibstans enkli lalkol.

Alors akoz ferm APDAR? Akoz ferm en Lazans ki plizyer pei pli byen devlope ki nou isi Sesel, me avek bokou problemn drog parey nou menm, pe fer sitan byen? Akoz en Lazans parey APDAR pou frenmen?

Nou ti pe ekspekte Vis-Prezidan eksplik sa bann paran ki la deor, ki son zanfan in kapab rekipere apre ki APDAR in ed li sorti dan sa kosmar, akoz ki Gouvernman

LDS i anvi ferm li net? Sa desizyon met li anba en lot parasol parey Onorab Georges in fer resorti.

Ki lespwar ki ou Gouvernman i annan pou sa bann paran, menm zanfan ki pe rod sa sipor pou zot kapab, zot bann pros kapab sorti dan bann labi drog ek lalkol? Kan zot in deza nou tou nou'n tann bann promes LDS pou elimin drog dan 100 zour e rezilta sa bann swadizan negosyasyon atraver bann trafiker pour ki zot a donn en lape nou pep e avek zot bann drog.

Pa krwar Seselwa i bliye se zot Prezidan ozordi ki ti *The Leader LDS* avan le 25 Oktob, ki'n fer sa bann promes avek pep Seselwa. Mr Speaker sa bann parol, sa bann bel parol ki Gouvernman LDS i reste pa montre poudir zot annan en lentansyon senser e en volonte.

Mr Speaker sa bann bel parol gouvernman LDS ki zot pe dir i reste en lentansyon e volonte ferm zot Gouvernman pou re double zefor, mon dir i pa senser. Akoz zot in telman *fail* pou zot premye lannen, premye lannen dan gouvernans.

Nou pa konnen si zot 100 zour pou enkli dan zot dernyen manda 5an. Petet la Seselwa a vreman war lespwar. Annou pa, nou pe demann rezilta lo negosyasyon

sa bann trafiker. Nou pa ekspekte nou pou gannyen akoz menm a plizyer repriz zot bann Minis pa ni menm kapab ganny en larepons avek zot Dirizan lo la, e zot pa kapab reponn nou bann Manm Lasanble.

Pa fini pa bliye zot bann bon program *cold turkey* ki zot ti koze aotvwa, tousala Seselwa pa'n bliye. Ti pou enteresan konn detay sa bann lanfaz an plis ki zot dir zot pe vin avek.

Depi setyenm Lasanble in komanse, nou'n tann zis koz lo bann gran, gran plan ek stratezi, me sa Gouvernman pa ankor kapab vin donn detay sa bann gran, gran plan ek stratezi. Menm atraver la zot pe dir zot pe transfer *APDAR* anba Lasante nou pa ankor tann detay pou vwar vremen lenplimantasyon, pou *convince* Seselwa poudir vremen zot en Gouvernman ki serye.

Mr Speaker ozordi i en loportinite pou Vis-Prezidan donn levidans konkret ki *APDAR* pa'n kapab kontinyen, pa kapab kontinyen koman en Lazans, pou lalit kont labi sibstans. Donn nou levidans. Dir nou poudir i pa'n performen, i pa kapab, se pour sa rezon pli gran lenportans nou pe refer li avek Lasante.

Akoz i malere, i malere zis atraver son komanter ki in

fer resorti, ki i war li i bezwen fer son pwen politik lo kantite depans ki ganny fer anba en Sekreter Deta pou *APDAR*.

Nou dan *United Seychelles* nou'n vwar li klerman Vis-Prezidan. Sa i en zes ek ou Gouvernman ki zot annan en rankin personnel kont Dr Patrick Herminie!

(Interruption)

MR SPEAKER

E!! Bann Manm aret en pe.

HON AUDREY VIDOT

Pa trakase zot pou ganny zot loportinite pou reponn mwan zot!

MR SPEAKER

Aret en pe komanter silvouple!

HON AUDREY VIDOT

Bann letan kot *APDAR* in fonksyonnen koman en Lazans, in kapab ganny anmenn tou bann lezot Lazans, lorganizasyon ansanm, bann endividi pou travay ansanm dan sa lalit kont labi sibstans.

Manm Lasanble lo kote *US* avek *LDS* dan sizyenm Lasanble in form parti sa lekip. In vwar poudir bann travay ki *APDAR* in fer ki'n anmenn pozitivite dan lavi plizyer nou bann dimoun, ki'n tonm dan lavi sibstans.

Mon koleg Onorab Aglae in elabor lo bann defayans bann difikilte ki Minister Lasante i deza vwar zot pe sarze an term responsabilite. E la ankor zot rebran pou APDAR bann responsabilite an plis. Nou swete ki zot kapab delivre. Nou swete.

Nou dan Lopozisyon ansanm avek nou manm piblik ki pe swiv deba ozordi, nou senpleman swete ki sa bann sanzman ki nou bann koleg lo lot kote latab, zot pe koz lo la ki zot Gouvernman pe vin avek pou senpleman onor, onor bann langazman, bann promes ki zot ti dir zot pou kapab fer.

Akoz parfwa ler ou pa dan en soulye, ou zis koz nenport kwa. Ler ou komans met li ki ou komans santi li.

E pou terminen Mr Speaker mon oule senpleman dir mersi tou sa bann travayer APDAR ki'n montre zot langazman, zot determinasyon pou fer en diferans.

Pou donn sipor tou sa paran, tou sa dimoun ki bezwen sipor dan sa bann, dan letan zot in tonm dan bann problem sibstans e kot fanmir in bezwen sa konsey, sa gidans e sa tretman. Mersi.

MR SPEAKER

Mersi Onorab. Nou a ekout Onorab Michel Roucou.

HON MICHEL ROUCOU

Bonn apre midi VP. Bonn apre midi *panel*. Mersi Mr Speaker. Mr Speaker mersi ki ou'n donn mwan loportinite pou mwan dir de mo lo sa Mosyon.

I paret ki entervenans avan mwan in bliye poudir se ki APDAR ti ganny kree zis pou donn plas travay gro, gro *post* ek en ta larzan serten, apre pou servi sa bann manmay lo en baz politik bann rafal eleksyon.

Mr Speaker koman e zenn ki souvandfwa mon war mwan mon al fer en pti deboury kot Padayachy *Funeral Parlour*, mon zwenn bann paran ki zot war zot in ganny afekte aköz enn zot zenn in perdi lavi.

Sa i fer mon mazin Mrs Jeanne Etienne en madanm ki reste La Misère, kot mon ti la avek li dan son detres ek son fanmir apre ki enn zot zenn ti'n ganny anmase mor dan mon distrik Corgate Estate. Mr Speaker en keksoz ki bokou nou pa koz lo la se ki ler nou war bokou bann zenn pe perdi zot lavi, aköz swa zot in *overdose* Mr Speaker.

Mon swete ki la aprezan ki APDAR pou al transfer anba Minister Lasante, i pou annan plis swivi avek bann zenn, kot la zot pou ganny sa latansyon ki zot pa ti pe gannyen oparavan.

Mr Speaker mon remerci sa bann travayer kot *APDAR* ki pe fer en bon louvraz, zot in fer bokou e zot ankor pe fer bokou. Mon demann zot pou zot lebra pa tonbe Mr Speaker, akoz ki zot pe transfer anba sa Minister, la zot pou ganny plis sipor.

Mr Speaker parey bokou i konnen mon distrik i pa ganny eparnye avek drog, kot la tou le bomaten ou war dimoun i sorti dan tou le 4 kwen Mahe pou zot vin groupe la, pou zot ganny en laliny. Mon pe swete avek sa ki sa i ava ed bokou zot.

Mon demann ek bann paran pou zot annan pasyans e pou Lepep Seselwa pou zot groupe ansanm, ansanm ek Gouvernman pou nou kapab batay sa gro bebet ki pe anvair nou lazenes e osi nou lafors travayer.

Mr Speaker semenn pase en zenn fiy ti vin war mwan ki sorti dan mon distrik, Ms Stephanie Duval. I ti vin avek en plan kot i anvi ed bann zenn ki war zot pe tonm dan drog. E mwan mon pe demann avek Minister Lasante pou zot zwenn avek bann partner tel ki, i annan Mr Jude Fred i annan Ms Stephanie Duval kot zot kapab travay avek zot.

Ekout en pti pe bann plan. I annan bokou partner la deor ki anvi ed sa

lorganizasyon pou zot akonplir bokou keksoz. Nou konnen poudir i pa pou fasil Mr Speaker. Be selman nou konnen avek Bondye Papa nou konnen poudir i pou annan n semen.

Mr Speaker mon pou donn mon sipor sa Mosyon, mon pou donn li pou zabitan mon distrik, akoz mon konnen poudir i annan bokou zot ki zot sorti dan sak fanmir, i annan bokou zot pe ganny afekte avek sa Mr Speaker. Mersi mon pou donn mon sipor sa Mosyon.

(APPLAUSE)

MR SPEAKER

Mersi. Nou a pran ankor en entervenans avan nou pran en poz. Mon apel Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi Vis-Prezidan, *Attorney Zeneral*, Dr Valentin, Dr Low-Wah.

Mr Speaker san ki mon fer okenn polemic dan Lasanble apre midi, mon krwar ki Onorab Roucou ki fek koze avan mwan atraver ou Mr Speaker in donn Lasanble e pep Seselwa vre rezon akoz zot pe ferm *APDAR*.

Zot in met dan zot latet ki sa ti ganny kree pou en

dimoun. Konmsi i malere tou sa paran, tou sa manman ki ti war en laklerte avek kreasyon *APDAR*, ozordi Onorab Roucou i dir en parol koumsa.

Mr Speaker mon'n osi ekout atantivman Onorab Naidu, akoz i kontan get mwan ler i koze. I get mwan ...

(laughter)

HON WALLACE COSGROW

... i rod laprouvasyon.

(laughter)

HON WALLACE COSGROW

I rod laprouvasyon konmsi si mon aprouve sa ki i pe dir.

(laughter)

HON WALLACE COSGROW

Be Mr Speaker dan kanpanye eleksyon 2020. Annefe Onorab Naidu mon'n ekout ou byen e mon kontan ki ou'n dir.

(Interruption)

MR SPEAKER

Byen. *Order!*

HON WALLACE COSGROW

Mon kontan ki ou'n dir. Me mon ti swete ou ti dir sa avek ou kandida Prezidansyel sa letan, akoz ti dir fer *cold*

turkey. Donn zot en pti panadol, zot ganny en pti panadol apre anvoy laba! Se sa ki ti dir! Eski zot ti dir tou sa bann zoli parol ki ozordi zot pe dir ler ti dir anvoy bann manmay *cold turkey*? La ozordi tou bann zoli parol.

Mr Speaker nou fini la, nou troun lo *Bill*. Sa *Bill* ki devan nou ozordi apre midi, i enn ki pe demann nou, nou Lasanble ozordi pou retir sa Lalwa ki ti pase an 2017.

Pou kre *APDAR* en lorganizasyon ki etabli a sa letan, pou donn en servis entegral, pou asiste prensipalman bann adikt drog me osi nou pa koz lo sa souvandfwa me osi bann dimoun ki adikt avek lalkol.

Ler *APDAR* ti vin operasyonnel, bokou bann paran, bann manman ti soulaze pou war komansman en solisyon pou zot bann zanfan.

Bokou zot in aret plere. Zot pa bezwen kasyet zot bann keksoz valer akoz zot per ki i a ganny pran pou vann pou drog. Bokou nou sitwayen in osi war en rediksyon dan ka vol lo zot propriyete.

Mon bezwen o komansman fer resorti, ki si nou dakor ki *APDAR* in fer sikse parey atraver ou Mr Speaker Onorab Georges in dir, in annan en serten sikse. Onorab Georges i konnen in

byen plase akoz i ti lo *Board APDAR*.

Akfer ki nou bezwen ferm sa lorganizasyon? Nou bezwen *go back to* kreasyon, kreasyon *APDAR*. Ki rezon *APDAR* ti ganny kree?

Parey mon'n eksplike ti annan en nesesite sa letan, pou annan en program ki entegre tou bann laspe ki annan pou fer avek tretman bann adikt pou tir zot lo drog or sa sibstans ki zot *addicted* lo la. Met zot dan en program e evantyelman dan en rehabilitasyon kot apre zot a kapab retourn dan lasosyete e kontribye paret nou tou pe kontribye.

APDAR i annan diferan kalite fonksyon or i ti annan diferan kalite fonksyon. Parfwa nou zis get sa bann pti parey en Onorab in nonmen boner, nou war bann pti stasyon kot i donn *methadone*, nou krwar se sa bann fonksyon *APDAR*.

Nou konnen ki *APDAR* in fer bokou plis ki sa, *APDAR* in anmas lenformasyon in fer resers *APDAR* in propoz serten *Policy change*. So *APDAR* li menm li son fonksyon in bokou plis ki zis donn *methadone* bann zenn, or bann adikt, zis pou tir zot lo sa adiksyon.

E boner lentervansyon Onorab Georges Mr Speaker, in dir ki *APDAR* in fer en serten

sikse kot i konsernan *harm reduction*. E mon krwar nou to ki la malgre petet sikse pa'n 100poursan, nou tou ki la nou pou admet ki poudir in annan serten progre, serten sikse ki *APDAR* in fer dan sa domenn.

Nou tou nou'n war. Nou tou nou dan distrik, nou tou nou war, nou tou i annan dimoun ki petet i reste obor nou, dimoun ki reste avek nou, dimoun ki nou konnen, dimoun ki dan nou fanmir, ki'n en fason ou en lot benefisye avek sa program ki *APDAR* in anmennen depi 2017 ziske ozordi la avan nou ferm li.

Ki benefis ki sa in anmennen pou bann adikt ki ti pe swiv tretman? Zot in ganny zot dignite, kot dan bokou ka ti annan en kantite ki ti pe mandyan, en kantite ki ti pe vole, zot in ganny zot dignite.

Zot in nobou travay, zot in nobou fer serten kontribisyon dan lasosyete e an retour i annan lezot benefis ki lasosyete i tire e ki lasosyete osi i benefisye avek sa program ki ti ganny met an plas.

Nou'n koz en pti pe lo *APDAR* Mr Speaker. Prezan permet mwan koz en pti pe lo Minister Lasante. Ozordi parey nou tou nou konnen Minister Lasante e osi *Health Care Agency* i anba bokou presyon.

I pa zot lafot. Sityasyon in fer ki zot anba bokou presyon, i annan en kantite keksoz dapre sa ki pe met bokou presyon lo sistenm lasante.

Avek *COVID* ankor Lotorite Lasante Piblik i osi anba imans presyon. Nou tou nou konnen. Dan en pti pe mwens ki en semenn nou fer 3 tes *COVID*. Sa nou, me i annan lezot dimoun ankor ki pe fer. I annan bokou presyon pou delivre bann tes a ler, bokou presyon pou donn vaksen, bokou presyon pou fer bann program ledikasyon.

So nou konnen sa. I annan en kantite presyon lo servis lasante an zeneral. E mwan mon rapel Mr Speaker avan *APDAR* sa servis ti en servis i ti fragmante nou kapab dir. E pour mwan, mon war ki i pa ti en servis ki ti byen kordinen.

E la mon pa pe blanm personn ki ti fer sa servis, me petet mannyer striktir ti ete ti fer ki ti difisil pou kordin li e se pour sa rezon ki i ti fragmante.

Mon dir sa aköz mon rapel sa bann letan, kantite dimoun ti apros Lazans Proteksyon Sosyal, aköz zot ti bezwen pey en pti larzan pou zot kapab antre lo en program.

Ti annan detrwa pti program e pa bokou dimoun ki ti ganny sans antre, pa bokou dimoun ki ti ganny

sans ganny tretman *methadone*.

Zot ti anvi, ti annan en kantite ki ti anvi. Me solman mannyer keksoz ti ete zot pa ti ganny sans antre lo sa program. E kantite paran i vini i plere i dir ou koumsa i anvi ed son piti me i napa larzan pou li kapab pey sa program si mon pa tronpe ti detrwa semenn *or* en pti pe petet detrwa mwan. Mon pa tro mazin byen.

Be prezan Mr Speaker pou nou al de lavan, nou tou nou konnen ankor *APDAR* par son program *harm reduction* ti'n osi apard son program *harm reduction* ti'n osi komans zefor pou travay lo en program rehabilitasyon.

En sant rezidansyel ki'n ganny koz lo la taler \$100milyon donner par *UAE* en negosyasyon ki ti ganny fer par ladministrasyon avan. Prezidan avan, *SS* avan e Gouvernman, ladministrasyon ti pe al dan en program rehabilitasyon en sant rezidansyel avek tou kapasite e program pou reabilit bann dimoun ki adikt.

I annan sa program *harm reduction* ki bezwen ganny konplimante avek sa program rehabilitasyon. E ki afen bann adikt a kapab ante dan lasosyete e kontribye parey nou tou. Be prezan ki arive ek sa bann plan?

Ki arive ek sa bann program e ki mannyer Minister Lasanble i sitye li dan tousala? E ki mannyer Minister Lasante i kordin tousala prenon kont tou sa lezot travay ki lo zot ledo?

Ler *VP* in fer son ladres, in dir nou ki pou arive avek Lazans, i pou al anba Minister Lasante. Be i pa'n donn nou an zeneral pou i nou ki mannyer sa pou ganny kordinen. Sa ki enportan. Ki mannyer tousala pou ganny kordinen avek tou sa fardo ki lo Minister Lasante ozordi?

Minister Lasante pou pran li aköz i en Departman Gouvernman, e i son rol pou li anmas si Gouvernman i fer desizyon i son rol pou li egzekit desizyon Gouvernman. Me sa servis ki nou pou gannyen eski i pou konsantre alaoter parey *APDAR* ti pe donner?

Nou dakor *staff* pou bouze, pou al laba, me sa kordinasyon ler i ti dan en landrwa separe i pli fasil pou kordonen malgre i annan serten Bidze administratif ekstra, me solman ou ti war son rezilta.

Lezot kestyon Mr Speaker eski dan plan restriktirasyon e dan plan Bidze eski nouvo adikt ki anvi antre anba program zot pou kapab fer li?

Akoz nou konnen i annan en restriksyon lo

lakantite Bidze, eski i pou kapab pran nouvo adikt ki ozordi petet pa ankor ganny sans antre lo program?

Eski nou pou war en rediksyon *or* eski nou pou war en logmantasyon dan lenportasyon *methadone*?

Zot in toultan koz lo kont dan *methadone*, me ki kote zot sitye zot lo la. E nou ti a kontan ki *VP* i petet i pronons en pti pe lo la pou met laklerte deor avek bann dimoun ki konsernen, bann paran, bann manman sirtou, bann adikt zot menm ki anvi fer sa sanzman dan zot lavi.

Annou pa zis get sa bann dimoun koman bann dimoun nanryen fer, sa bann dimoun zot anvi annan en bi dan zot lavi zot in pri, zot in pri dan en sityasyon e zot anvi sorti, bokou zot i anvi sorti.

Kot i konsern *staff APDAR* Mr Speaker mon ti a kontan remersi zot pou sa bon travay ki nou konnen pa'n fason, nou konnen pa fasil. Zot bezwen parfwa zwenn bann sityasyon difisil, zot ganny bann dimoun ki moralman pa stab, zot pa ankor ganny zot *methadone* petet zot ganny bann sityasyon difisil, me nou remersi zot bokou pou sa travay ki zot in fer.

Malgre ki *Bill* ozordi i dir ki ou *staff* pou ganny abzorbe, tou *staff* pou ganny abzorbe.

Eski nou kapab kont lo Vis-Prezidan ozordi, ki sa *commitment* ki in fer i pou *maintain*? Akoz zot ti dir nou ki travayer servis piblik pa pou perdi travay. Me ki nou'n war apre, nou'n war le kontrè.

So nou bezwen donn sa garanti sa bann *staff APDAR* ki ler zot pe transfer, ler zot pe transfer zot pour kontinyen *maintain* zot dyob. I annan en lot Onorab taler ki'n koz lo konparezon saler, sa bann dimoun i dan en lot Lazans e la zot pe troun dan Minister Lasante, ki mannyer ou konpar zot saler avek petet bann lezot *staff* ki zot pou al travay avek? Eski i pa pou vin en konfli? Or eski i en konfli ki nou kapab adrese?

Mr Speaker pou mwan terminen pou mwan *sum-up* mwan mon krwar poudir lentansyon in toultan la pou ferm *APDAR*. Tou bann parol ki'n ganny koze oparavan par bann politisyen, lentansyon pou ferm *APDAR* in toultan la.

Me apre in annan *uproar* e politisyen in troun lo zot parol. in aranz parol, in dir nou pou fer isi nou pa pou fer laba, me ozordi finalman sa vre parol in ariv devan nou Lasanble.

E nou war nou dan en sityasyon kot nou bezwen desid lo *faith of* sa Lazans ki'n fer bokou dibyen pou Seselwa e ki'n fer bokou dibyen pou

bann paran, ki'n fer bokou dibyen pou bann manman, ki'n fer bokou dibyen pou bann dimoun ki'n war zot pri dan adiksyon.

Mr Speaker mwan mon pa konvenki, mon pa'n ganny konvenk ki sa *step* ki nou pe pran la i enn ki bon e ki pou le meyer pou dil avek sa sityasyon ki nou ladan ozordi.

So mon ava ekout larepons, mon ava analize petet si nou annan lezot kestyon taler en lot staz nou ava kapab diskite.

Me mon kit sa la Mr Speaker e mon reste pou mwan ganny konvenki Mr Speaker. Mersi bokou.

(APPLAUSE)

MR SPEAKER

Mersi Onorab. Nou a pran en poz la e nou a rebran travay 4er 35.

(BREAK)

MR SPEAKER

Nou a rebran deba. Mon rapel Onorab Labonte.

HON ANDY LABONTE

Mersi Mr Speaker. Bonn apre midi *VP* avek ou delegasyon. Mr Speaker sa *Bill* pe demann nou pou *repeal Prevention of Drugs Use and Rehabilitation Agency*, ki nou byen konn sa Lazans koman *APDAR*.

Mr Speaker ler nou koz *APDAR*, nou ti souvandfwa mazin zis drog e *methadone*. Me pa zis sa ki servis *APDAR* ti pe ofer, pa zis drog ki osi en adiksyon. Lalkol parey in ganny dir, i osi en gro problemm adiksyon dan sa pei.

Alors i enportan ki ler Minister Lasante i pran fonksyon sa Lazans, i osi regard tretman e reabilitasyon sa bann maladi ki relye avek adiksyon lalkol seryezman. Akoz i met en gro fardo lo Bidze Gouvernman.

Pou mwan personnelman mon krwar ki *APDAR* li menm koman en Lazans, son rol e responsabilite ti vreman esansyel e ekstremman enportan.

E enn son bann lakonplisman vreman vizib ki nou'n war, (parey in ganny dir) ki bokou sa bann zenn ki ti pe pas en lazournen lo gento ouswa vole, ozordi zot dan en lanplwa swa formel ou enformel e pe ede kontribye dan lekonomi malgre zot reste touzour en adikt.

Alor i enportan pou note ki malgre sa Lazans pe ganny *fade out*, me tou son fonksyon parey *VP* in dir pe reste;-enkli sa bann travayer ki pe fer vreman en bon louvraz. Mon pa pou nonm non personn, me mon anvii felisit zot tou. Akoz mwan mon'n angaz mwan avek zot e mon santi ki zot pe

fer en bon travay e zot in ede dan en fason ki zot kapab.

Mr Speaker i osi enportan ki pep Seselwa i tret sa bann viktim drog adikt avek dignite parey in ganny dir par mon koleg Onorab Naidu. E mwan mon oule dir bann adikt ki nou dan *LDS* nou pou solider avek ot e fer sir ki zot tretman i kontinyen.

Me parkont nou anvii ki zot vin responsab e annan respe pou zot prop lekor. E ler mon pe koz lo respe Mr Speaker i enportan ki ler en adikt i deside pou sorti dan en adiksyon zot ganny sipor total sorti kot kominote. I annan en endividi ki pa konnen oubyen pa konpran ki savedir adiksyon.

Me la deor apard sa bann dimoun ki *involve* dan lenportasyon drog, i annan en kantite endividi ki visye e mon kapab dekrir zot koman bann psikopat ki pe ede pou ankouraz nou bann zenn pou reste koman en adikt.

Zot fer krwar ki zot pe ede, zot donn sa bann adikt larzan e fors zot dan prostitisyon. Mr Speaker la mon pa pe koz bann fiy, ou madanm. Me plito plizyer nou bann zenn garson, zenn zonm, ou zenn papa ki pe vann zot lekor avek bann zonm, zis pou zot kapab ganny en *fix* ou pou zot kapab siport zot adiksyon.

Finalman zot atrap tou sort kalite maladi parey *Hepsi, HIV/Aids* e lezot ankor. E la zot propaz avek zot *girlfriend*, madanm, zanfan e lezot manm zot fanmir.

Alors mon ti ava swete ki ler Minister Lasante i *absorb* fonksyon sa Lazans, ki osi responsab pou endik lepep Seselwa lo lasante reproduktiv i ava kapab endik lasosyete e sa bann adikt lo bann tel danze. Ler sa bann kliyan i vin rod zot servi i ava osi redwir transmisyon sa bann tel maladi.

Mr Speaker vi ki nou souvandfwa ganny dir ki adikt i en maladi, i enportan ki tou *from* maladi i tonm anba Minister Lasante. Alors i fer plis sans ki tou fonksyon *APDAR* i ganny abzorbe anba Minister Lasante.

Me parkont mon krwar ki pou tro bokou letan *APDAR* in konsantre zis lo *methadone* e pour sa rezon aköz pep Seselwa ler ou koz *APDAR* i dir ou *methadone*. Wi *methadone* i en medikaman ki ede dan tretman adiksyon eroin, me *methadone* e lo li menm pa pou adres sa problemm rehabilitasyon.

Mr Speaker parey nou konnen ki bout pli enportan i se koup *supply demand* oubyen anpes drog antre dan pei. Nou konnen ki i pa sitan fasil, me nou kapab redwir.

Parkont i enportan ki nou bezwen kontinyen endik nou popilasyon lo danze adiksyon.

E la mon pe koz nenport ki kalite adiksyon. I fasil pou komanse, me difisil me preske enposib pou sorti ladan. Alors sa ki pa ankor komanse, pa komanse silvouple e pa ni mazin teste pou komanse.

La mon anvi dir sa ki pa konnen ki savedir adiksyon annou pa dir nenport kwa, si ou pa ladan ou pa pou konpran.

Mon i ava swete ki nou itiliz sa bann menm endividi ki'n deza en *drug addict* pou travay avek nou bann adikt e sa i ava ede pou vin en form motivasyon pou zot kapab sorti ladan. Pou trop bokou letan nou'n toultan krwar ki nou kontan sa problemm adiksyon.

Adiksyon i konplike Mr Speaker. I annan plizyer laspe ki nou pa merit negligez. E mon swete ki anba Minister Lasante sa problemm i ava ganny gete dan son totalite. E mon kontan ler mon'n tann *VP* in dir in koz lo spirityel, aköz adiksyon i osi annan son bout spirityel ki souvan nou negligez.

Mr Speaker la spirityalite i vremen enportan ler nou pou koz pou nenport ki adiksyon. Alors sa bout ki vremen esansyel pou enkli ladan e

mon krwar ki bann kominote relizyez i merit osi zwe en rol.

Ler nou pe koz lo medikaman, eski nou mazin en pe letan lontan ler bann *hard drugs* parey eroin, kokain e lezot ankor pa ti ankor en fleo dan nou pei.

Nou bann medikaman tradisyonnèl oubyen *herbal* la ankor enn fwa mon pou dir, parey mon ti dir dan mon lentervansyon lo *mid-year review* Bidze lannen 2021 semenn pase.

Mr Speaker mon konnen ki bokou pa pou dakor, me mon konvenki krwar fermeman ki itilizasyon kanabis lo en baz medikal ou rekreasyonèl dan en fason kontrole i osi kapab adres sa sityasyon adiksyon e redwir itilizasyon bann *hard drugs* parey eroin, koka e lezot ankor dan sa pei Sesel.

Alor i enportan ki nou revwar si vreman kanabis i merit vreman ganny klasifye koman en drog ilegal, me plito en drog kontrole?

Mr Speaker ler fonksyon sa Lazans i ganny abzorbe anba Minister Lasante, mon ti ava osi swete ki ban medikaman ki tret adiksyon parey *methadone*, *subutex*, *suboxone* e lezot ankor.

La mon pe koz bann drog kontrole, nou revwar lafason ki bann viktim ou pasyan i ganny akse avek. Rezon mon

dir sa se aköz i annan bokou farmasi ki ti ava swete van sa bann tel drog byensir lo preskripsyon en dokter. E sa i ava ede retir fardo lo Bidze Gouvernman vi ki nou konnen i pe kout Minister Lasante en kantite larzan ki apel *tax payers money*.

Akoz se da ki ede ogmant *black market* lo gento e rezon ki nou vwar ki *Subutex* enkli byen k *methadone*, la konmela pe ganny vann lo gento. E sa i en gro problem. Mon osi anvi dir ki sa sant reabilitasyon i ganny materyalize, aköz nou pa kapab koz lo reabilitasyon me nou napa en sant Mr Speaker. Alor i enportan ki nou realiz sa.

E pour bann ki pou en rezon ou en lot pa ankor pare pou sorti lo drog zot merit kapab ganny akse avek bann servis parey lesanz sereng. Aköz mon konnen ki i ti deza annan sa program, me parkont nou pe demande ki pe vreman arive avek si vreman zenn pe ganny akse.

Mr Speaker pou man mon pou vot pou sa *Bill* aköz mon krwar ki i merit annan en restriksyon dan fason travay sa Lazans. E *ya* mon pou touzour donn mon sipor total pou ban ki pli feb parey bann ki en viktim drog ek lalkol.

E en proverb ki mon ti a kontan pas avek Lepep Seselwa aköz ler mon tann lot

kote koz e Mr Speaker parey Onorab Naddy in dir zot pran zis en mo dan en fraz. Akoz en move mesaze i anmenn maler, me en mesaze fidel i anmenn gerizon.

Alor avek sa de mo, mon pou sonn mon sipor total pou sa *Bill*. Mersi Mr Speaker.

MR SPEAKER

Mersi Onorab. Onorab Gill.

HON CHURCHILL GILL

Mersi Mr Speaker. Bonn apre midi *VP* ek delegasyon, bonn apre midi tou Manm ek tou dimoun a lekout. Mr Speaker mon pa pou re repet tou sa ki'n ganny dir, me selman pou benefis dimoun Praslin i enportan ki mon demann sa detrwa klarifikasyon pou nou konnen ki vremen pou arive lo kote Praslin.

Bill devan nou se pou *repeal* sa Lazans ki nou apel li *APDAR*. Me lefe i reste e statistik ki montre ki nou annan bokou zenn lo Praslin ki'n kapab sorti lo sa sibstans. E ozordi zot dan en lanplwa pe travay pou zot kapab ed zot fanmir.

I kler alors ki anba sa Lazans in annan serten sikse menm si i reste ankor bokou pou fer, akoz an mezir en bann i sorti parey nou konnen i annan osi ki pe antre.

E klarifikasyon ki mon oule pou zabitan avek pou sa

bann paran ki zot piti i ankor lo sibstans, se ki lapros e metedoloji pou ganny servi li Praslin?

Akoz ki mon dir sa, nou tou nou ti tann Minis 3 semenn pase, Minis Lasante dan Lasanble ler mon ti anmenn kestyon kot i annan en pe konsern kot Lopital Baie Sainte Anne. E parmi bann konsern i annan bann kontrent lespas, i annan limitasyon resours imen.

Alors i enportan nou konnen si apre ki sa *Bill* in ganny *repeal* si fason ki pe ganny fer ozordi i pou kontinyen pou en pe letan, ziska ler ki pou Praslin zot a kapab reetablir en keksoz dapre ki *Bill* pe demande? Oubyen si tou keksoz pou reste parey dan konteks Praslin parey i ete.

Vi ki nou konnen lopital, Minister Lasante Praslin i annan pa mal problem, aktyelman pou son fonksyon e se sa kestyon.

Se ler nou pou bouz bann dimoun, donner sa bann problem, i enportan nou ganny eksplike ki fason ki sa pou ganny fer lo Praslin pou nou kapab kler si, pou nou santi si ki sa servis i pou kontinyen. E nou a kontinyen war bann reisit parey ki nou pe vwar? Mersi.

MR SPEAKER

Mersi Onorab Gill. Onorab. Bistoquet.

HON ROSIE BISTOQUET

Bonn apre midi Mr Speaker. Mersi Mr Speaker. Bonn apre midi Vis-Prezidan avek ou delegasyon. *PS.* Avan mon komans mon lentervansyon, mon ti a kontan remersi ou bann travayer *APDAR* pou zot travay eksepsyonnel espesyalman Dr Low-Wah ki la pandan zot lanplwa avek *APDAR*.

Mon konnen laplipar zot, zot ti deza bann *staff* Minister Lasante e ozordi zot pe retourn lo berkay, mersi bokou. Mon osi remersi Lazans *APDAR* pou zot zefor kontinyen ki zot in fer pandan sa 5an, pou asire ki nou bann zenn i ganny zot sipor avek tretman ouswa lezot servis.

Mr Speaker adiksyon drog i kapab ganny trete me i pa fasil e i pa senp parey nou, nou mazin. Sirtou tretman adiksyon i ed bann adikt pou aret servi drog, reste *drug free*, *être* prodiktiv dan fanmir kot rebran zot travay e dan sosyete.

Adiksyon i en maladi kronik i ganny karakterize par lavi enkontrolab, bann lanvi enkontrolab pou rode e servi drog.

Malgre ban konesans grav ki nou konnen i andomaz laservel en imen e i sanz zot

persepsyon sirtou zot konportman en dimoun, ou en bon pe letan annan de fwa si pa pou lavi.

Ladiksyon drog se sa bann sanzman ki fer en dimoun annan konportman ki danzere pou viv otour li, sirtou parey bann ki nou konnen zot vole, lager, manti eksetera.

Adiksyon i en maladi ki *relapse* sak fwa, sak fwa *relapse* i arive sa adikt i toultan retourn lo gento pou, kot pou li rebran sa drog.

Sa adikt i ganny servis de baz dapre zot, sak adikt i ganny servis de baz apre zot lentervansyon ki zot in fer baze lo nivo adiksyon e lezot problem sa ki ganny karakterize par 4 'C'.

Sa 4'C' se par egzanzp 'Konpilsyon', sa se lanvi - gran lanvi ki i anvi, '*cravings*' savedir bann dezir, pasyon osi konsekans ouswa sirtou bann konsekans legal, sosyal, medikal, '*control*', kontrol sirtou ki zot pa kapab kontrol zot lekor ouswa pou kontrol zot lekor pou servi drog.

E Mr Speaker pou asire tou adikt i ganny en meyer sans dan zot lavi, sosyete i met an servis a zot dispozisyon kot zot kapab sorti dan sa maladi ki anvlop zot lespri, anvlop zot lekor e menm lapli plizyer fwa anvlop zot nanm.

Pou asire ki bann viktim ki servi drog i ganny sipor ek

tretman, plizyer pei in adopte plizyer program anba diferan model baze lo zot sistenm lasante. Isi Sesel Minister Lasante in met an plas en model ki apel “*medicated assisted treatment*.” Ki apel *MAT*. *MAT* ti ganny adapte anba model *UNODC* depi 2013.

Baze lo la kantite viktim ek zot fanmir ki ti ganny afekte e osi la kantite ki swa ganny komplikasyon lezot maladi parey *HIV*, *Hepatitis-C* e osi bann lanmor asosye ek maladi laservel ki tre fatal.

Servis rekomande ki siport bann adikt ek zot fanmir anver sa demars pou gerizon i normalman ki ti ganny met an plas bann prevansyon tretman sirveyans, pou fer sir ki sa bann dimoun i ganny swiv ki zot tretman i ganny met azour zot preskripsyon. E menm si zot i annan serten kontrol ki zot bezwen fer.

Aprè plizoumwèn rehabilitasyon ki zot bezwen retoun dan sosyete. Normalman dan tou pei prevansyon, sirveyans ek rehabilitasyon i ganny fer par *NGOs* ou sosyete sivil parey isi nou'n trouve i annan kar lezot ankor e sirtou bann lezot denominasyon.

Me tretman i ganny antretenir par bann, toultan ban profesyonnel lasante dan en fason byen striktir e byen

organize. Mr Speaker isi Sesel *MAT* ti ganny devlope par Minister Lasante e ganny enplimante anba lasante mantal kot Lopital North East Point parey mon dir pli boner an 2013.

Dan laplipar pei sa program *MAT* i ganny enplimante anba lasante mantal, sa program normalman i annan protokol medikal ki ganny met an plas pou fer sir ki kliyan i pas atraver diferan staz pou li ganny soulazman ou aret servi drog.

Normalman tou kliyan ki anvi aret servi drog i ganny admet dan en sant pou *detox* pou en peryod pa mwens ki 15zour. Me par egzanp isi Sesel osi ki egziste parfwa zot ale plis ki 15 zour baze lo zot kondisyon sa kliyan sirtou ban ki montre siny retonbe.

Mr Speaker apre nouvo devlopman dan sityasyon drog isi Sesel, en nouvo lapros ti ganny met an plas, ouswa an mars atraver en Lalwa ki ti ganny aprouve e sa se *Misuse Of Drugs Act* ki nou apel li *MODA 2016*.

Sa Lalwa ti ganny met an plas pou redwir konsanpsyon drog lo en nivo a lonterm e osi sa i ti baze anba en striktir ki ti ganny aprouve an 2017, e sa se *Agency For Prevention of Drug Abuse and Rehabilitation*

Agency Act 2017 ki nou dir *APDAR*.

MODA li i ti donn lenstriksyon pou fer sir ki fonksyon tou le 3 *detox* i met anba Minister Lasante e lezot Lazans ki pe ofer sa bann servis malgre kondisyon.

APDAR ti pran *management Wellness Center North East Point* ex-Mont Royale pou *admit* pasyan pou *detox* sirtou bann ki lo *high threshold methadone*. Bann kliyan ki ti lo *low threshold* plizoumwen zot ti vin bann *day cases*.

Dapre en lartik ki ti ganny pibliye le 21 Novanm 2019 par *BBC News* by Kanika Saigal anba *News Headlines* i ti dir "*why Seychelles has worse heroin problems?*" Sesel ti pe soufer dapre sa lartik apre en gran kantite proporsyon nou sitwayen avek drog ant 5mil a 6mil ki ti reprezant apepre 10poursan nou popilasyon travayer.

Sa bann adikt eroin sa statistik ti ganny donnen par *APDAR*, sa sif i montre nou ki Sesel avek en pti popilasyon en pti pei me pli o dan lemonn kot i konsern konsonmasyon drog. Dapre sa lartik *APDAR* ti entrodwir en model Portige avek en Polisi pou tret adiksyon drog dan Sesel koman en maladi kronik.

Dapre sa lartik ti annan plis ki 20, ki 2000 dimoun ki ti

ganny anrezistre lo sa program ankor dapre *APDAR* laplipar sa ban kliyan plis ki 90poursan ti lo sa program *threshold* pandan sa dernyen lannen, ki napa preski ditou kliyan lo *high threshold methadone*.

Mr Speaker mon pou siport sa *repeal* pou sa Lalwa akoz mon santi Minister Lasante prezan i bezwen trouv diferan fason pou fer sir ki pasyan i bezwen al lo *high threshold*, parey mon ti fir ki konmela i s 2 sant in fermen sirtou *Wellness Center* avek North East Point.

Mon mazin en petet akoz *COVID* ki depi 2020 sa 2 sant pa pe fonksyonnen. Minister Lasante i bezwen anploy, mon pou dir sa bann rekomandasyon swivan ki Minister Lasante, an konnen ki letan zot in retourn o berkay e zot bezwen war nouvo Polisi pou zot kapab gete ki mannyer pou kapab enplimant sa program avek nouvo stratezi.

Baze lo lasante i bezwen anploy mezir pli enportan sirtou devlop kapasite bann profesyonnel Seselwa ki dan nou kiltir, ki konn nou kiltir pou siport bann, nou ban viktim sirtou dan domenn psikoloji.

E devret osi fer restorasyon e kordinasyon byen striktire pou asir program prevansyon

reabilitasyon i ganny konbinen pou fer sir ki Sesel i ganny en batay kont drog.

Nou bezwen rekonnèt osi ki bann dimoun ki ser i drog e bann viktim zot avek en maladi ki zot devret ganny servis, servis a dekwa de kalite dan en lanvironnman tre pratikal pou asir zot gerizon.

Mon pe dir servis adekwa, sa i vèdir servis sirtou servis lasante mantal kot ganny akse avek *counselling* ek lezot ankor e sipor psikoloji.

Servis medikal tretman de kalite e osi tretman pou tret bann maladi oportinis parey *HIV, SIDA, Hepatitis-C* ou konplikasyon e sirtou servis ledikasyon dan lekol ki pou annan bann *awareness* e sirtou pou lafanmir, la kominote e pli enportan pou sa viktim li menm.

Servis pou bann manman ansent ek zot baba, akoz nou konnen bann manman ansent laplipar ditan zot baba osi i vin bann baba droger ler zot ne.

Asir osi servis legal pou sa bann group dimoun e servis la fanmir pou asir meyer lentegrasyon e osi vokasyonnel pour ki sa *ex-victim* i retourn travay pou sonny zot fanmir. E an plis ki sa kontribye dan devlopman ekonomik nou sosyete.

Mon kontan pou war sa servis in retourn anba Minister Lasante. Sa se pou asire ki sa program i ganny meyer sipervizyon par bann teknisyen kalifye e sak kliyan zot ganny apresye e ganny latansyon endividuelman.

Mr Speaker mon pou siport sa *Bill* prevansyon *repeal of APDAR Act, 2021*. Mersi bokou.

MR SPEAKER

Mersi Onorab. Onorab Wavel Woodcock.

HON WAVEL WOODCOCK

Mersi Mr Speaker. Mr Speaker pou komanse mon krwar i pou enportan pou mwan koriz en *misapprehension*, ouswa en serten konfizyon ki mon krwar lot kote latab zot pe sey zet deor. Annefe i an en *statement* ki Onorab Cosgrow ti fer pli boner dan son lentervansyon.

Aprè en *statement* ki Onorab Roucou in fer in dir poudir le rezon ki ozordi, nou Gouvernman nouvo Gouvernman pe *repeal APDAR* se akoz i pe target en serten endividi akoz nou pe target Mr Patrick Herminie.

Me Mr Speaker mon pa war sa i fer sans, akoz Mr Patrick Herminie in *resign* kot *APDAR* depi le 11 Novanm 2020! E i ti donn 3 mwan notis avan son *resignation*. Person pa'n pous li, in al li

menm. Ki mannyer ou kapab viktimiz en dimoun dan en Lazans kan sa dimoun in fini ale?

Ladan menm dan Bidze Siplemanter ti annan son konpansasyon ki i pe al touse la. Annefe i ti kapab servi sa larzan pou ed sa bann dimoun ki debout avek plakar obor lorloz toulezour!

Mr Speaker mon pou bezwen fer sorti detywa keksoz, akoz mon santi poudir ou konnen si ennler ou ekout bann Manm lot kote latab koze, ou pou kapab donn zot lakonminyon san konfese, ouswa menm lakonfirmasyon, fer zot fer lakonfirmasyon san katesis!

Akoz ennler zot donn bann lenpresyon zot sey anmenn bann keksoz, ki konmsi zis pou sey anbet Lepep Seselwa, me selman Seselwa i war byen kler.

Kreasyon APDAR in vin avek en kou ase eleve enorm, VP in koz lo la, annefe VP in fer sorti poudir biro ex-SS Mr Patrick Herminie ti kout plis ki R100mil pou kouver son depans biro, sekirite, loto avek son saler ase eleve.

E ti annan en *Board* ki ti annan apepre 22 manm lo la ki ti pe kout Gouvernman environ R66mil par mwan.

E avek tou sa depans Mr Speaker ler ou pe koz lo zesyon en Lazans - zesyon en Lazans

i vremen enportan e i pe ganny fer dan en fason ki byen. E la ozordi dan sa nouvo normal dan en pei ki pe fer fas avek en kriz ekonomik ase serye, avek prensip Gouvernman pou sey kre en Gouvernman ki pli *lean*.

Kot nou pe koz pou fer plis avek mwens, lafason ki ou *run* en Lazans i vremen, vremen enportan. E nou'n war Mr Speaker mon bezwen fer sorti ti annan plizyer labi dan APDAR dan lepase.

Mon a donn ou en legzanp serye ki mwan menm mon, mon ti anmenn dan sizyenm Lasanble Nasyonal ki mon'n *take up* apre ki mon reganny elekte.

Mr Speaker mon pa bliye poudir ti annan en sant ki ti ganny kree Praslin *Dove Rehabilitation Centre* Amitie. E pa ti pe kout naryen pou *run* sa sant. Sa sant ti pou Gouvernman.

Ki Mr Patrick Herminie SS sa Lazans avan ti fer Mr Speaker, se i ti fer APDAR sorti la dan sa sant ki pou Gouvernman par lwe 2 *building*, 2 pti *building* pou R60mil par mwan, zis pou met larzan dan pos son dalon. Apre i apel son lekor, *The Man, The Myth, The Legend!*

Mr Speaker ou war in annan bann labi, e ler mon ti anmenn sa devan Lasanble Nasyonal, nouvo Gouvernman in antre deswit nou'n dil avek

sa zafer e la ozordi *APDAR* in retourn Amitie kot sa sant. E in rann sa lakaz ki zot ti pe gaspiy larzan R60mil par mwan.

Mr Speaker i annan en keksoz ki ankor Onorab Aglae in dir ki ankor, i pe donn en move lenpresyon.

Ou konnen zot pe donn en move lenpresyon konmkwa la ki *APDAR* pe ganny *repeal*, ki konmsi pou nepli annan okenn program pou bann zenn ki lo, bann zenn adikt, bann zenn ki pe ganny afekte avek plizyer drog e osi bann zenn ki pe ganny afekte avek *alcoholism*.

Me sa *Bill* in fer kler poudir tou ban fonksyon *APDAR* pou ganny re transfer anba Minister Lasante. E program *methadone* pou kontinyen. I pa pou arete li. Se sa Departman anba Minister Lasante ki pou prezan pran sa responsabilite.

E deza parey in fer resorti bokou bann *staff* ki ti pe travay ek *APDAR*, ti deza oparavan bann *staff* Minister Lasante. E napa naryen konmsi pou dir la nou pe al *repeal APDAR* konmsi nou bann zenn ozordi ki pe ganny afekte pou ganny kit dan *limbo!* Non.

Zot pou annan, zot pou gannyen ankadre, zot pou gannyen sa soutyen, sa sipor ki zot bezwen. Mr Speaker

Onorab Vidot la fason ki in koze ou pou krwar ki eroin fek debarke Sesel le 25 Oktob 2020. Ler Gouvernman *LDS* ti antre o pouvwar Mr Speaker ti deza annan 5mil *drug addict* Sesel.

I pa en keksoz ki fek arive la. I en keksoz ki s Gouvernman in erite e ozordi nou'n pare e i dan nou *manifesto* pou fer nou mye pou nou osi sey *tackle* e dil avek sa sityasyon. E i enportan ki mou anmenn en lalit pli for kont drog.

Onorab Bernard Georges in koz lo *supply reduction*, wi i enportan nou bezwen koup la kantite drog ki nou pe antre dan nou pei. E nou bezwen fer en zefor pou anmenn en lalit pli asarnen pli serye. E sa Gouvernman in donn en komitman pou fer sa.

E mon pe ekspekte ki Lasanble Nasyonal pou osi ede dan sa zefor pou elimin drog dan nou pei. E i annan plizyer aksyon ki sa Gouvernman in fer pou montre nou volonte, pou anmenn en lager kont drog.

Nou'n war ki nou'n ranforsi ban Lalwa (*POCA*), *Proceeds of Crime Act*, nou'n ranforsi (*AML*), *Anti-Money Laundering Act*, plizyer bann Lalwa ki pou dil avek blansisaz larzan, bann droger ki pou sey blansi zot larzan ouswa bann dimoun ki pou sey rod bann

fason, bann larzan ki zot in *gain* atraver bann aksyon ilegal parey vann drog.

E tousala ozordi nou annan bann antite ki pe dil ak sa bann keksoz, parey *FCIU*, ki pe swiv bann transfer ki pe ganny deroule an ka i annan bann transfer ki pe ganny fer, pou aste drog ki pou vin touy nou bann zanfan, fer ditor nou bann zanfan Sesel.

Me sa ki enteresan Mr Speaker ler nou Gouvernman lo komansman nou'n komans sa lalit kont drog, Mr Speaker i malere ki'n arive dan nou Lasanble kot i annan en Manm lo lot kote latab ki'n defann en eskobar dan Lasanble Nasyonal!

Mon pa pou mansyonnen me selman nou tou nou konn sa *fame case* kot en dimoun i ti *involve* dan trafik drog, ti ganny deporte Sesel. E sete en Manm lo lot kote latab ki ti anmenn kestyon pou defann eskobar.

E ler i ti vin gele Lasanble Nasyonal ti dir poudir Lapolis pa pe fer naryen! Lapolis ti pran en desizyon pou al met en lord laba Roche Caiman. Ki ti fer, i ti kasyet deryer rido ler Lapolis pe fer lafouy, apre i ti vin gele devan Lasanble Nasyonal apre ki Lapolis ti deside pran en aksyon kont drog dan son distrik Roche Caiman. Mr Speaker ki manner i apele sa?

Apre ozordi i a vin dir sa Gouvernman pa pe fer ase pou dil avek drog. Be ki ou Gouvernman *United Seychelles* in fer kont drog dan lepase? Se zot, se anba zot *watch* ki ozordi i annan 5mil *drug addicts* dan nou pei. E ozordi la nou pe fer nou mye nou pe sey sa Gouvernman in ganny li en gro latas - en latas lour Mr Speaker pou nou sey dil avek sa.

E nou tou nou konnen i pa pou ozordi pou demen, me selman *we are heading in the right direction*. E nou pe fer en zefor pou nou dil avek sa bann sityasyon ki nou pei pe fer fas avek ozordi. Mr Speaker zot pe koz viktimizasyon dan *APDAR*?

Mr Speaker en kantite bann travayer kot *APDAR* in ganny viktimize dan lepase. Mon a donn ou en senp legzanp. In donn mon permisyon ozordi devan sa Lasanble servi son non. *Paster Wallace Stravens*.

Sa garson sa travay ki in fer avek bann manrmay bann *drug addicts* Praslin i enkrwayab. Mon tir *chapeau* pou sa kalite travay ki sa zenn garson in fer. Ou konnen ki zot ti fer li Mr Speaker?

Zis akoz en dimoun pa kontan li ouswa akoz en pe son lapartenans politik, sa garson in ganny viktimize *to the point* koz zot tir li zot in met

en dimoun par lao li. Zot ti pres pou met li deor tou Mr Speaker.

E olye li i ale, sa dimoun i ale e i ankor la e i pe kontinyen sa bon travay ki in komanse. Mr Speaker i enportan ki nou donn sipor bann dimoun ki pe antreprann sa lalit, i enportan.

E nou, nou pare pou fer sa e menm la ki *APDAR* pe ganny transfer anba Minister Lasante nou Lasanble nou lo sa kote latab nou pou kontinyen siport sa Departman.

Akoz ou krwar ki poudir i enportan ki nou ed nou bann ser ek frer ki'n tonm anba sa bann lenfliyans. E mon bezwen fer ou mazine Mr Speaker ennler nou bezwen mazin entegrite nou bann ser ek frer ki ozordi i adikt ek bann sibstans danzere.

Onorab Naddy Zialor in tous lo la, landrwa kot ou pe donn zot *methadone*. Grand Anse Praslin nou pe donn zot obor, lo en *mini bazar* obor en laboutik Amitie, e dan lizye piblik ki mon pa krwar i byen. Mon krwar i enportan pou nou get byen landrwa kot nou pe war kot nou pe donn nou bann zenn, nou bann frer *methadone*.

Mon krwar sa i en keksoz ki nou bezwen regete. Apre Mr Speaker ou konnen ler mon get lo kote latab mon konpran

akoz zot pe lager lebra kase. E Mr Speaker nou tou nou konnen poudir vre, Onorab Michel Roucou ti annan rezon ler i ti dir poudir sa Lazans, enn bann rezon ki i ti ganny kree sete pou donn en gro saler serten endividi. I pa manti, i vre.

E mon konpran akoz lot kote latab lezot pe lager lebra kase, akoz Mr Patrick Herminie ti SS sa Departman da lepase. E i enportan osi pour ler nou fer sa bann deklarasyon mon pe defann lebra kase ki nou deklar nou lentere.

Akoz mon santi en konfli lentere, Onorab Cosgrow pe koz lo Patrick Herminie si mon pa tronpe mon krwar Patrick Herminie son tonton, konmsi mon konpran –

(Off-mic)

HON WAVEL WOODCOCK

Non mon pa asire, mon panse, mon krwar ... kekfwa ...

(Interruption)

MR SPEAKER

En moman! Wi Onorab! Mon krwar kekfwa Onorab Cosgrow i annan rezon ki ou pe *input improper motives* pou li. Alor *retract*, tir sa silvouple. Koriz sa, apre kontinyen.

HON WAVEL WOODCOCK

Mon *retract* sa bout ki mon'n dir Mr Speaker. *Ok* mon pa pou kre en lot *misapprehension* parey zot pe sey fer lot kote latab.

Mr Speaker mwan mon osi mon pou donn sipor pou anmenn sa lalit kont drog. E tou mon sipor posib pou nou ed nou bann ser avek nou bann frer ki ozordi pe *struggle* avek sa adiksyon, avek bann drog danzere.

Mr Speaker mon pa war naryen mal avek sa *Bill* ki devan nou pou *repeal* APDAR aköz fonksyon pou kontinyen. E mwan mon santi poudir sa Gouvernman pou fer bokou plis pou nou anmenn en lalit kont drog Sesel. E dezyenmman pou e nou frer ek ser ki'n tonm anba sa fleo ozordi. Avek sa de mo mon dir ou mersi Mr Speaker.

MR SPEAKER

Mersi bokou Onorab. Bon avek sa mon'n ariv a lafen bann entervenans lo mon lalis, e mon krwar mon kapab envit VP pou donn son larepons lo deba.

THE VICE-PRESIDENT AHMED AFIF

Mersi Mr Speaker. Bonn apre midi ankor tou bann Manm. Mon ekout tre byen atantivman bann komanter e zis detrwa pti pwen. Premyerman mon ti a kontan

remersi tou bann Manm ki'n koz an faver sa *Bill* ki devan nou.

I montre mwan poudir sa bann pwen ki mon'n souleve bomaten, lo rezon pou lakel nou pe repeal sa *Bill* ki ti kre APDAR, rezon aköz nou'n fer li. Mon krwar i enportan pou zot realize, mon donn zot sa reasirans ki napa okenn moman ki Gouvernman i anvi abandonn lalit kont drog e lalit kont lalkol.

O kontrer nou anvi akseler sa lalit. E zisteman nou kapab fer li si nou pran resours ki ozordi nou pa pe fer li dan en fason efektiv, e nou donn li avek Minister Lasante pou li mye kapab fer son louvraz.

Mon krwar bokou parmi zot e mon kontan sa pasyon ki'n eksprimen e la mon pe fer referans sirtou avek Onorab Georges lo la fason ki li, li menm dan son distrik in rankontre bann problem e son konsern se vremen ki pou arive apre ki nou'n *repeal*?

E eski sa lanfaz ki zot in vwar pandan sa bann dernyen lannen pou kontinyen reste? E ki bann stratezi vremen?

Mon mazinez ozordi i pa ler pou nou koz tou an detay lo bann stratezi, me mon ti a kontan dir ou Onorab poudir sa ki nou pe fer ozordi se vremen pou donn plis resours avek Minister Lasante.

Sa bann travayer ki deza - anefe depi lanons ti ganny fer an Fevriye boner sa lannen ki *APDAR* pou raport avek Minister Lasante tou keksoz in kontinyen mars parey.

Bann travayer ki ti pe travay kot *APDAR* zot ti ankor avek *APDAR* zot kontinyen fer menm fonksyon, savedir bann ki ti pe travay dan ledikasyon, prevansyon, bann ki ti pe donn e administre bann diferan drog, zot kontinyen fer sa louvraz e sa pou kontinyen.

Me dan pe kontinyen i pou annan plis resours akouz nou pe fer li dan en fason pli efikas. Onorab Georges ti fer referans avek en papye ki i ti sirkile, mersi bokou mon'n ganny sans lir en pe sa bann pwen ki ou'n mete. E sirtou lo solisyon ki ou ti propoze ladan.

Ou ti koz sirtou lo lenportans pou annan plis ledikasyon, lenportans pou adres bokou bann problemm sosyal parey lakaz. Se sa ki souvandfwa i kre sa bann sityasyon ki finalman bann zenn sirtou i tonm dan drog.

Ou ti osi koz lo lafason nou devret tret dimoun in ganny afekte e tret li dan en fason ki korek, pa zis krwar poudir *methadone* dan li menm i en solisyon, zis ou donneren san kontrol i pa pou anmenn okenn solisyon.

E ou ti osi koz lo lafason ki nou bezwen fer plis dan nou lankadreman legal, pou fer sir ki bann dimoun ki, si i ganny kondannen petet annan *community service*, par egzanp ou'n koz lo la.

E tousala se bann pwen valab ki mon krwar Gouvernman i pou etidye, me sirtou met li an konteks sa ki nou deza annan ozordi ki apel *National Drug Control Master Plan*.

E mon asire sa ti en plan ki ti ganny fer konzwentman avek tou bann parti prenon dan lasosyete, Minister Lasante, Sosyete Sivil, *APDAR* sa letan. Pou fer sir ki a lonterm nou annan en plan ki detaye, ki kler ki tou dimoun i tonm dakor lo la ki pou adres zisteman tou sa bann problemm ki nou annan ozordi.

E alor mon oule dir ou e tou bann lezot Onorab ki'n, ki anvi ganny reasirans poudir avek *repeal* sa Lalwa sa striktir lankadreman *APDAR* pa pou la, me Minister Lasante i pou la.

Pou sa konsern ki ti ganny souleve ki, eski i pa pou met en presyon lo Minister Lasante i deza annan *COVID*, i deza annan plizyer lezot problemm ki Minister i deza anba presyon.

Larepons se non, parske nou pa pou afekte *Health Care*

Agency ki li i pe deza dil avek problemn bann dimoun ki malad. I pa pou afekte *Public Health Agency* ki li i pe anmenn en batay feros kont *COVID* par egzanp.

Tou sa bann responsabilite ki *APDAR* pe ale - parey mon'n dir lo komansman i tonm direktman anba Minister Lasante i *PS* Lasante li i ti osi en Manm *Board APDAR*.

Alor i konn tre byen ki bann problemn ki annan ki bann stratezi ki deza an plas, e ki bezwen ganny ranforsi i konn sa tre byen. I deza annan en lekip kot li i pe travay avek tou ban dimoun ki deza la dan *APDAR*. E i pou ganny ranforsi mon konpran par en lot dokter mon konpran ki pe vini ki'n fini zwenn zot e ki annan bokou leksperyans dan sa bann zafer.

Alor mon oule dir zot poudir sa *repeal* ki pe vini, i pa vin en menas pou personn, sa *repeal* ki la i pe senpleman anmenn senplisite. I pe anmenn efikasite dan lafason resours Gouvernman i ganny servi e pou anmenn en meyer rezilta.

Mon oule osi e mon kontan ler mon'n ekout bann diferan komanter, sirtou Onorab Woodcock ki'n dir poudir sa problemn drog, annou pa fer krwar i fek komanse. Annou pa fer krwar

depi le 25 Oktob en sel kou ti annan 5000 adikt dan Sesel e Gouvernman ti dir dan 100 zour i pou fer zot disparet koman en problemn.

Mon pa krwar sa zanmen in deza arive, zanmen in deza ganny dir. Nou bezwen konpran poudir drog i annan en bon pe letan i annan drog Sesel, selman ti napa eroin, kanabis, *hashish*. Me selman dan bann lannen 2000 an montan in akselere in anvair nou pei.

E Onorab, mon krwar Onorab Vidot ti dir i konpran petet ler ou antre dan sa soulye ki ou konpran kote sityasyon i ete. Be i vre Onorab, parske depi ler nou'n antre dan sa soulye ki nou'n vwar, ki mannyer bann *dealers* ti pe marse libreman e nou, nou'n pran zot nou'n met lo avyon nou'n fer ale.

(APPLAUSE)

(laughter)

THE VICE-PRESIDENT
AHMED AFIF

Se zisteman ler nou'n antre dan sa soulye ki nou'n realize poudir dan ou distrik dimoun ti pe vann drog bonnavini mannyer zot anv, e ler gard i vini zot lager ek gard. Be ozordi in donn en lape laba.

So ler, i pa ankor petet donn lape, i pa ankor donn lape konpletman, me selman i

en gran amelyorasyon lo sa ki ti egziste. So ozordi ler nou met sa soulye ki nou war dan Belonie zot in donn en bon lape lo drog.

Se depi ler nou'n met sa soulye ki nou'n vwar a plizyer repriz bann dav Iranyen ki'n ganny arete dan en lokazyon i ti'n fini delivre drog i pe anmenn Sesel, zafer i Ankour, 18kilo in ganny sezi e toulezour batay i on.

Se ler nou antre dan sa soulye ki nou war. Nou demann nou lekor be ki ti pe arive tou sa letan? Lekel ki ti pe met zefor pou fer tou sa keksoz? Ki mannyer drog in anvair sa pei?

Se ler nou met sa soulye ki nou realize si kontrerman avek konsey ki nou ti pe gannyen lo zot kote latav, ferm sa pei, pa donn vaksen. Kote nou ti pou ete ek sa sityasyon drog? Napa larzan, ni pou *methadone* ti pou napa, ni pou tretman i pou napa, ni saler zot ti pou napa.

Se ler nou antre dan sa soulye ki nou'n pran desizyon pou ouver sa pei, vaksin dimoun, koup *FA4JR*, fer dimoun al travay, koup sa bann *URS*. Me fer sir ki tou dimoun i annan en lasyet manze.

se ler nou antre dan sa soulye ki nou'n remarke ki kantite keksoz ti mal, kot pri ti tro o, kot nou'n fer desann, pri

manze, en pake zoranz ki ti R65 ozordi in ariv R21.

Se ler nou antre dan sa soulye ki nou'n realize ki mannyer i ti enportan pou nou fer Dolar sorti R22 pou ariv R15. Tousala se bann keksoz ki pozitiv, ozordi sa *Bill* ki la devan nou set en *Bill* ki pou anmenn ankor benefis ekonomik. I pou anmenn plis lekonomi pou Minister Lasante ki en Minister ki anba en ta presyon.

Alor an gro Mr Speaker mon ti a kontan remerci tou bann Manm ki'n koz an faver. Mon santi poudir nou pe ganny sa sipor pou nou *repeal* sa *Bill* ki ti kre *APDAR* e ki nou pou anmenn plis lefikasite dan sa lalit kont drog.

E mon kapab reasir tou dimoun ki sa Gouvernman i pou fer tou sa ki i kapab, pou fer sir ki tou Seselwa i viv dan lape ki tou nou zanfand i ganny sa sans grandi san lenfliyans drog.

E sa i ava anmenn plis Seselwa prodiktiv ki kapab ranplas tou sa bann etranze ki nou annan ki pe travay dan pei, e ki pou anmenn plis benefis ekonomik pou nou pei. Mersi bokou Mr Speaker.

(APPLAUSE)

MR SPEAKER

Mersi Vis-Prezidan. Nou a prezan pran vot lo merit

zeneral sa *Bill*. Manm ki an faver lev lanmen silvouple? *Ok* Manm ki kont?

Bon lo keston *general merit of the Prevention of Drug Abuse and Rehabilitation Agency (Repeal) Bill, 2021, 20* Manm in vot pour, 6 Manm in vot kont e 0 *abstain*.

Alor sa *Bill* in aprouve lo *Second Reading* e mon a demann Madam Clerk pou fer *Formal Second Reading*.

MADAM CLERK

Mersi Mr Speaker. *A Bill for an Act to provide for the Repeal of The Prevention of Drug Abuse and Rehabilitation Agency Act, Cap 13 of 2017*. Mersi Mr Speaker.

MR SPEAKER

Mersi Madam Clerk. Lo versyon *Bill* ki mon annan devan mwan mon pa war okenn amannman ki *Bills Committee* in propoze. Eski i annan *amendment*?

Eski bann Manm, wi si dir mwan sa pou nou pas dan Staz Komite. Napa? *Ok*, so napa okenn lot, so napa okenn lot amannman ki pou ganny anmennen?

HON JOHN HOAREAU

Mr Speaker nou napa lamannman, me selman mon pa konnen si Onorab Georges i annan en pti *typo* ki i oule pas lo la. Mersi.

MR SPEAKER

Wi, mon war *VP* in lev lanmen avan. Mon a les *VP* apre Onorab Georges e nou a regarde si nou pou pran *amendment. VP*.

THE VICE-PRESIDENT AHMED AFIF

Mersi Onorab. Mersi Onorab Speaker. Mon ti zis oule dir ou Mr Speaker poudir *Attorney Zeneral* mon krwar avek Onorab Georges ti'n trouv en *very minor amendment*, lo tit si mon pa tronpe, me selman mon a les zot eklersi. Mersi.

MR SPEAKER

Ok, be dan sa ka nou a pas dan Staz Komite. Wi Onorab Georges.

HON BERNARD GEORGES

Annefe Mr Speaker mon ti pe al dir zis detrwa *typos* mon ti pe *move* pou nou pa al dan Staz Komite, akoz i pou zis en pti lamannman tipografi ki kapab ganny fer *at the reading stage*.

Alor pou la premyer fwa mon ti a kontan anba *Order 97(1) move* pou sispann *Order 70 a 75* pou nou sot staz Komite. Sa lamannman Mr Speaker i bezwen ganny segonde e vot lo la. Mersi

MR SPEAKER

Wi, mon a ganny en segonnman pou sa Mosyon silvouple? Onorab Arissol.

HON SANDY ARISSOL

Mr Speaker. Bonn apre midi ankor enn fwa tou dimoun, mon segonn Mosyon anmennen par Onorab Georges. Mersi.

MR SPEAKER

Mersi nou a pran vot lo sispann *Committee Stage*, lev lanmen silvouple sa ki an faver? Byen. Manm i kont? Mersi.

Lo kekyon pou *skip Committee Stage on the Prevention of Drug Abuse and Rehabilitation Agency (Repeal) Bill, 2021*, 20 Manm in vot pour, 0 kont e 6 abstansyon. Alors sa Mosyon in pase e nou kapab prosede san Komite.

Onorab Georges eklersi mwan. Ou pou fer sa bann.

HON BERNARD GEORGES

Wi Mr Speaker. Mr Speaker mon ti annan en *typographical amendment* e si i pa parey sa enn avek AG, AG i kapab dir mwan pou li. E mon ava fer li anba *Order 76(2)* avek ou permisyon nou kapab fer *typographical amendments errors and oversights* avan *Third Reading*.

Zis avan nou *move* pou *Third Reading*. Mwan mon ti a kontan lo mon versyon dan

Clause 4(b), 4(b) i annan en repetisyon *the date* of dan dezyenm ek trwazyenm laliny, *prior to the date of the repeal*.

MR SPEAKER

Wi mon war.

HON BERNARD GEORGES

Nou bezwen tir enn ant sa de. Sa se mon propozisyon. *That was the only one I had*, me si AG ti annan en lot i a dir mwan (akoz li i napa drwa a laparol) e mon ava fer sa lamannman.

MR SPEAKER

Tre byen. AG ou a pas ou *amendment* avek Onorab Georges.

ATTORNEY GENERAL FRANK ALLY

Mersi Mr Chairman. Mr Chairman i annan en pti fot dan *the title of the Bill*. Dan plas *'abuse'* nou'n met *'use'*. So mon ti a *move* pou nou koriz sa.

MR SPEAKER

Sanmenm, setou. Onorab Georges ou pe rikord sa?

HON BERNARD GEORGES

Mon pa vwar Mr Speaker. Dan pou mwan i *ok*, dan *capital abuse, abuse* i byen. Dan nou versyon i *ok*.

MR SPEAKER

Dan nou versyon mon krwar in ganny korize AG.

HON BERNARD GEORGES

In ganny korize, mersi.

MR SPEAKER

Tre byen.

HON BERNARD GEORGES

Donk Mr Speaker. Avek sa mon atann ou demann mon pou *move* pou en *Third Reading*. Mersi.

MR SPEAKER

Wi. LGB ou a prezant Mosyon pou *Third Reading of the Bill please*.

HON BERNARD GEORGES

Mersi Mr Speaker. Mr Speaker anba *Order 76(1)* mon *move* ki *The Prevention of Drug Abuse and Rehabilitation Agency (Repeal) Bill, 2021 as amended* i ganny lir en Trwazyenm Fwa. Mersi.

MR SPEAKER

Mersi. Mon a ganny segonnman silvouple. Onorab Arissol.

HON SANDY ARISSOL

As amended i ganny segonde Mr Speaker.

MR SPEAKER

Mersi. Nou a pran vot lo *Third Reading*. Manm ki an faver lev lanmen silvouple? Byen,

Manm ki kont. Mersi ou'n gannyen Madanm Clerk?

Lo vot *Pour Formal Third Reading of the Prevention of Drug Abuse and Rehabilitation Agency (Repeal) Bill, 2021 as amended*; 21 manm in vot pour, 6 kont e 0 abstansyon. Alor *Bill* in ganny aprouve par Lasanble lo *Third Reading*.

Avek sa mon a demann madanm Clerk pou *proceed* avek *Third Reading of the Bill*.

MADAM CLERK

Mersi Mr Speaker. *This Act may be cited as a Prevention of Drug Abuse and Rehabilitation Agency (Repeal) Act, 2021*. Mersi Mr Speaker.

MR SPEAKER

Mersi. Donk sa *Bill* in pas dan Lalwa, ann atandan *assent* Prezidan.

Mon a remersye *panel*, VP avek son delegasyon ki'n zwenn nou ozordi pou diskit lo sa *Bill* ki kantmenm i ti en senp *Repeal Bill*, in permet en kantite pwennvi sorti lo sa problemn drog dan nou pei. E mon krwar sa i toultan en refleksyon ki ed nou e nou popilasyon.

Mersi bann Manm pou zot entervansyon. Nou a termin travay la e nou a rezwenn Mardi prosen 9er. Mersi e VP e ou delegasyon bonn rantre e bonn sware. *Adjourn*.

(ADJOURNMENT)

